

E Mak

Ka Knovvur To Tittiegom Mang E Yesus

O Rhek Ruk Ktar Kam Keknen Mang E Mak Ka Knovvur To Tittiegom

A knovvur ta e Mak tittiegom. A knovvur ta, ta vle te, a knovvur langto kun mnam o knovvur ruk korlotge ko ngat vrua maenang. E Yoanes ka knovvur ta ktua vle ge. Vanangko mar tgus ngat kothoi mang o tgoluk tgus ruk ngata pis mang e Yesus mnam o kolkhek ruk en ta vle mo mmie. O mia ngaro papat ruk lvu laol ngta pat te, e Mak tkaelha kmittiegom ka knovvur ktar mang o mia tgus ko ngat ittiek mang e Yesus kat. Va ngta pat kat te, E Mak ta, nok en a mhel to nam vu kaeha kar e Pol kre Barnabas tennik ko ngam kaum kpunpa kam havaeng o mia mang e Yesus.

E Mak tittiegom ka knovvur ta ngang endruk tennik ko ngta ktar kmor mnam mar mang e Yesus, mar kam smia mnor mang e Yesus karo keknen va kam smia mnor mang kat te, kman ko en nak yor enang ko tyor tok. E Mak ta khenam e Yesus ngang ngar enangthe en a mi mhel to nama svil kmeha ngang o mia, nang lua svil o mia kmeha ngang en.

Kun mnam a hor to enda, ngruera vokom e Yesus ko ta ktar kmeharom o reha ngo mamten. Ngruera vokom ka serppak to e Nut tel ko maktiegom ko nma patter o mia, va ko nma pet o kool, va ko nma lol o mia ngaro kerkeknen patgiang ngaiting kat. E Yesus te mrua mon en mruo te, “En E Nut Khal to en.” Va ta havae kat te, ta grung kam mur kaen en mruo kam yor mang o mia kam hong ngar pum ngaro kerkeknen.

**E Yoanes To Nma Parrum O Mia Ta Tetger O Mia Kam Verang A
Ngaelaut Ekam E Yesus**
(Mt 3.1-12; Lk 3.1-9, 15-17; Yn 1.19-28)

1 1-2Ngor kothoi mang a knovvur to mang e Yesus to E Nut Khal,
Endo E Nut Thim Orom Ka Msasaen ko tkir kim e Seten. Ka ngothoi
tkaelha tennik kmikkiem a prophet to e Aisaia karo rhek ruk ngat ittiegom

mar. Ko e Aisaia ta ktar kpavap orom E Nut karo mur rhek mruo ruk E Nut ta smia papsim Khal ormar. Ko E Nut thavaeng Khal te,

“Vokom na, kua re kam meng kua propret langto, en kam ktar mang in, he en kam verang a ngaelaut ekam in. ³Ii, nera ktar mang in he kpis ko ma kalputmok kmen a re to mang yin ngang o mia, he nang mar kmitgung ngaro kerkeknen. Ii, ko nera pis he ktetger o mia kam re la vlorum ngang ngar mang ngaro kerkeknen te, ‘Mguak hopeng kero kleimkor ekam Ngoldaip kam verang a ngaelaut ekam.’”

⁴⁻⁶To mniam a kolkha langto, a mhel langto ka munik e Yoanes, ther mia pis ko ma kalputmok kmaottam E Nut karo rhek ruk endruk, mar kam pis lmien orom en mruo tok, kmikkiem gi enang ko e Aisaia ta ktar kpavap orom mar. Ii, endo e Yoanes, en nam kaegenkar ka yet to ngat eharom orom a ngaemslang to a kamel karo ngairis. Va nma kleng ka vgon orom a pus to ngat eharom orom a bulmakau ka ptaik. Va nam kaemem o ngorveit va o lup ruk ko ma kalputmok kat. Ii, e Yoanes ta ktar kpis enang tok, he kaen a re ngang o mia kam tetger mar te, “Mguak kaitgung mularo kerkeknen to kle kparrur orom E Nut ka munik, he nang muk kam mrua khenam muk mruo ma mmok tok te, mut mi kaitgung mularo kerkeknen, he nang E Nut kam lol patgiang ngaiting he kikiangae mang ngar.” E Yoanes nma tetger o mia kavurgem tok, ko mo kolkhek tgas ngama mopatap kmotoot pum mar ko mYerusalem va si mYudea karo mhethor tgas kat he kveet kpis ngok kim e Yoanes ko ma kalputmok kam vongnek kim. Ngma veet kam pis ko kim tok, to nam her kle kparrum mar orom E Nut ka munik kun mniam a ye to e Yodan ekam ko ngat mrua havae mang ngaro kerkeknen mruo ma mmok. ⁷⁻⁸Ii, e Yoanes nma havaeng o mia ko tok orom karo rhek akuruk kat te, “Dok, ko gia parrum muk orom a gi ye. Vanang Endo Nera Kaol knaek mang dok, en ner kle ktua parrum muk ko pum E Nut kalo keik orom E Nunu A Totur ka munik. Ner kaeharom tok, ko en ta laut mang dok hak. Ka serppak tho mi kut laut kir kim dok. Si dok kam kerrei he khong kalo nhar nginalo vanvan nginalo ngausie mkor,^a va dok klo vu eveep is e, en kam mrua ppir mang en mruo, nang dok kam hong ngin mkor kat e.”

E Yoanes Tparrum E Yesus Orom E Nut Ka Munik (Mt 3.13-17; Lk 3.21-22)

⁹To mniam a venloot to endo ko e Yoanes ta vle ko ma kalputmok vop, e Yesus tottek kun mniam ka rengmat ka pun to ko mNasaret, kun mniam

^a 1.7-8 A re ka vgon to e “hong kalo nhar nginalo ngausie” ta rere mang o Yuda nga keknen to kam hong a mhel kalo nhar mkor. O gi vrong mia ruk ngaro mnok nong ke vur laol ngam kol a ngaeaha to enda.

a mhe to e Galili he kngae ngok ma kalputmok kat. To e Yoanes tparrum en kat orom E Nut ka munik kun mniam a ye to e Yodan.¹⁰ A gi hi to ta parrum knop, e Yesus ther gia hop kun mniam a ye va ther gia vokong a volkha ko tmommenik. A volkha tmommenik, to E Nunu A Totur ta grung enang a giu he kpis kar kuon mang.¹¹ To E Nut ka ktui tkottek kuon ma volkha he kre te, “Ko hal to yin. Kom vu kaelongtok mang in, va ko sei kam higliang in.”

E Seten Ta Kendum Ngang E Yesus Kam Khenam Ka Serppak Ma Mmok
(Mt 4.1-11; Lk 4.1-13)

¹² A gi hi to tre gia parrur knop, E Nunu A Totur ta tger E Yesus he ka ktong kam ngae ngok ma kalputmok ka mhe langto ko yok vat.¹³ To mniam o kolkhek ruk alo mhelom alomin, en tuk ta vle ko ma kalputmok, ko tok ko o ngaemslang ruk ngta sop ngama vle mniam. He e Seten tkaenen mkor kmeharom o kerkeknen. Vanang E Nut karo engyel ngma turang kam klang mo ol.

E Yesus Tkaeha Ngogouon mGalili
(Mt 4.12-17; Lk 4.14-15)

¹⁴ Kam ngae, to kopekam ko ngat enpasiker E Yoanes kun pa hengor, e Yesus tkaeknik ngogouon mGalili to kaelha kam polger o rhek ruk mang en mruo, endruk E Nut telik maktiegom en kam polgerik tok.
¹⁵ Nma havaeng o mia te, “A venloot to mang E Nut ka tavgo kam komor o mia ther mi pis mo kmuk he. He ekam tok, mguak kaitgung mularo kerkeknen he kor mniam muk mang o rhek ruk koma polgerik ngang nguk.”

E Yesus Ta Ktar Vaeng Kalngunes Ruk Ktarang
(Mt 4.18-22; Lk 5.1-11)

¹⁶ Tie ma kolkha langto, e Yesus ta ngae kaikkiem a ngaenker to e Galili ka ngaiting, va kvokom a mhel langto ka munik e Saimon kar knopia e Andru ko nginta hivuo kam ngam ngina klui kun ma ngaenker ko min ngina ngaeha to kmit singol. E Yesus tvokom min tok,¹⁷ to kreng ngin te, “Me aol ikkiem dok, he ngor kle kaelkim mae kmit o mia ngok kim dok mekam mekam gi enang ko mem kait o singol.”¹⁸ A gi hi to nginta ngan ko ta re tok, ngint her gi korim ngina ngaeha to kmit singol orom nginaro klui, nang her gi kaikkiem ngatngae.

¹⁹ E Yesus tvur kta ngae nong ke laut, to kta vokom e Sepedi klo hal ruk e Yems va e Yoanes ko nginta vatvat nginaro klui he kaelel mo kmar kuo ma langail.²⁰ A gi hi to ta vokom min ta vaeng ngin kat. Ta vaeng ngin, to ngint her gia parem ngin teit kar endruk ngam kaeha ngang ngar ko tok mniam a langail, nang her kat kaikkiem kat.

E Yesus Ta Kerer A Koot To Tvingig A Ngokol Langto
(Lk 4.31-37)

²¹ Kam ngae, to mniam a kolkha langto e Yesus mar ngata ngae he kpis kun ma rengmat to e Kaparnam he ka vle. A gi hi to a Sabat ta vuut, e Yesus ta vaik ogun mniam o Yuda nga rek to kam rere mniam he kaelha kam patter o mia. ²² O mia ngata vongnek kim to ngate sei kmit ngaongtok kim karo rhek ko en tle ktua patter mar orom kta serppak mruo to yok gi, nang nong orom ke serppak to mkor o pattermia ruk kmo pos e. ²³ Ii, e Yesus ta rere kngae kun mniam o Yuda ngarta rek to kam rere mniam, va vgum a mhel langto a koot to nong a yar hak^b tim he envevem ko ta vaik. ²⁴ Ta vle to a koot ta gervik klik kim e Yesus te, “Yin a mhel to endo kua mnor miik. Yin e Yesus to nkong mNasaret. Yindo E Nut Tmur Re Pum Yin.^c He mor o kool ngot lua mtom yin kam pis he ktooop kmor mo e. Ya pis moti kam rum kim mor, i nop gi?”

²⁵ A koot tgervik kim tok, vanangko e Yesus ther gi reng a koot to endo te, “Ngiak tu ko he. Ottek kun mniam a mhel to.” E Yesus tgia havae tok, ²⁶ to a koot tkootmerom a mhel to endo kngam, ta kongrek ogu mmie he kervuvui klik, to hera parem.

²⁷ O mia tgus ngate gi mrua sor kmar to kaelha kmo mnganang ngar te, “Ngola, a mhel to tem anito e? Ko karo rhek ruk endri ngat ho mi ktua serppak hak! Ngola, nok a serppak tang ko a gungar ta vor vat! Vokom na, ko si o kool, va ngama ngan vgum ko tgia kererik orom karo gi rhek ruk ngat vua serppak ko tgia reng ngar ormar.” ²⁸ Va vgum ka ngaeha to tok, a re to mang E Yesus thera ngae ngatngae he kvaas kim o mia kun mniam o rengmat tgus ruk kun mniam a mhe to e Galili.

E Yesus Tkaeharom E Saimon Ka Snerip To A Vlom Pum A Manakain
(Mt 8.14-17; Lk 4.38-41)

²⁹ To e Yesus kar e Yems va e Yoanes ngat kootpum mar ko mniam o Yuda ngarta rek to kam rere mniam to hop kngae lsir ngok mniam a rek to mkor e Saimon va e Andru. ³⁰ Kun mniam a rek to endo, e Saimon ka snerip to a vlom ta yaylor he ka kru kuo ma hep vgum a manakain ko ta ngae kun mniam. Ngata vaik, va e Yesus kalngunes ngat lo hus kam havaeng mang. ³¹ E Yesus ta ngnek, to ta ngae ngok kim he re gia kpom ka ktiekh over, va a manakain ther gi nop kun mniam hak. To a vlom to endo ther gia hop ku to hera krong o ol ngang ngar.

^b 1.23 A re to “a koot to nong a yar hak” ta rere mang o kool ko ngam kaenvevem o mia, mar kam mrua kekhen mar mruo ma mmok. He kmikkiem o Yuda ngaro pos o mia ruk endri ngat kernonho hak ko pum E Nut kalo keik. ^c 1.24 A munik te, “Yindo E Nut Tmur Re Pum Yin” o Yuda ngaga mon Endo E Nut Thim Orom Ka Msasaen orom ka munik to kat.

E Yesus Tkaeharom O Mia Kavurgem Pum Ngaro Yor Ngo Mamten

³²To mniam a kolkha to endo gi, ma rorongmia, ko a kolkha tvaik he, o mia kavurgem ruk ngta yaylor kar endruk o kool ngta vizing ngar, ngarlenar ngta plalam mar kam pis ngok kim e Yesus. ³³Va o mia kavurgem ruk kun mniam a rengmat to endo ngata kaum ko va rek ka gudor to mkor e Saimon kre Andru. ³⁴To e Yesus tkaeharom o mia ngarlavurgem pum ngaro yor ngo mamten hak. Va ta kerer o kool kavurgem ruk ngat vizing o mia kat. E Yesus tkaeharom tok, vanang ta kle khahagam o kool ruk tkererik, mar kam lua polger o rhek mang en ekam ko ngat mur mnior mang en te, en her Endo E Nut Thim Orom Ka Msasaen arhe.

E Yesus Ta Havaeng lGalili Mang E Nut

(Lk 4.42-44)

³⁵Hop enang ngmo, tie mo kao, e Yesus thop halki he kparem a rek to endo, nang kngae ngok ma gi lootgeik he kngarkie ko tok. ³⁶To e Saimon kar klenar ruk ngam kaikkiem ngat kaelha kiring. ³⁷To ngat re kpis mang, to ngat havaeng te, “O mia kavurgem ngata riring yin.”

³⁸Va e Yesus tkoripang ngar te, “Mu so mor ngok mniam o rengmat ruk kan mmok, dok kam polger E Nut karo rhek ko tok mniam mar kat, ko E Nut tmi kut meng dok nge mmie, dok kam mi kut kaeha tok arhe.” ³⁹To e Yesus tkaelha kvaik kottek kun mniam a mhe to e Galili karo rengmat ngakro maksien tgus he kaelha kam polger E Nut karo rhek ngang o Yuda kun mniam ngaro rektor ruk kam rere mniam mar. Va nma kerer o kool kat.

E Yesus Tkaeharom A Mhel Pum Ka Yor To A Lepra

(Mt 8.1-4; Lk 5.12-16)

⁴⁰To mniam a kolkha langto, a mhel to tkol a yor to a lepra tpis ko kim e Yesus, ktubulkek ku penharom he kaurur kim te, “Enangthe ngiaka svil va yi kais kmeharom dok, he dok kam kta vle la mmok ko pum E Nut kalo keik kat.”

⁴¹To e Yesus ta mrung to her gia tuom ka ktieck he gi kaehang va her gia reng te, “Mare, kua svil! Ila vok na ngae gia mmok.” ⁴²A gi hi to tgia re tok, ka yor ther gi nop kuo mang ngatngae.

⁴³⁻⁴⁴To e Yesus ta reng a mhel to endo lserppak te, “Ngiak or kam havaeng a mhel tang hak mang a ngaeha to ko eharom ngang in. Vanang ngiak kle va kngae ngok kim a pris tang, en kmehehang yin, en kam tting mang in te, lmien te, yi ho mi mmok ko pum E Nut kalo keik kat. Ngiak kaeharom tok, to kle kngae ngok mniam E Nut ka maksien he ka nngiar ngang E Nut, kmikkiem gi enang ko e Moses ka pos langto ta keknen tok

mang a yor to endo ko yi her ottek mniam he. Ngiak kaeharom gi enang tok, nang o mia ngaro ngaongtok kmisis mang yin te, lmien te, yi ho mi mmok kat ko pum E Nut kalo keik.” E Jesus treng a mhel to tok, to le kmeng ta ngae orom karo rhek ruk endruk. ⁴⁵Tsi hagam a mhel to endo, vanangko a mhel to endo tlo kat kaikkiem ka re e. Ta kle va gia hahavae mang ngang o wrong mia tgus ruk ngat gi wrong papagis mang. Ii, tgia senker a re mang tok, kam ngae kais ko e Jesus te ho lo kat kais kam kta vaik mniam a rengmat tang ma gi mmok kat e, ko o mia kavurgem ngat kle ho gia motarhik mang. He ekam tok, e Jesus tgia vle ko ma gi kalputmok. Tsia vle ko tok, vanang o mia ngma mopatap kmotoot pum mar ko mniam a mmie karo ngaitngol tgus kam veet ngok kim mniam a mhe to endo ge.

E Jesus Tkaeharom A Mhel To Ka Vok Tgus Tyor

(Mt 9.1-8; Lk 5.17-26)

2 ¹Ko pekam ko o kolkhek akuruk ngat nop, e Jesus tkat kaeknik ngok mrek ko mKaparnam. O mia tgus ruk kun ma rengmat to endo ngata ngnek mang te, tpis he ka vle, ²va ngta sovet kam gun mang, to a rek tngae ho mi kut ottep hak kais ko nong a vur ngaekam tang ko tgia vavle. Va si ko rkieng a gudor kat tngae ho mi kut ottep kat. To e Jesus ta patter mar kngae, va vgum ³o mia ruk korlolo ko ngata kokol a mhel to ka vok tgus tyor he kngorom ngok kim e Jesus. ⁴Ngata riring o longmok ekam kam kokol kam vaik orom kam pis ko kim e Jesus, vanangko ngat lo is e, ekam ko o mia vang ngata totok. To ngta grap orom kuo kim a rek he khalker a rek ka keik kmel a longmok ekam kuo malpgem e Jesus lsir. Ngat halker a rek knop, to ngta kol a hep to orom a yor he ngat konget a mhel to enda orom o usiel ruk ngta kleng ka hep orom mar. ⁵E Jesus tvokom mar ko ngat vu kor mniam mar mang en enang tok, to kreng a mhel to endo te, “Kambis, dok mruo ko lol ilaro kerkeknen patgiang ngaiting he kikiangae mang ngar hak.”

⁶Ta re tok, va akuruk mniam o patternia kmo pos ngat korsang kun ma rek to endo kat he kvongnek kim e Jesus. Nangko kun mniam ngakro vurkul ngat si koror mniam mar mruo ekam he ka mngan pum te, ⁷“Hai-e! Kman ko a mhel to enda ta re ti? Ta kerrereng E Nut ka munik tok arhe! Ko ta mrua tattap orom en mruo te, en E mi Nut msim orom karo rhek ruk tok. Ii, ko gi E Nut tuk to tis kam lol o mia ngaro kerkeknen patgiang ngaiting he kikiangae mang ngar, nang nong o gi wrong mia e, nop hak!”

⁸E Jesus ther gia mnor mang ngar ngatngae ko ngata mngan pum en enang tok, to ta kle ka mnganang ngar te, “Mularo vurkul ngata horrotgi pum dok kman, he muta mngan pum kua serppak to kam lol o mia ngaro kerkeknen patgiang ngaiting he kikiangae mang ngar tok? ⁹Ani ngaeha

to ta koppet kam khenam ma mmok? A ngaeha to kam gia reng a mhel ta te, ‘Ko lol ilaro kerkeknen patgiang ngaiting,’ i o endo kam mi kaeharom a mhel ta, he en kam hop kol ka hep he kngae ko pum mularo kerok.

¹⁰Vanangko tgia ya kat e, ko ngor mia khenam ma mmok ngang nguk te, E Nut tmi en ka serppak ngang A Mhel To Nkong Man Ma Volkha to dok, dok kam lol o mia ngaro kerkeknen patgiang ngaiting mo mmie he kikiangae mang ngar hak.” Thavaeng ngar tok, to her gia reng a mhel to ka vok tgus tyor te, ¹¹“Yu! Kua havaeng in te, hop, tolpum ila hep he kngae ngok mrek.” ¹²A gi hi to e Jesus tgia re tok, a mhel to endo ther gia hop ksir, to kokol ka hep to gi mrua ngongae kmottek ko pum o mia ngaro kerok ko arhe. He ekam tok, o mia ngat vokom ka ngaeha to tok to ngat gia nganga kim e Jesus he kguyaya pum E Nut kam mo havaeng ngar te, “A ngaeha to enda a serpgar ngom lua vokong tennik kam ngae kais mang tete. Enda ngota vokong tete yek.”

E Yesus Ta Vaeng E Livai
(Mt 9.9-13; Lk 5.27-32)

¹³To e Jesus ta ngae ko vanam a ngaenker ka ngaiting va a mumu ta veet ngok kim to e Jesus tkaelha kam patter mar. ¹⁴Tpatter mar knop, to hera parem a mhe to endo to kta ngae va kvokom a mhel langto ka munik e Livai, endo e Alpias khal ko tkorsang kun mniam o kermia ruk ngam kaelha klol o takis nga rek to kmelpas mniam. To e Jesus tpis ko kim to kreng te, “Ngiak kaikkiem dok!” To e Livai ther gia hop to kaikkiem.

¹⁵Kam ngae, to mniam a kolkha langto e Livai tkaeharom a ngorsang langto ngang e Jesus ko mniam ka rek. Va o kermia ruk ngam kaelha klol o takis va o Yuda akuruk, endruk ngalmialao ngma keyang ngar ko ngam lo sim kut kaikkiem o Yuda ngaro keknen ngat pis kaum kaemik ko kim e Jesus mar ekam ko kavurgem mniam mar ngat kaikkiem e Jesus kat. ¹⁶To o pattermia kmo pos ruk o Parisiau ngata vokom e Jesus ko tkaum kaemik kar mar tok, to ngat kaelha kam kirhek pum e Jesus kam palsie kim kalngunes te, “Ngola, kman ko endo tkaemik ko kim o kermia ruk ngam kaelha klol o takis kar o Yuda akuruk, endruk ngalmialao ngma keyang ngar ko ngam lo sim kut kaikkiem mor o Yuda nguardo keknen?”

¹⁷E Jesus ta ngnek tok, to le ktootkinre kmoripang ngar te, “A mhel to nam kaeharom o mia nma vle mang endruk ngakro yor kmeharom mar, nang nam lua vle mang endruk ngat gia ya e. He gi enang tok kat, ko her pis mo mmie kam vle ngang endruk o mia ngma keyang ngar pum ngaro kerkeknen, he nang dok kam tger mar kmitgung ngar. Nang klua pis kam vle ngang endruk ngam mrua kansgum mar mruo kam pat mang ngar mruo te, ngaro keknen ngat ho mi kut sir hak ko pum E Nut kalo keik e.”

O Parisiau Ngata Mngan Pum E Yesus Karo Keknen Ruk O Gunngae
(Mt 9.14-17; Lk 5.33-39)

¹⁸ Mnam o kolkhek ruk endruk, e Yoanes kalngunes va o Parisiau ngma paal kmo ol ko pum E Nut kalo keik. To mnam a kolkha langto, o mia akuruk ngat pis ko kim e Yesus he ka mngan pum mang o Yuda ngaro keknen mruo ruk nkong ngar tennik te, “Ngua keknen to kam paal kmo ol ko pum E Nut kalo keik nkong ngolmialao ruk tennik, nang nong lgunngae nkong ngar tete e. He ekam tok, kman ko e Yoanes kalngunes va a valngan to mkor o Parisiau ngam kaikkiem ngua keknen to nkong ngar tennik, endo kam paal kmo ol ko pum E Nut kalo keik he smia ngarkie ngang, vanang itlengunes ngam kle kaeharom a keknen to a gunngar ta yek, endo kam venu mang a ngaemik?”

¹⁹ Va e Yesus ta tootkinre ngang ngar kam re lkoon mang ka yor mruo te, “Mnam a kolkha msim ko a mhel tkaenkim ktavlor, klenar ngat lo kais kam palam o ol e. Ho mi kut nop hak! Ko a mhel to endo ta vle ko kmar vop. ²⁰ Vanang o kolkhek ruk kam tivik mniam mar ngrok ge. Ngara pis koknaik ko ngaka vret a mhel to endo mkor kalngunes, yek endo yek, kalngunes ngaka mrung he ktivgim ko yek.”

²¹ Ta tootkinre tok knop, to kle kaenspagam ka papat to endo mang karo keknen mruo kat te, “Mu vokom na, a mhel nam lua vatvat a yet ka kae to a gunngar engnang endo ka sgan e, matok naka plum he ka kae to a gunngar nera vui to kaursie to kait endo ka sgan to kle ho gi kael a pammok a ho lautar hak kir kim endo tesgun ko ta vatvat. ²² Ii, va ngam lo kaeharom a ye to a vaen, endo a gunngar kun mniam ka merrip ko ka sgan kat e, ko a merrip to ka sgan ta karrai he nera khir. Ngam lo kaeharom tok, ekam ko a vaen ka serpkak, ko nak hop kun mniam ka merrip ner kaur mang ka merrip to endo ka sgan he khalker. To a vaen nera gussuk. He enang tok, a vaen kar ka merrip tgus nginera kernonho ka ngmeang tgus tok. Nove, o mia ngam lo kaeharom tok e. Ngam kle va kaeharom a vaen to a gunngar kun mniam ka merrip to a gunngar ko tgi kongeik.”

A Mhel To Nkong Man Ma Volkha Ta Nho Mang A Sabat
(Mt 12.1-8; Lk 6.1-5)

²³ Tie ma Sabat langto, e Yesus kar kalngunes ngat kaikkiem a ngaelaut to ta kser a loot langto orom o sigla va kalngunes ngat kaelha kolonget o sigla he kaemik. ²⁴ Ngat kaemik kngae, to o Parisiau akuruk ngat pis kpalsie kim e Yesus te, “Ai! Vokom ilengunes na, kman ko ngta kpoot mang ngua pos to kam paal ma Sabat?”

²⁵ Va e Yesus tkoripang ngar te, “Nok pathe mut lo him a ngothoi to mang e Devit kar klenar ko ngta vang, nang nong o ol ngang ngar

kmemik vor? ²⁶Ko a ngothoi to endo ta havae mang e Devit, ko tennik mniam o kolkhek ruk o pris ruk laol ngaldaip to e Abiatar ta vle vop, e Devit tvaik ogun mniam E Nut ka maksien ka rek Ka Taban To A Totur he klol o bret ruk o Yuda ngam kaelik ko kim E Nut to kle kaisis kim kalngunes ormar va mar tgus ngat kaum kaemik mniam mar. Ngat si eharom tok, vanangko nguaro pos ngat havae te, gi o pris ruk laol tuk ngat gi kais kmemik mniam o bret ruk endruk, nang o gi wrong mia, nove!

²⁷Enang tok, ta khenam te, E Nut tel a kolkha to a Sabat ngang o mia, mar kam nho mang, nang tlo el a Sabat kam nho mang o mia e. ²⁸He ekam tok, si a kolkha to a Sabat, va her A Mhel To Nkong Man Ma Volkha to arhe nma nho mang a kolkha to endo kat.”

**O Parisiau Ngat Sim Ktua Keketar E Yesus Kam Mon En Orom A
Kerkeknen Tang
(Mt 12.9-14; Lk 6.6-11)**

3 ¹Tie ma Sabat langto yok vat, e Yesus ta kta vaik kun mniam o Yuda ngarta rek langto kam rere mniam, nang a mhel langto ka ktie tyor ta vle ko kat. ²Vanang o Parisiau ngat sim ktua keketar e Yesus ko ngta papat kam mon orom a kerkeknen tang enangthe naka kpoot mang a pos to ma Sabat kmeharom a mhel to endo. ³To e Yesus ta reng a mhel to ka ktie tyor te, “Hop, aol ngte na.”

⁴Thavae tok, to her kle ka mnganang o mia te, “Kmikkiem mor o Yuda nguaro pos, ani ngaeha to ta sir kmeharom ma Sabat, endo kmennegiang a mhel, en kam yor, i o endo kam turang en kmeharom kam ya?” Ta mnganang ngar tok, vanangko ngat lo koripang e. Ngat gia korsang kvongnek.

⁵To kalo keik ngint kaem o mia tgus ko ka vrek te sei kam kiin hak ngang ngar. Ii, tkaesik tok va kle ka mrung ngar kat vgum ko ngaro papat ngat mi ktua kaendel pum E Nut karo rhek kngam mar ge. To thera havaeng a mhel to te, “Yin he, tuom ila ktie na.” Va a mhel to endo ta tuom ka ktie va te, ka ktie ther gi ya hak ngatngae. ⁶O Parisiau ngat vokom tok, to kottek kngae klapsa kam kaum kar a valngan to mkor e Herot kmelha kam papat mang a ngaelaut tang, mar kam lgem o rhek mang, he nang mar kmim kngam a yoror.

E Yesus Tkaeharom O Mia Nglakhor Ko Pa Ngaenker

⁷⁻⁸To e Yesus kar kalngunes ngat gi vur kaol kparem a rengmat to, he kngae ko vanam a ngaenker to e Galili ka vle. Va a mumu alautar orom o mia ruk ko mGalili ngat hohop he kveet kmikkiem kat. Va o mia kavurgem ngata ngnek mang ko nam kaeharom o mia vang ko tok, to ngat kotootpum mar ko mYerusalem km pis ngok kim e Yesus. Va si a mhe to e Yudea karo rengmat tgus, va o mia ngat kotootpum mar ko mniam

mar kam pis gok kim. Va akuruk ngat kotootpum mar ko mIdumea va mnam o mheter ruk mnam a ye to e Yodan ka ngaiting tigut va mnam o mheter ruk ko rkieng alo mhe ruk e Taira va e Saidon kat. ⁹⁻¹⁰To o yaylor vang ruk mnam mar ngta mo pet kmursie ngok kim e Yesus kmehang ko en nam kaeharom o mia kavurgem pum ngaro yor. Ngama sovet kmotarhik ngok kim kais ko ngam re kam gia klung mnam hak. He ekam tok, e Yesus ta reng kalngunes kam kol a langail tang, nang en kam sir kun mnam, matok ngara karkar mang. ¹¹Vanang o kool ruk ngat vizing o mia, ngama vokom e Yesus to le gia tubulkek ku penharom he kvui te, “Her E Nut Khal to yin arhe.” ¹²Vanangko e Yesus tkaen a re lserppak ngang ngar kam hagam mar kam lua polger o rhek mang en enang tok.

**E Yesus Ta Mon Karo Aposel Ruk Loktieck Hori Orom Alomin
(Mt 10.1-4; Lk 6.12-16)**

¹³To koknaik e Yesus ta grap ngogouon kim ke vul langto ka ngaiting. Ko tok ta vaeng o mia ruk en mruo tmur ktua svil mang ngar. To ngat ngan vgum he kaikkiem. ¹⁴⁻¹⁵He enang tok, e Yesus ta plam a valngan to a gunngar ormar ruk loktieck hori orom alomin he kilegem mar te, “O Aposel.” Ta plam mar tok, mar kmikkiem va en kam meng ngar kam polger karo rhek ngang o mia mang E Nut. Va tkaenserpgam mar kmus kar o kool kam kerer mar orom ka serppak mruo. ¹⁶Mar ruk endri: e Saimon, endo e Yesus ta kilegem te, e Pita, ¹⁷e Sebedi klo hal ruk e Yems kar knopia e Yoanes, ennginduk e Yesus ta kilegem min tgus orom o Hibru nga re mruo te, e Boanerges. Vanang kam hortgem ngina munik to endo ka pun ta vle te, “Alo Krovger.” ¹⁸Va e Andru, e Pilip, e Bartalomius, e Matyu, e Tomas, e Yems to e Alpias khal, e Tadius, va e Saimon to ta vle mnam a valngan to mkor o Selot, endruk ngma mon mar kat te, o Kananea. ¹⁹Va e Yudas to nkong mIskariot kat, endo thortgi mang e Yesus kmel ko maktiegom o kermia.

**O Yuda Ngat Mon E Seten Orom E Yesus He Kerrereng
E Nunu A Totur Orom Ngaro Rhek Ruk Tok**

*E Yesus Kar E Beelsebul
(Mt 12.22-32; Lk 11.14-23; 12.10)*

²⁰To e Yesus ther kat kaeknik ngok mrek va o mia vang ngat sovet kam gun kam mopatap ngok kim, mar kam ngae kais ko en ta svil kmemik va tlo ktuis kat e. ²¹To e Yesus ka valngan msim ngata ngnek mang tok, to kle khavae mang te, “Ka mrang tpis kim.” Ngat havae tok, to ngta hop he kngae kam kapom, mar kam nho mang.

²²Ngata ngae vop, va o pattermia kmo pos ruk ngat otootpum mar kuon mYerusalem ngata vle ko tok mGalili kat. Ngat re te, “O-o, o kool ngalaip to e

Beelsebul ka serppak ta ti arhe a mhel to enda nma kemmeng kam paeim o mia he kerer karo valngneik mruo ruk o kool orom ti.”

²³Ngat re tok, to e Jesus ta vaeng ngar kmaol ngok kim to le ktootkinre ngang ngar mang en mruo te, “Nngia orom e Seten, ko en tis kam kerer karo valngneik mruo kat gi? O-o, nove ko ²⁴⁻²⁵enangthe a rengmat i o a valngan tang ko a serpgar npa mommenik he mur kaus kar mar mruo va kmopet kmar mruo, va a rengmat i o valngan to endo ka serppak tlo kais kam vle lhok e! ²⁶E Seten ta vle gi enang tok kat, ko enangthe e Seten npa hop he kaus kar karo valngneik mruo ruk o kool he kmommen mar va ka serppak tlo kais kam vle lhok kat e. Nove, ka serppak ketasuo kam nop he. ²⁷Vanang dok, kua vle enang ti te, enangthe a mhel to a serpgar nap kaelel mo kim mang he ktoot mang ka rek va kakro tgoluk, va nong a mhel tang tkais kam pis kam vretik mkor e. Vanang enangthe kaela ngang ko yok ko ka serppak tho laut kir kim endo a serpgar nap pis kaussiem a mhel to a serpgar, to endo yek, kaela to endo arhe tmi kut kais hak kam veret kakro tgoluk mkor. ²⁸Ii, he ekam tok, kua havaeng nguk te, E Nut ner mia lol o mia ngaro kerkeknen tgus patgiang ngaiting he kikiangae mang ngar hak. Va si ngaro kerkeknen ruk kam kerrereng E Nut kat va nera lol patgiang ngaiting he kikiangae mang ngar. ²⁹Vanangko ner ho lo kais hak kam lol ngaro kerkeknen ruk kam kerrereng E Nunu A Totur patgiang ngaiting he kikiangae mang ngar hak e. Ko E Nut ner mia mon mar orom ngaro kerkeknen ruk endruk, he ngaro kerkeknen nga vnek nera vle ngnik ngnik kuo mang ngar hak.”

³⁰E Jesus tkoripang ngar tok, ekam ko ngata kerrereng en te, “Nma kemmeng a koot langto ka serppak kam paeim o mia orom.”

Endruk E Jesus Ta Kvam Mar Te, Ka Valngan Mruo Ormar (Mt 12.46-50; Lk 8.19-21)

³¹⁻³²To e Jesus knan kar kaornoipeik ngat kaol te, kam pis mang. Ngat pis ksir ku mnok to kmeng o mia kam vaik kun ma rek kam vaeng. To langto mnam a mumu to ngat korosang kairkleim e Jesus kun mnam a rek to endo, thavaeng te, “Vae, inan kar ingornoipeik [va ingoretmeik] ngta sir ku mnok he ka mngan mang in.”

³³Va e Jesus tkoripang te, “Erie mar ruk koornek va koornoipeik ormar e?”

³⁴Ta mngan tok, to kalo keik ngint kaem o mia ruk ngat korosang kairkleim ko tok, to ta kle krere va ka kvam mar te, “Mu vokom endri na, ko her mar ri arhe koornek va koornoipeik ha. ³⁵Ii, ngta vle tok, ko erieto nam kaikkiem E Titou ka svil, her en lsir arhe nguaka kvam te, konopia va koetem va konan orom.”

A Koka To Mang A Mhel To Ta Ngamngam A Ho Karo Khek (Mt 13.1-9; Lk 8.4-8)

4 ¹To e Jesus ta kta ngae kat he kaelha kam patter o mia ko vanam a ngaenker ka ngaiting. Va a mumu alautar ta sovet kam moper kam

gun kairkleim kais ko ta ring ngaekam ekam mniam a langail langto kuo kia ngaenker. To tkar kun mniam he korsang ko tok, nang ka mnang o mia tgus ko ngata sisir ko vanam a ngaenker ogun paat. ²Ko tok ta patter mar mang o tgoluk kavurgem ko tgia koka ngang ngar. Ta koka ngang ngar orom karo rhek ruk endri te, ³“Mu smia ngnek na! Mniam a kolkha langto a mhel tkaelha kngamingam a ho karo khek kun mniam ka loot. ⁴Ta ngamngam mar kngae, va akuruk ngata vuvuut ko ekam a ngaelaut. To o iningol ruk kuon mail ngat pis kokorong ngar he krum kim mar hak. ⁵Va akuruk ngta vuvuut kun pgegom o kreko a vur mmie ge. To ngta mamarer kam pagis ekam ko a mmie ta rara. ⁶Ngata pagis ka vle gi nong ke laut e, ekam ko ngata vizing a kolkha ka koppetmok to a koppetmok to endo tgi ktm mar to ngat her gi vuvui he kmamarer kam vuvuut ekam ko ngaro kmen ngata puung kim o kreko. ⁷Va akuruk ngta vuvuut kun pgegom o ngaergot ruk o kosmur. To o kosmur ngta lalaut, hop kim mar kvuvuem mar to her gia komor kmar. He enang tok, a ho karo khek ruk endruk ngat lo kaehi e. ⁸Vanang akuruk ngta vuvuut ko mniam a mmie to a yar, to kpupus he klalaut to kaehi. Akuruk mniam mar ngakro maineik ruk ngam kaehi ngta ngamngam va ngta ngamngam ge, va akuruk vat mniam mar ngakro maineik ruk ngam kaehi ngam vrua ngamngam kais tok va akuruk vat mniam mar ngakro maineik ruk ngam kaehi ngam vrua ngamngam kat ge.”

⁹E Jesus ta koka tok knop, to krel te, “Muk ruk muta vongnek kim dok, mgua sim kael rela ekam kuar rhek ri kam sim kut kaikkiem mar.”

O Koka Nga Ngaeha Ka Pun (Mt 13.10-17; Lk 8.9-10)

¹⁰To koknaik, ko e Jesus te ka vle en tuk, o aposel va kalngunes ruk ngata ngan karo rhek ko ta koka ormar, ngata mnganang e Jesus kam halger o rhek ruk mang te, kman ko nma koka ngang o mia. ¹¹Va ta reng ngar te, “Tennik kam ngae kais mang tete, E Nut nama tuygom karo papat ruk mang ka tavgo ko kim o mia. Vanangko tete, ta polger o rhek mang ngang nguk kam khenam ka tavgo to endo ma mmok, ko ther mi pis ko kim mularo kerok, he ta komor muk he. Va her muk ruk arhe mut mia vokom kam mnor mang. Vanang o mia ruk E Nut ka tavgo tlo komor mar vop, her endruk kom gia koka ngang ngar arhe. ¹²Kom gia koka ngang ngar enang tok, he nang a propet langto karo rhek kmel mit ko ta ktar kpavap mang o mia ruk endruk kam havae mang ngar te,

‘Ngam gia vokom E Nut ka tavgo orom o gi pkor, he kaennegiang.

Va ngam sia ngnek ka ngnek mang kat, vanang kle gi kael rela petgim ge. Vanangko enangthe ngap lo kael rela petgim tok, va ngap kaitgung ngaro kerkeknen, va E Nut napa lol patgiang ngaiting he kikiangae mang ngar hak.’ ”

E Yesus Ta Halger A Koka To Mang A Ho Karo Khek Ka Pun
(Mt 13.18-23; Lk 8.11-15)

¹³To e Yesus tle kreng kalngunes te, “Po, te mut lua mmok mang a koka to enda kat gi? Enangthe mgua lua mmok mang a koka ta, va mguera mmok mang o koka akuruk nngia e? ¹⁴A mhel to ta ngamngam a ho karokhek ta vle enang a mhel to nma polger E Nut karorhek mang ka tavgo ngang o mia. ¹⁵Va o mia ruk ngma ngan o rhekaruk mang E Nut ka tavgo, vanang lo sim ktua ngangam kmar mang ngar, ngta vle enang a ho karokhek ruk ngta vuvuut ko ekam a ngaelaut. Ko ngma ngan o rhekaruk mang E Nut ka tavgo, vanang e Seten nam her gi kat pis ge, gi neveret o rhekaruk E Nut ta ktar kngam mar ngkun mniam ngaro vurkul petgim mar kam rum kim mar hak. ¹⁶Va o mia ruk ngma ngan E Nut karorhek he kmarer kam kpom mar kun mniam ngaro vurkul he ksirei mang ngar va kngatkal mang ngar ngatngae, endri ngta vle enang a ho karokhek ruk ngta vuut kun pgegom o gi krek. ¹⁷Ngta vle tok, ekam ko E Nut karorhek ngatgia puung ngaro vurkul, ko ngam gi vur matnge vgum o vnek nong ke laut he kor mniam mar mang E Nut ge, orom ngaro gi pkor. Vanangko mniam o kolkhek ruk o mia ri ngta vaging a koppetmok vgum E Nut karorhek ruk endruk ko ngarlenar ngata kol a regesal mang ngar, a koppetmok to endonam gi ktim mar he khos kim ngaro papat ruk kmor mniam mar mang E Nut to o papat ruk endruk ngam her gi kat nop hak kun mniam mar. ¹⁸⁻¹⁹Vanang o mia akuruk yok ngama ngan E Nut karorhek. Endri ngta vle enang a ho karokhek ruk ngta vuut kun pgegom o ngaergot ruk o kosmur vat. Ngta vle tok, ekam ko ngma ngan E Nut karorhek, vanang o papat ruk mang nga ngorsang to mommie ngaro vnek va o papat ruk kam lol o vu krek ngma vaik kun mniam ngaro vurkul kat he ka kpom mar. To o papat ri ngma hop kim E Nut karorhek kun mniam ngaro vurkul he kvuvuem mar to her gi komor mar, he E Nut karorhek ruk endruk ngam lo kaehi kun mniam mar e. ²⁰Vanang o mia ruk ngma ngan E Nut karorhek he sim ngangam kmar ka kpom mar lserppak kun mniam ngaro vurkul ngta vle enang a ho karokhek ruk ngta vuut ko mniam a mmie to a yar. Ngta vle tok, ekam ko E Nut karorhek tgus ngam mi kut kael mit kun mniam mar. He akuruk mniam mar ngaro maineik ruk ngam kaehi ngta ngamngam va ngta ngamngam ge. Va akuruk vat mniam mar ngakro maineik ruk ngam kaehi ngam vrua ngamngam kais tok. Va akuruk vat mniam mar ngakro maineik ruk ngam kaehi ngam vrua ngamngam kat ge.”

E Yesus Ta Koka Mang E Nut Ka Tavgo To Nma Komor O Mia

A Koka To Mang A Paei To Nma Vle Kam Mmok Kim O Mia
(Lk 8.16-18)

²¹To e Yesus ta kta koka kat mang o papat ruk mkor E Nut ka tavgo to o mia ngma vaik ku meorom te, “Mum lua giem a paei he tuvgom ku meorom

a plo e, i o ku meorom a hep kat e. Nove! Mum kle va kaendavloum a rek ko pgeik msim he kgiem, en kam mmok kim o mia ngola? ²²He kmikkiem enang tok, o papat ruk mang E Nut ka tavgo ko ngta tvok kim o mia tennik, E Nut ta kaendavloum a mmie enang tok kat he ka khenam mar ma mmok tete kat he. Ii, tesgun E Nut ta tokim o papat ruk endruk mang ka tavgo kim o mia, vanang tete ta kle khalgerik he kaelik ma mmok he.” ²³E Yesus ta koka tok knop to le kre te, “Muk ruk muta vongnek kim dok, mgua sim kael rela ekam kuar rhek ri kam sim kut kaikkiem mar.”

²⁴Tre tok, to ta trong orom karo rhek ruk endri te, “Mgua sim kor mniam muk mang kuar rhek ruk muta ngannik ko E Nut ner kaekon kmen a mmok ngang nguk kmis mang mularo svil ruk muk mruo mut kor mniam muk mang ngar kais tok. Va ner kle ho gia kaen a mmok ngang nguk malpgem a mmok to endo gi. ²⁵Mare! E Nut ner kaekon kmen a mmok ngang nguk tok, ekam ko endo ta kpom E Nut karo rhek he ngat kael mit kun mniam, E Nut ner kle ho gia sovet kam kat kaen karo rhek akuruk mniam kat. Vanang endo tlo smia kpom E Nut ke re ke vur vgon ngang ko ke sie, he en kmel mit kun mniam, va si ke re ke vur vgon ko ta kpom kun mniam, va E Nut ner kle ho gia vret mkor kpetgim hak.”

A Koka To Mang A Ho Karo Khek Ruk Ngat Mur Laut Ngpang Ngar Mruo

²⁶To e Yesus ta kta koka kat te, “A mhel langto tngamngam a ho karo khek kun mniam ka loot knop to kngae. ²⁷Nam konit mo segain va khop mo ruteik tgus nang a ho karo khek ngat mur kokohir he kpupus ngpang ngar mruo ko he. Va a mhel to enda tlua paptang ngar ko ngat kokohir he kpupus kngae nngia enang tok e. ²⁸Tlua paptang tok, ko a mmie mruo nam mur kaenserpgam a ho karo khek he ngta ktar kam papaam ngo kerok. To koknaik a loot ther kael hingrip to ho koknaik hak a loot tho gia tettek he. ²⁹A loot na tettek knop, to a mmie kteit na mamarer kngae kam lluol mniam ko o tgoluk ngat hera volvol he. Ii, E Nut ka tavgo to nma komor o mia ta vle her gi enang tok kat.”

A Koka To Mang A Ho To A Mastat Ka Khek To Ke Ho Mi Laut Hak (Mt 13.31-32, 34-35; Lk 13.18-19)

³⁰To e Yesus tkat koka kat te, “E Nut ka tavgo ta vle nngia? Ani koka to tkais he dok kam keknен orom mang E Nut ka tavgo? ³¹E Nut ka tavgo ta vle enang ko a mhel ta kol a ho to a mastat ka khek ko ke ho mi laut hak mang o tgoluk tgus ngo khek ruk ngma kap kun mo luteik. ³²Ta pus he klaut kngae kael en a ho orom karo khator ruk laol he khop kir kim klenar tgus kun mniam a loot kais mang o iningol ruk kuo kia gan kmaol kpis kngam ngainirik ko vgum ka ngoumi.”

³³⁻³⁴E Yesus tpatter mar kun ma langail tok, kmikkiem ngaro papat ko ngate ktua kais tok. Nam lua rere lsir ngang ngar kmel karo rhek ngaro

pneik ma mmok kam patter mar tok e. Nove, nam kle gia polger E Nut karo rhek orom o gi koka kavurgem tuk enang endruk. Vanang koknaik ko gi kalngunes tuk, nam kle khalger ngaro pneik tgus ma mmok ngang ngar.

E Yesus Ta Kser A Kalivurvur Ko Tkaenpgam A Ngaenker
(Mt 8.23-27; Lk 8.22-25)

35-36 Tie mavlemas mniam a kolkha to endo, e Yesus tkorsang kun ma langail vop he kreng kalngunes te, “Mu somor he, ngor poe kenker a ngaenker ta ogut pa ngaiting tigut vat.” To ngata parem a mumu ko pa ngaenker ogun paat he kar mniam a langail to e Yesus tkorsang kun mniam he ngta poe orom. Va o mia akuruk ngata poe ka knaeck orom ngartaro laktok kat kmikkiem mar. ³⁷Ngta poe kngae, va vgum a kalivurvur ko tpis he kaenpgam a ngaenker. Va o vlung ngta sovet kam klung engnang a langail he karir nkun mniam va ta re kam vallum hak. ³⁸Nangko e Yesus tonit kuo ma klui kun ma langail ka plangail, nang lua paptang. To kalngunes ngata votgem he ka mnganang te, “Pattermia, yi lua papat mang ngor gi, ko ngot re kam vvuo?”

³⁹To e Yesus thop to her gia re lserppak kam kser a ngausgi to khagam o vlung kam re te, “Rurruom he vur vle!” Tgia re tok, to a kalivurvur ther mi nop hak va o vlung ngat ngae her gi rurruom ngatngae.

40-41 Kalngunes ngata vokom tok, to ngaro nunu ngat ho mi kut parem ngaro mit hak kim, he ngta mo mnganang ngar mruo te, “Hai-e! Ani mhel langta ti e, ko si a ngausgi va a ngaenker va nginta ngan vgum kat?” To e Yesus thera kner mar te, “Kman ko muta gor? Mutlo kor mniam muk mang dok vop?”

E Yesus Ta Kerer A Koot Kun Mniam A Mhel Langto
(Mt 8.28-34; Lk 8.26-39)

5 ¹To e Yesus mar ngata poe to kngae kpis ko mniam a mhe to mkor lGeresa ogut pa ngaenker ka ngaiting tigut. ²Va e Yesus ta prik ngok paat, va vgum a mhel to o kool ruk nong lyar ngtim he kviging ko tpis mang ko tottek kun mniam o nhotor ruk mkor o yoror. ³A mhel to endo nam her gi konit ko mniam o nhotor ruk mkor o yoror ko tok, ko nong a mhel tang ka serppak tkat kais mang kam kta kaussiem kat e. Va si kmussiem orom o sen va o sen ngat lo is mang kat e. ⁴Ko tesgun o mia ngam kaussiem kalo ktieck va kalo nhar orom o sen va en nam gi kat kaur mang o sen kokohirik gi he kngorpok kat. He enang tok, nong a mhel tang ka serppak tkais kam hagam e. ⁵Mo segain va mo kolkhek tgus nma punpa ko mniam o nhotor ruk mkor o yoror va ko po turvek he mur kaerergat orom o mandrap ngo kaenatok.

⁶Tvokom e Yesus ko ta sir vur hagenmok mang to her gia sap pis ksir ko kim to ktubulkek ku penharom.

7-9 To e Yesus ta ktar ka mnganang te, “Ila munik erieto?”

Va a koot langto kun mniam tkoripang te, “Nguia munik ‘e

Ngaomevek’ ko mor o kool ruk a ngaomevek to orom mor ngot viving a mhel to enda.”

E Yesus ta ngnek tok, to thera reng a koot to endo te, “Mu ottek kun mniam a mhel to enda.”

Ngta ngnek ko e Yesus ta reng ngar tok, to a koot ta rere klik hak he kreng e Yesus te, “Yesus, Yin E Nut To Tho Mi Laut Hak Khal to yin. He mor o kool ngot lua mtom yin kam pis ktoop kmor mo e. Ngot kaurur kmin te, yin kmel ila tnangal ngang ngor ko pum E Nut kalo keik te, yin kmor kmen a kapnes ngang ngor he kering ngor.”

10-13 Vanang ko tok rkieng ngar, o morek nga murgun ngta hohek kuon kia hogun ko rkieng a veik ka ngaiting. Va a ngaenker ta vle ku pa veik ka pun. To o kool tgus ngat le kaum kaurur kim e Yesus te, “Ngior kam kerer mor ngok po turvek petgim a mmie ka mhe to enda e, vanang ngiak kle kmeng ngor kam viving o morek ruk endruk ho.” Ngata re tok, to e Yesus ta ngatkal ormar. To o kool ngat her kottek mniam a mhel to endo, nang kle kviving o morek. Ngata viving ngar, va vgum o morek tgus ruk ngat is mang te, 2,000 ko ngat her gia kolaspa kam sap ngpirik ekam a veik kam ngae kpis kvuvvuo kun mniam a ngaenker kyayor tgus ngmeang.

14 To o toot kmo morek ngta ngorpok ngok mniam a rengmat ka pun va o rengmat tgus ruk ko rkieng a mhe to endo, he kvaik kottek mniam mar kam havae kngae mang he. To o mia ngta veet kam vokong anito tpis. 15 Ngta pis ko kim e Yesus va vokom a mhel to a ngaomevek to orom o kool ngat viving tesgun ko tsim kut egen he korsang ko tmi ya he, va tsim kta papat kat. Ngat vokom ka mnor mang, to ngate ksei kam gor hak. 16 To o toot kmo morek, endruk ngat mi vokom ko e Yesus ta kerer o kool kun mniam a mhel to endo, ngat kaelha kam havaeng o mia mang e Yesus ko teharom tok va si mang o morek kat ko ngat yaylor tgus tok. 17 To o mia ngat kaelha kmurur kim e Yesus, en kmehenenok petgim mar ko mniam ngarta mmie ka mhe to endo.

18 To e Yesus ta ngnek mkor mar va re kar kun ma langail te, en kam hera ngae, va a mhel to endo e Yesus teharom pum o kool, tkaurur kim te, en kmikkiem, 19 vanang e Yesus tlua svil e. Thagam te, “Ngiak kaeknik ngok mniam ila rengmat he khavaeng ilenar mang E Nut ko ta mrung yin he ka srim yin pum o kool ruk endruk.” 20 To a mhel to endo ta vaik kottek kun mniam o rengmat ruk ngma mon mar te, O Rengmat Ruk Loktiek he kaelha khavae mang o reha laol tgus ruk e Yesus teharom mar ngang. Va o mia ruk ngta ngan karo rhek ngat sei kam sor kim mar.

**E Yesus Ta Hover E Yairus Ka Kvek Ko Tyor Va Kaeharom A Vlom
Langto Pum Ka Yor To A Vaeip
(Mt 9.18-26; Lk 8.40-56)**

²¹To e Yesus mar ngata kta poe kmeknik ngkun kut pa ngaenker ka ngaiting tigut kat, to a mumu alautar ngata kta kaum ko kim kairkleim ko tok pa ngaenker ogun paat kat. ²²Ko tok, a taip langto ka munik e Yairus ta vle kat. En nma nho mang o Yuda ngarta rek langto kam rere mniam. Ta yokong e Yesus to kaol ngok kim ktubulkek ku penharom ²³he kaurur kim te, “O-kola-o, ko kvek te sei kam yaylor he kre kam yor he. He aol ikkiem dok ngogu mrek he ehang, en kam kta ya he ka vle kat.” ²⁴To e Yesus ta ngan vgum to her kaikkiem. Va a mumu alautar ngata sovet kam puung mang he kaikkiem kat.

²⁵Vanang a vlom to orom ka yor to a vaeip ta vle ko tok kun mniam a mumu to kat. Ta vle orom ka yor to endo kais mang o pnes loktieck hori orom alomin. ²⁶Ta vle vgum o mia kavurgem ko ngat si kaegom kmeharom en pum ka yor to endo, vanang ngat lo is e. Va en tkoham karo krek tgus mang ngar va te lua ya e. Nove, ka yor ta kle va ho kserppak mang mo kolkhek tgus. ²⁷⁻²⁸To a vlom to endo tre gia ngnek mang e Yesus to hera pis gia vaik mniam a mumu ekam ko ta pat kun mniam en mruo te, “Enangthe ngua re gi vur kaehang si ka yet ke gi gu mko gi, va ngor gia ya ge!” To ther gia knaek ekam e Yesus kpis to tkaehang. ²⁹A gi hi to tkaehang ka yet, va te, ka yor ther gi nop ngatngae! Va ta mrua ngan ka vok kat ko ther ho ya hak, ko ka yor ther gi nop ngatngae.

³⁰Va a gi hi to a vlom ta tkaehang e Yesus karo it, e Yesus ta ngan ka vok kat ko ka serppak to nam kaeharom o mia orom tparem. Ta ngan tok, to hera hortgi ngok kim a mumu he ka mnganang ngar te, “Ngola, erieto tehang kuaro it?”

³¹To kalngunes ngat koripang te, “Ya vokom ko la mhel vang ta te vua moper ngte kim in, va ya mngan kam mngan gi te, erieto tehang in?”

³²Va tar e Yesus ta petela vop kam ring endo tehang, ³³to a vlom to endo ther mrua ngan ka vok mruo enang tok, to kle kaelha kam gor va kakhi kim e Yesus. To ther kaol kpis ktubulkek ku penharom to khavaeng mang en mruo lmien te, en lsir arhe endo tehang tok. ³⁴To e Yesus thera reng te, “Kolkheng, yi her ya he, ekam ko ya kor mniam yin mang dok. He ekam tok, ngiak ngae he ka vle orom a vrek longeik ko ila vok ther ho ya he.”

³⁵E Yesus ta rere vop va o mia akuruk ngat ottek ko mniam a taip to e Yairus ka rek he kpis ko kim e Yairus. Ngat pis her gia havaeng e Yairus te, “O-o, Yairus, ikvek tyor he, ngior kam kat kaelreha ngang a pattermia ta kat e, ngia her gi kor ko he.”

³⁶Vanangko e Yesus ther kaennegiang ngaro rhek ruk endruk, nang le ktua reng e Yairus ge te, “Ngiak or kam gor e, ngia kle va gi kut kor mnam yin mang dok ge.”

³⁷To e Yesus tkaikkiem e Yairus he lo kta tting orom a mhel tang kat, en kmikkiem klapsa kngae e, gi e Pita va e Yems kar knopia e Yoanes. ³⁸Ngat ngae to kpis ko mnam e Yairus ka rek, va e Yesus ta vokom a mumu ko ngat kael a halum ko ngat kaee kuon mail he mur kaim mar mruo mang a kalyie to endo. ³⁹Ta pis kvaik to kreng ngar te, “Kman ko mut ngae vu kaee enang tok? Ko a kalyie to enda tlua vle enang a mi yor e. Tgia vle enang a kalyie to tgi onit ko ner kta hop kat.” ⁴⁰Ta re tok, va o mia ngat le gia kol a klel orom.

To e Yesus thavaeng o mia kmottek ngogu mnok, nang hera vaeng a vлом sie kteit kar knan va kalngunes mruo ruk korlotge, to ngat hera vavaik ngok mnam a taban to ngat ngangater a yor he ta kru mnam. ⁴¹Tpis to hera kpom a yor ka ktieck he khover va kreng orom ka re mruo te, “Talita koum.” A re ta ka pun ta vle te, “Ke vлом sie, kua reng in te, hop he.” ⁴²Ta re tok, to a vлом sie to endo ther gia hop ngatngae to kngongae. To mar ruk ngta vle ko tok ngta vokom a ngaeha to endo, to her ngae gia nganga kim. (Ko a vлом sie to enda karo pnes ngat is te, aktiek hori orom alomin.) ⁴³Vanangko e Yesus tle ktua sopong ngar lserppak hak kam hagam mar kam lua havaeng a mhel tang mang ka ngaeha to endo. To thera reng ngar kam klang a vлом to endo mlol, en kmemik.

I Nasaret Ngat Likim E Yesus

(Mt 13.53-58; Lk 4.16-30)

6 ¹E Yesus teharom tok, to hera parem a mhe to endo he kngae ngok mnam ka rengmat ka pun mruo. Va kalngunes ngat kaikkiem kat. ²To a Sabat ta pis to e Yesus ther kaelha kam patter o mia kun mnam o Yuda ngarta rek to kam rere mnam. Va o mia ruk ngata vongnek kim ngate sei kmit ngaongtok kim karo rhek hak he le kaelha kam mo mnganang ngar mruo pum te, “Ngola, a mhel to enda tem anito ko tkol karo vu papat ruk laol nngia? He nam kaeharom o reha ri lvu laol nngia? ³Te gi endo nma ngamrektor ta ngola? Va te, e Maria khal va kaornopeik ruk e Yems, e Yosep, e Yudas va e Saimon kat ngola? Va kaorotmeik gi endri mo kmor kat ngola?” Ngta mamngan pum e Yesus tok, to ngat kaelha kmelat.

⁴To e Yesus tgia reng ngar te, “O mia ngma totu pum a prophet to a hirtek, vanang endo a pgirmia ngam lua totu pum e, ko a prophet to a pgirmia nma rere kar karo valngneik mruo va karo usiel mruo ruk kun mnam karo rengmat ngo pneik mruo va ka valngan mruo ngam lua ngan vgum e.”

5-6 Va e Yesus te sei kam sor kmar ekam ko ngat lo kor mniam mar mang en tok. He ekam tok, tho lo is hak kmeharom o reha ruk lserpgue ko mniam ka rengmat ka pun to endo e. Vanangko ther gi kaehang o mia ligitge kmeharom mar pum ngaro yaylor. He ekam tok, e Yesus tngae parem mar ko tok to kle kaelha kvaik kottek kun mniam o rengmat ngaro maksien he kaelha kpatter o mia.

E Yesus Ta Meng Karo Aposel Ruk Loktieck Hori Orom Alomin Kmeha
(Mt 10.1, 5-15; Lk 9.1-6)

7 To mniam a kolkha langto e Yesus ta kaum karo aposel ruk loktieck hori orom alomin ko kim he kaen a serppak mniam mar, mar kam kerer o kool ko ta re kmelha kam memeng ngar alomin alomin kmeha. 8-9 To ta reng ngar te, “Mguak or kmeha kim a tomhel tang hak ko mguak ngae. Vanang mang a gi kop va o nharok ngaro vanvan tuk, mut kais kmeha kmar. Vanang mang o ol va o ngaelpas va o krek ruk kmelik kun mniam mularo psang ruk muma kleng mularo vgondik orom mar va o varkie akor, mguak or kmeha kim mar kat e.” 10 To ther kta reng ngar kat te, “Mguak ngae, va mguak pis mniam a ni rengmat to he kvaik mniam a rek tang, ko a rek kteit nak ngatkal ekmuk. He mguaka vle ko kim endo arhe kais ko mguak parem a rengmat to endo. Nang mguak or kam prik ka prik mniam o gi wrong rektor akuruk e. 11 Vanang enangthe o mia nga lula ngatkal ekam muk kam vle ko kmar, i o enangthe nga kael rela kim muk, va mguak kaureik he kngetmmie ko vgum ngaro rektor kam rpem a mmie ka ngaor to ta vat engnang mularo nharok kam khenam ngang ngar te, mut hera tu kam pis ko kmar orom E Nut karo rhek, he E Nut ner kael a mgu ngang ngar koknaik. Mguak kaeharom tok, to klapsam nga rengmat to endo ge.”

12 E Yesus ta rere tok knop, to kalngunes ngat her kaelha kam parahi kam hahavaeng o mia te, ngak kaitgung ngaro kerkeknen he kor mniam mar mang E Nut. 13 Va o mia kavurgem ruk ngat yaylor va kalngunes ngat koror mar orom a ku kat he ngata kta yaya kat. Va ngata kerer o kool kavurgem kun mniam mar kat.

E Yoanes To Nma Parrum O Mia Ngta Ptum Ka Ngoro
(Mt 14.1-12; Lk 9.7-9)

14 To lRom ngalaip kalkayie langto ka munik e Herot, endo ta mrua kansgum en mruo kam mrua mon en mruo te, en a Taven, ta ngnek mang e Yesus karo reha ruk nam kaeharom mar ko maktiegom karo aposel ruk tok, ko e Yesus ka munik tngae ho klaut hak vgum mar. Ko o mia akuruk ngat kaelha kam havae ma mmok mang e Yesus te, “En e Yoanes to nama parrum o mia, he en nam kaeharom o reha ruk endri lserpgue vgum ka serppak to tkol ko thop petgim ka nnak.”

¹⁵ Gi akuruk ngate ktua havae mang te, “En e Elaisa.”

Nang akuruk yok vat ngta havae mang te, “En a propet enang tang mniam endruk tennik.”

¹⁶ Vanang e Herot ta ngan ko o mia ngta mon E Yesus te, en e Yoanes to nama parrum o mia, to en kat ther le mrua havae mang e Yesus tok kat kam mrua havae te, “E Yoanes to ko en a volou mang tesgun, o mia kam ptum ka ngoro kngam a yoror, nok her en ta kat arhe, ko nok tkat hop petgim ka nnak vor!”

¹⁷ E Herot tpat tok, ko tiok, her en mruo to ten a volou mang e Yoanes, o mia kam kapom he kaussiem to le kaenpasiker kun ma hengor. Ii, e Herot ten a volou mang e Yoanes tok, ko tiok e Yoanes nama kser e Herot mang ktavlom to e Herodias. Ko tesgun e Herodias ta vle te, e Herot knopia to e Pilip ktavlom, nang e Herot ta vret e Herodias mkor knopia to kle klei orom, en kam vle te, ktavlom mruo. ¹⁸ He ekam tok, e Yoanes nma palsie kim e Herot mang ka kerkeknen to endo tok kam havaeng te, “Nguaro pos ngat lua ngatkal mang in kam lei orom inan tok e.”

¹⁹ He ekam tok, e Herodias nma vrek kiin ngang e Yoanes he ksei kam svil kmim kngam a yoror. Ii, nma svil kmim e Yoanes kngam a yoror, vanangko tlo is, ²⁰ ekam ko katngokol e Herot nma ruokar kim e Yoanes he mrua koon mang ko ta mnor mang e Yoanes karok keknen ko e Yoanes nam sim kut kaikkiem E Nut karok rhek va ko nma totu pum E Nut kat. Vanang mniam o kolkhek ruk e Yoanes nma vle kun pa hengor, e Yoanes nma patter e Herot, va e Herot ka vrek nam sia kervavle pum karok rhek, vanangko nma srei kam ngan mar ge.

²¹ E Herot nma koon mang kam ngae, to mniam a kolkha langto e Herodias ka papat tpis kim ko e Herot ta kunngir kim kalmialao mruo va kalngunes ruk ngma kar va tomtent ngalmialao va lGalili ngalmialao kat. Ta kunngir kim mar kam pat mang a kolkha to knan tkol mniam. Ko mniam a kolkha to endo ²² e Herot mar ngat korosang kaemik to e Herodias ka kvek ta vaik he kaerep ko pum ngaro kerok. Tkaerep knop, to e Herot kar karok mia ngat ngae sei kam srei mang hak.

Ngta srei mang to a taven to e Herot treng a vлом sie to endo te, “Ani tomhel lang ko ngiaka mnganang dok mang, va ngor gi kaen ngang in.” ²³ Ta havae tok, to kael ka tnangal ngang lsir he kmon a tomhel langto kmenserpgam ka tnangal to endo ko treng te, “Ani tomhel lang ko ngia mnganang dok mang, va ngor gi kaen ngang in. Si o tgoluk ruk ngota nho mang ngar kais mang nga mhe va dok ngora tting mang ila mngan mang ngar ge.”

²⁴ A vлом sie ta ngnek tok, to le kparem e Herot he kpis ngok kim knan to ka mnganang te, “Anito nguaka mnganang mang?”

To endo yek, knan ta havaeng te, “E Yoanes to nma parrum o mia, kua svil mar kam ptum ka ngoro.”

²⁵To a vlom sie ta parem knan he kmarer kmeknik ngok kim e Herot to kreng te, “E Yoanes to nma parrum o mia, kua svil yin kam ptum ka ngoro gi tete ta he kael ka lpek kun mniam a plo kmen ngang dok.”

²⁶A taven to endo ta ngan ka mngan tok, to te sei kam kosnok kun mniam en mruo. Vanangko ekam ko ther mon a tomhel langto kmenserpagam ka tnangal ko pum klenar ngaro kerok, tlo kais hak kam kser a vlom sie to endo ka mngan e. ²⁷To ther kaengu ngang langto mniam endruk ngma kar va tomtent ngatngae en kam ngae ka ptum e Yoanes ka ngoro to kaeknik orom. To thera ngae kun pa hengor, ta ptum e Yoanes ka ngoro, kael kun mniam a plo ²⁸to kaeknik orom. Tkaeknik orom to kpis her kaen a plo to orom e Yoanes ka lpek ngang a vlom sie to endo to en thera lapsam ngang knan. Ii, e Yoanes ka yor thera vle tok arhe. ²⁹To e Yoanes kalngunes ngat kol a re mang ko tyor tok, to ngat kle kpis kol ka mnes to hera ngae ka me kael kun mniam a kre ka nho.

**E Yesus Ta Klang A Mumu Alautar Hak (5,000) Kmo Ol
(Mt 14.13-21; Lk 9.10-17; Yn 6.1-14)**

³⁰To o aposel ngata rum ngaro reha tgus to kaekeknik kpis ko kim e Yesus he khavaeng mang ngaro reha tgus ruk ngat eharom mar va ngaro rhek tgus ruk ngata patter o mia ormar kat. ³¹Nang o mumu ngma mopatap ngok kim e Yesus kam ngae kais ko e Yesus mar ngat si kaemik va ngat lo ktis kat e. He ekam tok, e Yesus treng kalngunes te, “So mor ngor ngae ngok ma lootpgeik na, mor kam vrua vle mor tuk kam kta kol a serppak na.”

³²To ngat kar mniam a langail to hera poe kam ngae parem a mhe to endo kam ngae ngok ma lootpgeik langto, mar kam vle mar tuk ko tok.

³³Vanangko o mia kavurgem ngta vokom mar he hera mnor mang ngar to hera veet parem ngaro rengmat kaikkiem ko paat he ktar pis mniam a mhe to e Yesus mar ngat re kam ngae mniam. ³⁴To e Yesus mar ngta pis kvaar he kottek paat, va vgum a mumu alautar ko ta vle kpaneng. Tvokom mar to ta mrung ngar ko ngta vle enang o sipsip ruk nop ngar teit ngang ngar kam toot mang ngar. To tkaelha kam patter mar mang o papat kavurgem.

³⁵Kam ngae, to a kolkha ta vaik. To e Yesus kalngunes ngat pis ngok kim he kreng te, “Ta re kam slok he, he te va mor ri ngot gia vle mo ma lootpgeik kat. ³⁶He ekam tok, ngiak meng a mumu ta he nak ngae ngok mniam o rengmat laol va o maksien ruk ko kan mmok, mar kmenkim o ol ngang ngar.”

³⁷Ngata re tok, va e Yesus tkoripang ngar te, “Muk mruo mgua mrua klang ngar mo ol ha, mar kmemik.”

Va kalngunes ngta mnganang te, “Ya re mor kam ngae he krum a kre alautar hak kmenkim o ol he ka klang ngar ngar kmemik? Tang mniam

mor nak kaeha kais mo kenho ruk aktiek hori orom korlotge kmit o kreks
ruk ngat is kmenkim o ol ngang ngar.”

³⁸To e Jesus ta manganang ngar te, “Yu! Mularo bret ruk o gutnei ngat
is te, aner? Mu ngae he him mar na.”

Ngata him mar knop to ngat gia re te, “Mor nguaro bret aktiek va alo
slang agi lomin e.”

³⁹To e Jesus ta reng a momu kmorsang ku ma ngaergot to tgi gnua rer,
he kaum o valngneik. ⁴⁰A momu ta ngan vgum to akuruk ngat korosang
mnam o valngneik ruk orom o mia ruk ngat is mang o mhelom aktiek
mnam langto langto. Va akuruk ngat korosang mnam o valngneik ruk
orm o mia ruk ngat is mang alo mhelom alomin hori orom loktiek
mnam langto langto kat. ⁴¹Ngat korosang enang tok knop, to e Jesus ta
lol o bret ruk aktiek va alo slang he ka nho ngpalmi to kanprim E Nut
mang ngar to kle kommenik to kaenik ngang kalngunes mar kmisis kim
o mia. Va ta kol alo slang kat he kaisis kim mar tgus enang tok kat. ⁴²To
o mia tgus ngat kaemik ngae vi tgus knop, to ⁴³e Jesus kalngunes ngata
kaum o bret ngo mhetor ruk e Jesus tommenik va o slang akuruk ko a
momu ta penkim mar. Ngta kaklang o ngauret ruk loktiek hori orom
alomin ormar va ngat ngae kottep. ⁴⁴Vanang kam him gi lurokol ruk
mnam endruk tgus ko ngat emik ko tok, mar ngat kais mang te, 5,000.

E Jesus Ta Ngaue Kia Ngaenker Ka Las (Mt 14.22-33; Yn 6.15-21)

⁴⁵A gi hi to ngata gun kaemik knop, e Jesus thera tger kalngunes
kam kar mnam a langail he ngta ktar kam ngae ngogut pa ngaenker ka
ngaiting tigut ko mBetsaida, nang en ta kle ka vle ko tok kmel a momu
ko va ngaelaut. ⁴⁶Tkael mar knop, to kle ka grap ngok kia vul langto ka
ngaiting kam ngarkie.

⁴⁷Ta vle, to a kolkha ta vaik mang, vanang a langail ther ngae he ngam
ogu ma mlin he, nang en ta vle en tuk ko paat kuon kia vul. ⁴⁸Ta nho va
kvokom mar ko ngat kaekon kim a ngausgi he sia khanang ngar kam poe.

Tvokom mar ko ngta vle enang tok kais mo kao. To e Jesus thera ngae
kuon kia ngaenker ka las ngok kmar. Ta re kmotter mar, ⁴⁹⁻⁵⁰vanangko
kalngunes ngta vokom ko ta ngae kuon kia ngaenker ka las enang tok, va
ngaro nunu ngat ho mi kut parem ngaro mit hak he ngta vuvui kim ko
ngta pat re te, a ngomiem to en.

A gi hi to ngta vuvui, e Jesus ta hagam mar kam reng ngar te, “Mgua
serppak, ko dok ta he. Mu or kam kta gor kat e.” ⁵¹Thavae tok, to ta grap
ngkun ma langail kar mar, va vgum a ngausgi ko ther gia rurruom. Ngata
vokom tok, to ngae gia nganga kim ⁵²ko ngat lo smia mmok mang ka
ngaeha ka pun, endo orom o bret, ko ngaro papat ngat gi kaendel pum en
kngam ge.

E Yesus Tkaeharom O Mia Ruk Ko mGenesaret
(Mt 14.34-36)

⁵³ Kam ngae, to ngta poe kpis he kvaar ogut pa ngaenker ka ngaiting tigut ko mGenesaret. ⁵⁴ To ngat re kottek paat to o mia ngat re gia vokong e Yesus ka mnor, ⁵⁵ to ngta sap kparhi ogut oguon kun mnam a mhe to endo he kaelha kam plalam o yor ruk ngta kru kun mnam ngaro hevor he kael mar ko kim e Yesus kun mnam o ni wrong maksien ruk o mia ngata havae te, e Yesus ta vle kun mnam mar. ⁵⁶ Va mnam kero maksien, i o o rengmat ruk lkaprik va si o mhetor tgus ruk e Yesus nma ngae mnam mar, va o mia ngam kael endruk ngta yaylor ko ma gi mhe to ngam kaenkim o ol mnam he kaurur kim en kam gia mnang o yor, he mar kam gi vur kaehang si ka yet ke gi gu mko ge. He enang tok, endruk tgus ruk ngat gi vur kaehang, ngaro yor ngata nanop kuo mang ngar.

E Yesus Ta Rere Pum O Yuda Ngalmialao Ngaro Keknen
(Mt 15.1-15)

7 ¹⁻⁴ O Parisiau va si o Yuda tgus ngam kaikkiem ngalmialao ruk tennik ngaro wrong keknen kmoror o tgoluk vop. Ii, ngma vle ti te, enangthe o Yuda ngap kotootpum mar kun mnam a mumu to orom o wrong rhek va nga lo kais kmemik kais ko ngaka ktar kngae na kam mrua parrum o mgun ruk ngta ru pum mar kun mnam a mumu to endo. Va ngam kaikkiem o keknen akuruk kat, endruk kmelel o lheik va o plo va o tonggai va o hevor kat kam pet o mgun kuo mang ngar kat. Va si nga keknen to kam sim kaelel singni va ngam sim kaikkiem endo kat. He nga lo kais hak kmemik enangthe nga lua ktar sim kaelel singni na. Ngaka ktar sim kaelel singni na, to endo yek, ngat kais kmemik.

To mnam a kolkha langto o Parisiau akuruk kar o pattermia ngat kotootpum mar mYerusalem he kngae ngogun kim e Yesus mar. Ngata vokom ko e Yesus kalngunes akuruk ngat gi kaemik, nang lo sim kaikkiem o Yuda nga keknen to kam sim kaelel singni ktar mang ngar kmemik he ngta pat re te, e Yesus kalngunes ngat mur kael mar mruo enang tok orom o mgur ko pum E Nut kalo keik.

⁵ To o Parisiau kar o pattermia ruk endruk ngata vokom tok, to ka mnganang e Yesus te, “Mor ri ngom sim kut kaikkiem ngolmialao nga keknen to kam smia parrur kmelel singni ktar mang ngor kmemik. Vanang nngia orom itlengunes ko mar ngam lo smia parrur kmelel singni ktar mang ngar kmemik tok e?”

⁶ Va e Yesus tkoripang ngar te, “Muk mularo naprai alomin hak! A prophet to e Aisaia te smia mien mang nguk ko ka re to ngat ittiegom mang nguk ther mi kaottam kpis lmien ormuk ko tennik ta ktar kpavap mang nguk te,

‘O mia ruk endri ngam gia gupiris kam totu pum dok orom ngaro gi
pkor, vanang ngam lua vokom dok orom ngaro keknen e. ⁷Ngam
gi mrua ngampaei pum mar mruo kam totu pum dok tok, ko
ngma patter o mia orom ngartaro keknen mruo ruk ngat kottek
mkor ngalmialao mruo ko enangthe mar kuar rhek mruo ruk
ngat ottek mkor dok.’

⁸Ii, mum gia vle tok arhe ko mut her korim E Nut karo pos, nang kle klie
pmar orom mutaro mur keknen mruo ruk ngat kottek mkor mutlmialao
mruo ko muma kpom mar lserppak tete.”

⁹To thera reng ngar kat te, “Mum mrua kanprim muk mruo ko mut
her keyang E Nut karo mur pos ruk tok he khos kim mar kam kokomor
kim mar, he nang muk kam kle va kaikkiem mutaro keknen mruo ruk
ngat kottek mkor mutlmialao mruo. ¹⁰Ii, mut korim E Nut kalo pos ruk
e Moses tel min tennik ko langto thavae te, ‘Mguak totu pum muortek
va muornek’ va langto thavae te, ‘Endo nak sisieng tang mniam min, va o
mia ngak lalaem kngam a yoror.’

¹¹Ii, mut her hos kim alo pos ruk ennginduk vgum ko muma tting mang
o mia kam sisieng ngaornek va ngaortek orom muta mur keknen mruo,
endo ko mum kle va khavaeng o mia orom te, ‘A nngiar to a mhel ta ktar
mon E Nut mang, he kre kam nngiar ngang E Nut orom, a mhel to endo
tho lo mi kut kais hak kam kle ka vrengem kam totu pum knan i o kteit
orm ko ta svil kam smia tar min orom.’ Ii, muma tok orom alo pos ruk
ennginduk kam mon a nngiar to endo te, ‘A Koban.’ (A re to te, a Koban
ka pun ta vle te, ‘E Nut Nang.’) ¹²Ii, muma hagam a mhel to enda kam
sim kut kaikkiem alo pos ruk tok ko muma tok orom min orom muta mur
keknen mruo, en kam lo smia tar kteit kar knan enang tok arhe. ¹³He gi
ekam tok, muma hohos kim E Nut kalo pos ruk tok he ktatar mang ngin
orm muta mur keknen mruo to endo. He o mia akuruk ngma kolkol
ekam mula keknen mruo to endo enang tok kat arhe. Va mum ngae khos
kim E Nut karo rhek kavurgem kam kokomor kim mar enang tok vat.”

¹⁴E Yesus ta reng ngar tok, to kta vaeng a momu ngok kim kat he kreng
ngar te, “Muk tgus mgua smia ngangam kim muk kam mmok mang kuar
rhek na, ¹⁵ekam ko o mia akuruk, ngma pat te, ngara ru pum o mgun ruk
kuo mang o ol, ko ngam kaemik he kaengnam mar ogun mniam mar, he o
ol ngara kla orom mar he ngar lo kta vle la mmok ko pum E Nut kalo keik
vgum tok. Vanang nop hak! Ko o tgoluk ruk ngat lua mmok ko pum E Nut
kalo keik, her mar ruk ngam kle kottek kun mniam a mhel ka vrek, he her
o tgoluk ruk kat arhe ngama kla orom o mia he ngam lo kta vle la mmok
ko pum E Nut kalo keik ormar tok arhe.” [¹⁶“Muk ruk muta vongnek kim
dok, mgua sim kael rela ekam kuar rhek ri kam sim kut kaikkiem mar.”]

¹⁷To e Yesus ta parem a momu ku mnok, nang kvaik ogun ma rek. To
kalngunes ngata mnganang mang ka ngothoi to endo mang o ol. ¹⁸To e Yesus

ta reng ngar te, “Puoo, te muk kat, va mularo lpetuk ngta tok kat? Mut lua mmok gi te, o ol ruk a mhel nma ngam mar ogun vgum, ngat lo kais hak kam kla orom a mhel to endo he en kam vle lua mmok ko pum E Nut kalo keik? ¹⁹Ii, ngat lo is tok, ekam ko ngam lua kolongret ogun mniam ka ngaung e. Nove, ngam kle gia kolongret ngogun mniam ka vrek to kle gi kottek kat ko a mhel nam gia ppie ormar.” (He ekam e Yesus karo rhek ruk endruk tok, e Yesus ta tting mang o gi vrone ol tgus te, ngata mmok kmemik.)

²⁰To e Yesus ta kle kre kngae kat te, “Vanang o kerkeknen ruk ngam kottek kun mniam a mhel ka ngaung, her endruk arhe ngama kla orom a mhel to endo he nam lua vle la mmok ko pum E Nut kalo keik vgum mar enang tok. ²¹Ii, ta vle tok arhe, ko o kerkeknen ruk kun mniam a mhel ka ngaung, her endruk arhe ngam kottek ko a mhel nam kaeharom mar. Ii, endruk endri te: kmel o papat kmeharom o kerkeknen, kam vret o mia, kmuruvik, kam pormia, kam kpoot mang a lei, ²²kam ring mniam mang a vlom, kmeharom o keknen ruk kam kering o mia, kam kauyang o mia, kam kpiem E Nut karo rhek hak, kam ring mniam mang o mia ngaro tgoluk, kam rere pum o mia he kering ngaro mnok, va a mhel kam mrua hover en mruo, va kam lo kor mniam en mang E Nut. ²³Ii, o kerkeknen ri arhe kua momonik, ngama kla orom a mhel he nam lua vle la mmok ko pum E Nut kalo keik vgum mar enang tok, ekam ko ngma vle kun mniam a mhel ka ngaung he kottek ko nam kaeharom mar tok arhe.”

A Vlom To Nong En A Yuda Tkor Mniam En Mang E Yesus (Mt 15.21-28)

²⁴E Yesus treng ngar tok, to kngae parem a mhe to endo, nang kle kngae ko mniam a mhe langto yok ko rkieng alo rengmat ruk e Taira va e Saidon. To ta vaik kun ma rek he lua svil mang o mia kam mnor mang ko ta vle ko e. Vanangko tlo is kam tvok ²⁵⁻²⁶ko a vlom langto ko a koot tviging ka kvek to ke sie tre ka ngnek mang e Yesus ko te gnuu pis ko tok. To ther gia ngae ngatngae kpis ktubulkek ku penharom he kaurur kim, en kam kerer a koot to kun mniam ka kvek to endo. Vanang a vlom to endo, en a vrone rhek langto mniam o Ponisia, endruk ko mniam a mmie ka mhe to mSiria, nang nong a Yuda to en e.

²⁷Tkaurur kim tok, vanangko e Yesus thaavaeng te, “Tlo vua ya dok kam lol o ngnes ruk IIsrael ngaro oreek he kngam mar ogu kam klang o vela ruk o vrone rhek ormar e. O ngnes ngak kaemik kvi na.”

²⁸Va a vlom tkat kaurur kim gi te, “Kolaip, kua mnor, vanangko si o vela ruk ngma vle ku meorom o psen kat va ngam kaem o ngnes ngaro ol ngaro gi ngommes ruk ngma vuvuut kuo va psen.”

²⁹Tre tok, va e Yesus tkoripang te, “Ekam ko ye sim koripang tok, a koot to kun mniam ikvek tngorpok he kparem he. He ekam tok, ngiak ngae ogu mrek.”

³⁰A vlom tngan tok, to her gia ngae ngok mrek he kpis mang ka kvek ko tkonit ko ma hep ko a koot ther ngorpok parem.

**E Yesus Tkaeharom A Ngokol To Kalo Ngaela
Nginta Tok Va Ka Gu Ta Vavnek Kam Rere**

³¹To e Yesus thera ngae kparem a mhe to mTaira, nang hera ngae kaelha kvaik kottek kun mniam o maksien ruk mniam a rengmat to e Saidon to le kngae kvaik kottek kun mniam o rengmat akuruk kat, endruk ngma mon mar te, O Rengmat Ruk Loktie. Tngongae tok, to hera pis ogu pa ngaenker to ko mGalili. ³²Ta vle ko tok, to o mia akuruk ngta pis orom a ngokol langto kalo ngaela nginta tok va ka gu nma vavnek kam rere. To ngat kaurur kim e Yesus kmehang kmeharom en kam ya.

³³To e Yesus ta ktong a ngokol to endo petgim a mumu kngorom en tuk. Min tuk nginta vle, to e Yesus ta guspa ko mang ka ktiek mruo he kvorang a mhel ka naprai orom karo gusgus to kle kael kalo smeik mruo kat ogun mniam a mhel ta kalo ngaela. Tkaeharom tok knop, to kle ³⁴ka nho oguon ma volkha to khong ka ngaung he kre lHibru te, “Epeta.” Va kam hortgem a re to enda ka pun ta vle te, “Pa he.” ³⁵E Yesus ther gia re tok, to a ngokol kalo ngaela ngint her gi pa he, va ka naprai ther gi kta mrer, he nam lo kta sisie pum o rhek kat e.

³⁶E Yesus tkaeharom tok, to krere lserppak ngang o mia kam hagam mar kam lua havaeng a mhel tang mang ka ngaeha to endo. Nma plong hagam mar tok, vanangko e Yesus karo rhek ruk endruk ngat kle ho gi kaenen mkor mar kam vua hahavaeng o mia kavurgem mang. ³⁷Va o mia ngate sei kmit ngaongtok kim e Yesus to ngta mo reng ngar mruo te, “Te sim kaeharom o tgoluk tgus va si o relatok kar o guvat, va en tis kat kmeharom mar, he ngata kta ngnek va kta rere kat.”

**E Yesus Ta Klang A Mumu Alautar Hak (4,000) Kmo Ol
(Mt 15.32-39)**

8 ¹Mnam o kolkhek ruk endruk a mumu alautar langto vat ta kta sovet ko kim e Yesus va nop o ol, mar kmemik e. To e Yesus ta vaeng kalngunes ngok kim to khavaeng ngar te, ²“Ko sei kam mrung a mumu to enda, ko ngata vle mo kmok kais kmo kolkhek ruk korlotge he, he ngat lo vur kaemik vop ³he ngta vang he. Vanangko enangthe kopa meng ngar kmekekni ngogu mrek enang tok, nok pathe ngar kle kyor ktal ko ekam a ngaelaut vor. Ko akuruk mniam mar ngat otootpum mar malhagenmok he kaol ngte.”

⁴Thavae tok, to kalngunes ngat kle ka mnganang te, “Ngruak ring o bret mrie moti ma gi kalputmok he nang ngor kam klang ngar kmemik?”

⁵Va e Yesus ta kle ka mnganang ngar te, “Nang mularo bret ruk o gutnei aner?”

Va ngat koripang te, “Aktiek hori orom alomin.”

⁶Ngat havaeng tok, to e Yesus ta reng a mumu kmorosang ku mmie. Ngat korosang knop, to ta lol o bret to kanprim E Nut mang ngar to tkommenik he kaenik ngang kalngunes, mar kam le kaisis kim a mumu ormar. To kalngunes ngat lol mkor to kle kaisis kim a mumu ormar. ⁷Va kekro singol ruk ngat lo khor ngta kpom mar kat. To e Yesus ta kanprim E Nut mang ngar kat to ta kta reng kalngunes kam lol mkor he kaisis kim o mia kat. ⁸To mar tgus ngtemik kngae vi tgus knop, to e Yesus kalngunes ngata kaum o ol ngo mhetor ruk e Yesus tommenik ko a mumu ta penkim mar, to ngat hera klang o ngauret ruk aktiek hori orom alomin ormar va ngat ngae ottep. ⁹Vanang gi lurokol ruk mnam endruk tgus ngat emik ko tok, kam him gi mar tuk, mar ngat kais mang te, 4,000. ¹⁰Ngat kaklang o ngauret knop, to e Yesus tkaekon a mumu ngok mnam ngaro rengmat, nang en ta kle kar mnam a langail kar kalngunes he kngae mnam a mmie ka mhe to e Dalmanuta.

O Parisiau Ngata Kendum Ngang E Yesus Kam Khenam

Ka Serppak Ma Mmok

(Mt 16.1-4)

¹¹Tie ma kolkha langto ko e Yesus ta vle ko mDalmanuta, o Parisiau akuruk ngta veet ngok kim he kpis kmus kar kam pe gia kendom ngang te, en kam khenam a ngaelmir tang ngang ngar ma mmok, he nang mar kam mia mmok mang en te, lmien te, en arhe Endo E Nut Thim Orom Ka Msasaen. ¹²Ngat pis ko kim va e Yesus tho mi kut kaissuo kim mar to kerer ka lpek he kre te, “Muk o mia ruk nga main to tete mum sim ktua riring kriring ge mang a ngaelmir tang mo krok. Vanangko kua mien ngang nguk te, ngor ho lua khenam tang hak ngang nguk e.” ¹³Ta re tok, to hera parem mar he kta kar mnam ka langail to ngat hera poe kngae ogut pa ngaenker ka ngaiting tigut.

E Yesus Ta Koka Mang E Herot Kar O Parisiau Ngaro Papat

(Mt 16.5-12)

¹⁴Ngata pis kvaar to kngae, vanangko kalngunes ngat kikiangae kam lol o ol. A gi bret to a gutnar atgiang tuk e, ngat el kun ma langail. ¹⁵To e Yesus ta koka kmel a pagor ngang ngar te, “Mgua sim ktua papat he kngangreal ngang nguk hak mang e Herot kar o Parisiau ngaro papat ruk ngma kerruru ormar ko ngma ker patter o mia ormar. Ko ngaro papat ruk endruk ngta vle enang ke ngaor to a yis ko nma himhim orom a bret kam ho khibul hak.”

¹⁶To kalngunes ngat kaelha kam mo mnganang ngar mruo he kre te, “Ngola, ta re ti, ekam ko ngot kikiangae kam lol o ol akor vor?”

¹⁷To e Yesus ta tar ko ngta re tok, to ta kle ka psom mar te, “Kman ko muta vle krere mang te, nop o ol ngang nguk? Mut lo smia ngangam

kim muk he kol dok vop, ko mularo papat ngama vle ho mi ktua kaendel pum dok kngam dok ge.¹⁸ Ii, muma vle tok ko muma ngan kuar rhek, vanangko mum lo smia ngangam kim muk ekam mar e. Va mum sia vokom dok, vanangko mum lua vokom dok kam mia mnor dok kat e. Mu havaeng dok na, mut kais kam pat mang¹⁹ o bret o gutnei ruk aktiek, endruk ko ommenik he ka clang lurokol ruk ngat kais te, 5,000 ormar? Ko kopekam ko ngat emik kvi, muta clang o ngauret aner orom o bret ngo mhetor ruk ngat penkim mar?”

Va kalngunes ngat koripang te, “Ngota clang o ngauret ruk loktieh hori orom alomin.”²⁰ To ta kta mnganang ngar kat te, “Va mang o bret o gutnei ruk aktiek hori orom alomin, endruk ko ommenik he ka clang lurokol ruk ngat kais te, 4,000 ormar, mut kais kam pat mang ngar kat ko kopekam ko ngat emik kvi kat ko muta clang o ngauret aner orom o bret ngo mhetor ruk ngata penkim mar?”

Va kalngunes ngat koripang kat te, “Aktiek hori orom alomin.”

²¹ Ngta re tok, to e Yesus ta le ka mnganang ngar te, “Mare, va mut lua mmok vop mang dok ge?”

E Yesus Tkaeharom A Vivisker Ko mBetsaida

²² To ngata ngae to kpis ko mBetsaida. To o mia akuruk ngat kaol he kpis ko kim e Yesus orom a mhel to ta vipsik. Ngata pis he kaurur kim, en kmehang kmeharom en kam ya.²³ To e Yesus ta kpom a mhel ka ktiiek to hera ktong kngorom petgim a rengmat to endo. To ta guspa mang a mhel ta kalo keik to hera vat kalo ktiiek kuo mang ngin. Teharom tok knop, to ta mnganang a mhel to endo te, “Yi vrua vokom a tomhel tang he?”

²⁴ To a mhel ta ta malegem kalo keik he kreng te, “Kua vokom o mia ko ngata nho enang o hi ruk ngata ngongae.”

²⁵ To e Yesus ta kta vat kalo ktiiek kuo mang a mhel kalo keik kat. Tvat knop, to a mhel ta kaenker klik kam nho, to tle smia nho he kvokong o tgoluk tgus ko ngat vua mmok hak.²⁶ E Yesus tkaeharom tok, to kmeng a mhel to endo kam ngae klapsa ngok mrek orom karo rhek te, “Ngiak or kam marer kmeknik kun ma rengmat tma kuon e.”

E Pita Ta Pakvom Kam Polgom Ka Papat To Mang E Yesus Te, Her En Arhe Endo E Nut Thim Orom Ka Msasaen (Mt 16.13-20; Lk 9.18-21)

²⁷ To e Yesus ta ngae kar kalngunes kam ngae mnam o maksien ruk ko rkieng a rengmat to e Sisiria Pilipai. Ngta ngae ekam a ngaelaut, to e Yesus ta mnganang kalngunes te, “O mia ngma mngan pmok he khavae te, dok erie?”

²⁸ Va ngat kaekon ngang te, “Akuruk ngma havae te, yin e Yoanes to nama parrum o mia. Akuruk ngam ktua mon yin te, yin e Elaisia,

nang akuruk yok ngma mon yin te, yin a propet langto enang ngar ruk tennik."

²⁹To e Jesus ta kle ka mnganang ngar te, "Vanang muk ri, mum ktua pat te, dok erie?"

Va e Pita tkoripang te, "He her yinda arhe, Endo E Nut Thim Orom Ka Msasaen."

³⁰E Jesus ta ngan tok, to hera reng kalngunes lserppak kam lua polger a re to endo mang en tok ngang a mhel tang vop.

E Jesus Ta Pakvom Kam Ktar Kpavap Mang Ka Yor (Mt 16.21-28; Lk 9.22-27)

³¹E Pita thavae tok, to endo yek, e Jesus tkaelha kam patter kalngunes mang en mruo te, "A Mhel To Nkong Man Ma Volkha nera lol o vnek kavurgem vgum o pris ruk laol va o patternmia kmo pos va o Yuda ngalmialao ko ngara rere kim he kaen a volou mang, mar kmim kngam a yoror. Va naka kru mniam ka nnak kais mo kolkhek ruk korlotge, yek E Nut na kle khover petgim ka nnak kat." ³²E Jesus tlua tuvgom karo rhek ruk mang ka yor e. Tmia havaeng ngar orom a re ka mit ma mmok tok. Ta re tok, to e Pita ta ker ngangan karo rhek ruk endruk, to te vrua vaeng e Jesus petgim klenar he kaekon kim o rhek ngang kam kner mang a papat to endo.

³³To e Jesus thortgi he kvokom kalngunes to kle ka kner e Pita kam reng te, "Ehenok ko, petgim kualo keik, ekam ko ye ru kim e Seten, ko ilalo keik ngint gia vle mang o tgoluk ruk mo mmie, nang nong mang o tgoluk ruk mkor E Nut e."

O Mia Ngma Ketoptop Kmikkiem E Jesus

³⁴Ta re tok, to her kle kvaeng a momu kar kalngunes ngok kim to kreng ngar te, "Erieto mniam muk na papat kam vle te, kua kalyie to en, en na kikiangae mang karo svil mruo, nang kle mrua krus orom en mruo, kmel en mruo kam yor, kam vle gi enang a mhel to ta mrua tolpum kta ho mruo to ngara krong orom o ot kvat ko engnang kngam a yoror. ³⁵Ko endo tvua sovet kam svil hak mang ka ngorsang to mo mmie, a mhel to endo ner lua kol a ktalhok to kam plong vle ko kim E Nut ngnik ngnik e. Vanang endo nam mrua slak orom ka ngorsang to mo mmie kam kpom a knovvur he le khavaeng o mia mang dok orom, her en arhe nera kol a ktalhok to kam plong vle ko kim E Nut ngnik ngnik. ³⁶Ii, ko a mhel nera vle nngia koknaik enangthe napa rum karo mur svil mruo tgus hak mang ka ngorsang to mo mmie tete, vanang koknaik, na gia huo mang kalo ktiek ko tkosnok ko tlua kol a ktalhok to endo? ³⁷Ko nop ke vur tomhel ngang hak ko en mruo nak kol mo mmie to tis kmel ekam en mruo orom kam moppel kar a ktalhok to endo hak, he nang en kam le kol e. ³⁸Ii, ko

o mia nga main to tete ngam kaeharom o kerkeknen he kparem E Nut he ka vle ngang E Nut enang o mia ruk ngma kpoot mang a lei. He a ni mhel to nak leep kim mar pum dok va pum kuaro rhek ko a mhel to endo nma vle kun pgegom mar, va A Mhel To Nkong Man Ma Volkha to dok kat, ngora leep kim E Nut pum a mhel to endo tok kat. Ii, nera vle tok arhe, mniam a kolkha to A Mhel To Nkong Man Ma Volkha to dok ngua kaeknik mniam. Ko mniam a kolkha to endo ngor kaeknik orom E Titou kar karo engyel ruk o totur nga mmok.”

9 ¹“Ii, kua havaeng nguk lmien te, akuruk mniam muk ri muta vle mo, mguer lua yor vop kais ko mguer mia vokom E Nut ka tavgo to ormok ko ka tavgo to endo nak pis lserppak he kaelha kam komor o mia.”

E Yesus Ka Vok Ta Horotgi (Mt 17.1-13; Lk 9.28-36)

²Kopekam o kolkhek ruk aktiek hori orom atgiang ko ngat nop, e Yesus thera nglum e Pita kre Yems va e Yoanes he ka ktong ngar kam grap ngogouon kia vul to a hogor petgim o mia, mar kam vle mar tuk. Ngata vle ko tok, to e Yesus ka vok tkaelha kam horotgi ko pum ngaro kerok. ³Va karo it ngat ngae sei kam pilpil ko ngat ngae ho mi kut les hak kir kim o it tgus ruk mo mmie ko o mia ngma plum mar orom a ye to a serpgar mar kam mmok hak. ⁴E Pita kar e Yoanes va e Yems ngat re ka nho, va vgum e Elaisia kre Moses ko ngint her gi pis ko pum ngaro kerok he krere kar e Yesus.

⁵Ngta vokom mar tok, to e Pita ther gi vrong kngam a re ngang e Yesus te, “Vae, pattermia, tho mi kut ya hak ko mor korlotge ngot hera vle mo he. Mor he, ngruaka ngam o rambel akor ko korlotge ngang nguk, tang ngang in, e Moses kat ngang va tang ngang e Elaisia kat!” ⁶E Pita ther gi vrong kngam a re ngang e Yesus enang tok, ekam ko a gor a ho laut hak tkol mar.

⁷E Pita ta rere vop, va vgum a varhek ko tpis va ka ngoumi ta komor mar. Va ngta ngan a ktui ko tkottek kuon mniam a varhek to endo he kre te, “Ko hal ta arhe, kom vu kaelongtok mang en. He mgua smia ngan vgum!”

⁸To ngat her gia petela he re ka nho va si nhong e Moses kre Elaisia, nang kle gia vokom e Yesus tuk ko tgia sir en tuk ko pum ngaro kerok.

⁹Kam ngae, to ngat kaelha kam grung kun kuon kia vul ekam a ngaelaut, to e Yesus thera reng ngar lserppak, mar kam lua polger o rhek ngang a mhel tang mang anito ngat vokom kuo kia vul kam ngae kais ko A Mhel To Man Ma Volkha to en na hop petgim ka nnak. ¹⁰E Yesus ta rere lserppak ngang ngar tok, to kalngunes ngat her gia kir mang a re kun mniam mar mruo, nang gia momnganang ngar mruo mang o rhek ngo pneik ruk te, “kam hop petgim a nnak.”

¹¹ To kalngunes ngat kle hera mnganang te, “Yu! Vanang kman ko o pattermia kmo pos ngam kle khavae te, e Elaisa naka ktar kaol kpis na, ktar mang Endo E Nut Thim Orom Ka Msasaen?”

¹² Va e Yesus tkoripang ngar te, “Nop, lmien tok ha, ko e Elaisa na mi kaottam E Nut karo rhek, mar kam pis lmien orom en mruo ko naka ktar kaol he kpis tok, kmelel o papat ngang o mia te, nga kta kaeknik ko kim E Nut, he nang mar kam kta mokpom kar En. Ii, nak kaottam E Nut karo rhek, mar kam pis lmien orom en mruo tok, vanangko nngia orom E Nut karo rittiek akuruk kat, endruk mang A Mhel To Man Ma Volkha, ko ngata ktar kpavap mang te, nak lol o vnek vgum o mia he ngak keyang kat. Va o rhek ruk endruk nga lo kais kam pis lmien orom tok kat ge?

¹³ Kua havaeng nguk te, e Elaisa ther mi pis he, nangko o mia ngat kle keyang kmikkiem ngartaro svil mruo kmikkiem enang ko E Nut karo rittiek ngata ktar kpavap mang en enang tok arhe.”

E Yesus Tkaeharom A Kalyie To A Koot Tim

(Mt 17.14-20; Lk 9.37-43a)

¹⁴ E Yesus mar ngta grung kun kuon kia vul, he re gia pis mang kalngunes akuruk ku pa vul knop, to ta nho he kvokom a mumu alautar ko ta sovet ngok kmar ko o pattermia kmo pos ngta vle he kmus kar mar.

¹⁵ A gi hi to a mumu ngta vokong e Yesus ko te gnuua pis, ngat ho mrua sor kmar to ksap he kaen nga mamrung ngang.

¹⁶ To e Yesus ta mnganang ngar te, “Muta mo maen o rhek kar mar mang anito?”

¹⁷ To a mhel langto kun mniam a mumu ko tok, thavae te, “Pattermia kua plalam ko hal ngte kim in ko a koot to a ngoulo twicing he kvat ka gu he.

¹⁸ Ko a koot nam kaim he kootmerom kam krongreik ku mmie to karo guggus ngma klang ka gu. Va nama hem kakro ngnorok va ka vok nam ngae gia serppak kat. Nma vle tok, he kua plalam ngte kim ilengunes he ka mnganang ngar kam kerer a koot to kun mniam petgim, nangko ngat lo is e.”

¹⁹ E Yesus ta ngnek tok, to kle ka kner kalngunes te, “Muk ruk o mia nga main to tete, mum vua vrenge E Nut karo papat he kekenhor mang dok hak. Kua kapangan kim muk he, ko kua vle mo kmuk lhok he, vanang mut lo vur kaeha vop orom kua serppak to ko en ngang nguk.” Ta kner mar tok, to le kreng ngar te, “Mu marer plalam a kalyie to endo ngte kim dok na.”

²⁰ To ngat plalam a kalyie to ngok kim. To a koot tre gia vokom e Yesus to gia kakhiker a kalyie he kootmerom kam krongreik ku mmie, he karo gusgus ngat kta klang ka gu kat.

²¹ To e Yesus ta mnganang a kalyie kteit te, “Nma pis kim mniam o kolkhek aner?”

Va tkoripang te, “Kais ko en ke kalyie gi 22 a koot nma ngam kun ma paei va kun ma ye kmegom kmim kngam a yoror. Nangko enangthe ip kais kmeharom a tomhel tang, va ngiaka mruung nguo vanie he kturang nguo.”

23 Va e Jesus ta kle kreng te, “Kman ko ye havae te, ‘Ip kais.’ Ko enangthe ip kor mniam yin mang E Nut te, En tis kmeharom o gi vrong tgoluk tgus, va ner mi kaeharom o gi vrong tgoluk ruk endruk gi enang tok.”

24 To a kalyie kteit ta re kngan e Jesus ko ta re tok, va tlo hus kmurur kim te, “Ko gi vur kor mniam dok mang E Nut gi nong ke laut e, vanangko ngiak kaenserpagam dok kam ho sim kut kor mniam dok mang alaut gi.”

25 To e Jesus ta vokom a mumu ko ngat kaelha kam sap klik kam gun mang, to tkaekon kim a koot kreng te, “Yin a koot to ima tokim a mhel kalo ngaela va kvat ka gu arhe. Kua re lserppak ngang in te: Ottek kun mniam a kalyie ta, he or hak kam kta viding ngnik ngnik kat e.”

26 E Jesus treng tok, to a koot ta kervuvui va ka khikher a kalyie to endo klik to kottek kparem. Ta parem knop, to a kalyie ka vok tgia vle enang a mhel ka mnes. Va o mia kavurgem ngat hera re te, “Tyor he.” 27 Vanangko e Jesus ta kpom a kalyie to endo ka ktieh he khover to ta hop ksir.

28 E Jesus teharom tok, to hera vaik ngogun ma rek langto ka vle kar kalngunes mar tuk. Ngta vle mar tuk ko tok, to ngta mnganang e Jesus te, “Ngola, kman ko mor mruo ngot lo is kam kerer a koot to endo petgim?”

29 Va e Jesus tkoripang ngar te, “A koot ka mten to endo, o vrong tgoluk ngat lo is kam kerer e. Ngiak ngarkie ngang E Nut tuk, to endo yek, E Nut nera kerer.”

E Jesus Ta Re Kngam Nglomin Mang Ka Yor

(Mt 17.22-23; Lk 9.43-45)

30 To ngata parem a mhe to endo to kaelha kam vaik kottek kun mniam o rengmat ruk kun mniam a mhe to e Galili. Vanang e Jesus tlua svil mang a mhel tang kam mnior te, ta vle ko tok e, 31 ko ta hivuo kam patter kalngunes. Ta patter mar te, “A mhel langto nera hortgi mang A Mhel To Nkong Man Ma Volkha, he kael ko maktiegom kakro imuo, mar kmim kngam a yoror. Nak yor hak he ka kru kun mniam a kre ka nho kais mo kolkhek ruk korlotge to E Nut na kle kta hover petgim ka nnak, en kam kta hop kat.” 32 Ta patter mar khavae tok, vanangko kalngunes ngata moruo pum karo rhek ngaro pneik. Va ngta gor kam mnganang en mang ngar kat.

Endruk Ngaro Mnok Ngata Laut Kun Mnam Endruk E Nut Ka

Tavgo Ta Komor Mar

(Mt 18.1-5; Lk 9.46-50)

33 To ngta ngae ekam a ngaelaut vop, to le kngae kpis ko mniam a rengmat to e Kaparnam. Ngta vaik kun ma rek langto, to e Jesus ta

mnganang kalngunes te, “Muta ngae ekam a ngaelaut va muta mo hem mang anito?”³⁴ Ta mnganang ngar tok, vanang ngat gia vongnek kim, ekam ko ngata mus ekam a ngaelaut he kmo kir kmar mang edim mniam mar ruk E Nut ka tavgo ta komor mar ka munik ta laut mang klenar.

³⁵ Ngat gia vongnek kim e Yesus tok, to e Yesus tkorsang he kvaeng ngar ruk loktieh hori orom alomin ngogu kim. To thavaeng ngar te, “Enangthe a mhel tang naka svil ka munik kam laut kir kim klenar tgus, va her a mhel to endo arhe na mrua krus orom en mruo he kaeha ngang klenar.”

³⁶ Ta re tok, to kvaeng ke kalyie langto he ka srim kun pgegom mar ko pum ngaro kerok. To tle kaorom maktiegom he khavaeng ngar te,³⁷ “Mu vokom na, ani mhel to na mrua krus orom en mrua ko pum o mia ruk ngaro mnok ruk ngat lo vua laut enang ke kalyie ta, kam ngatkal mang ngar ko ngat kor mniam mar mang dok, va a mhel to endo ther mi ngatkal mang dok tok kat arhe. Ii, va ani mhel to ta ngatkal mang dok tok, ther mi ngatkal mang her E Nut to tmeng dok nge tok kat.”

³⁸ Va e Yoanes thera koripang te, “Pattermia, ngot vokong a gi wrong mhel langto ko tkaeharom o mia he kerer o kool orom ila munik ka serppak, va ngot lua ngatkal mang, nang kle khagam ko en nam lo kaikkiem mor e.”

³⁹ Va e Yesus ta srim te, “Mu or kam hagam e, ekam ko ani mhel to nam kaeharom o ngaelmir ruk lserpgue orom kua munik ka serppak, tlo kais kam kle khortgi mang dok he kta kerrereng dok kat, gi kopekam ko tkaeharom tok e.⁴⁰ Kua re tok, ko enangthe a mhel tang nap lo kael imuo ngang nguk, va her a mhel to tmia ngatkal mang nguk tok arhe.⁴¹ Ii, kua mien ngang nguk te, ani mhel to na gi kaen a ye ke mhe ngang nguk ekam ko mum kaikkiem Endo E Nut Thim Orom Ka Msasaen, va E Nut ner ho lo kais hak kam kikiangae mang a mhel to endo ka keik e.”

**Mguak Ngangreal Ngang Nguk Mang Kam Lo Kaop Kim O Mia
Kmeharom O Kerkeknen**
(Mt 18.6-9; Lk 17.1-2)

⁴² Va e Yesus ta rere kngae vop te, “Va, kolngunes ruk endri orom ngaro papat ruk kmor mniam mar mang dok ko ngat lo vua serppak mang dok vop, enangthe a mhel tang nap kaop kim kua kalyie tang mniam mar kam mrua ksir petgim dok, va ner vrua ya ngang a mhel to enda kam vle vgum a kapnes to kam kleng a kre to klalaut ko porom ka ngoro he kngam ogu ma ho mlin, en kam yor. Vanang ner kle ho mi ktua kernonho hak ngang a mhel to endo kam vle vgum a kapnes to E Nut ner kaen ngang enangthe nap kaop kim tang mniam kolngunes ruk endri ko tvur kor mniam en mang dok ko ka munik tlo vua laut, he en kam harpeet enang tok.⁴³ Ii, he ekam tok, enangthe ip kaeharom a kerkeknen tang orom ila ktiek mruo he na re

kaop kim kolkayie tang kmeharom a kerkeknen tok kat, va ngiak kle ka ksir pum a kerkeknen to endo he ka vle gi enang a mhel to napa kser ka ktiek mruo hak he kpet kngam. Ngiak kaeharom tok, ekam ko te sei kam ya hak ngang in, yin kam mrua ngam ke mhe tang ngang yin mruo he kol a ktalhok to kam plong vle ko kim E Nut ngnik ngnik tok. Vanang ner kle ho mi ktua kernonho hak ngang in kam vle vgum a kapnes to E Nut kam ngam ila vok tgus kun mniam a paei to a vleir ko mGehina. [44 Ko tok mniam a mhe to endo, o ngneng ruk ngam kaem o yor ngaro mnes ngam her gia ktal kim mar ka vle ka vle hak va a paei kat nam lua tep kat e.] 45 Gi enang tok kat, ko enangthe ip kaeharom a kerkeknen tang orom ila nhari mruo kat he na re kaop kim kolkayie kmeharom a kerkeknen to kat, va ngiak kle ka ksir pum a kerkeknen to endo kat gi, he ka vle gi enang a mhel to nap mrua kser ka nhari mruo hak he kpet kngam. Ngiak kaeharom tok, ko te sei kam ya ngang in, yin kam mrua ngam ke mhe tang ngang yin mruo he kol a ktalhok to kam plong vle ko kim E Nut ngnik ngnik tok. Vanang ner kle ho mi ktua kernonho hak ngang in kam vle vgum a kapnes to E Nut kam ngam ila vok tgus kun mniam a paei to a vleir ko mGehina. [46 Ko tok mniam a mhe to endo o ngneng ruk ngam kaem o yor ngaro mnes ngam her gia ktal kim mar ka vle ka vle hak va a paei kat nam lua tep kat e.] 47 Va enangthe ip kaeharom a kerkeknen tang orom ila keik he na re kaop kim kolkayie kat kmeharom a kerkeknen tok kat, va ngiak kle ka ksir pum a kerkeknen to endo kat gi he ka vle gi enang a mhel to nap mrua kalagam ka keik mruo he kpet kngam kat. Ngiak kaeharom tok, ko te sei kam ya hak ngang in, yin kam mrua kalagam ila keik mruo he kpet kngam, he nang yin kam vaik ku meorom E Nut ka tavo orom ila keik to atgiang tok. Vanang ner kle ho mi ktua kernonho hak ngang in kam vle vgum a kapnes to E Nut kam ngam ila vok tgus orom ilalo keik tgus kun mniam a paei to a vleir. 48 ‘Ko tok, mniam a mhe to endo o ngneng ruk ngam kaem o yor ngaro mnes ngam her gia ktal kim mar ka vle ka vle hak va a paei kat nam lua tep kat e.’

49 Nera vle ngang ngar enang tok arhe, ekam ko E Nut ner kael a paei kuo mang o mia tgus ngaro pkor, kmikkiem gi enang ko o mia ngam kael a hormnek kuo mang o relot tok kat.

50 Ii, ko a hormnek nma mgae orom ka karvuk mekam mekam.
 Vanang enangthe ka karvuk npa hortgi he knop, va ngir kais kam kta kaenserpagam nngia, en kam kta karvuk kat? He enang tok, muk kat, mularo keknen ngak kaeharom mularo ngorsang mo kmuk tgus kam ya va kmisis kun pgegom muk kat.”

E Nut Tkueng Lurokol Va Lraip Mar Kam Lua Kser A Lei *(Mt 19.1-12)*

10 ¹E Yesus trum karo rhek ruk endruk to kle kparem a mhe to endo he kngae mniam a mmie ka mhe to mYudea to le kngae kat mniam

a mhe to ngkun kut pekam a ye to e Yodan ka ngaiting tigut. Va o mumu laol ngta kaum ngok kim ko tok kat. To kmikkiem ka keknen mruo to kam patter o mia, nma patter mar ko tok kat.

²To o Parisiau akuruk ngat pis ko kim e Jesus ko tok, ko ngata svil kam pe gi kaegom, he nang en kam mrua ru pum karo rhek mruo. Ngat pis to pe gia mnganang te, “Ngola, kmikkiem E Nut karo pos tgia sir gi ngang a ngokol kam gia kser en kar ktavlom ngina lei?”

³Va e Jesus tkoripang ngar te, “Vanang e Moses, ta pos ngang nguk nngia?”

⁴Ngat koripang te, “E Moses ta tting mang te, a ngokol kam kser a lei, enangthe naka ktar kaittiegom a hor ngang ktavlom kam kser ka lei orom.”

⁵Va e Jesus tkoripang ngar te, “Mare, vanangko tgi havae tok, ekam ko mularo papat ngma vle gi kaendel pum E Nut kngam ge. ⁶Vanangko tennik mniam o kolkhek ruk E Nut tkueng o tgoluk, ta kueng o mia he kmommen mar kam vle te, lurokol va lraip. ⁷He ekam ko E Nut tkueng o mia tok, a ngokol nak parem kteit va knan he mrua pet orom kmikkiem ktavlom, ⁸min kam kaum ka vle te, min atgiang. Gi enang tok, ngint lo kta vle te, langto ge langto ge e. Ko her min atgiang he, min kam vle atgiang. ⁹He enang tok, ekam ko E Nut tngam min mo kmin enang tok, va muk ruk o gi mia, mguak or kam ngatkal mang a mhel tang kam kser min mo kmin e.”

¹⁰E Jesus ta re tok, to thera vaik kun ma rek. Ko tok, kalngunes ngata kta mnganang mang karo rhek kat. ¹¹Va e Jesus ta reng ngar te, “Enangthe a ngokol tang napa kser ka lei, nang kle klei orom a vlom tang ko yok, yek endo yek, a mhel to endo tmi kaeharom a kerkeknen ngang ktavlom to ta ktar lei orom ko ta kpoot mang ngina lei tok arhe. ¹²Va ta vle tok kat ngang a vlom to napa kser ka lei kar katngokol, nang kle klei orom a ngokol tang ko yok, ko en kat ta kpoot mang ngina lei, enangthe npa lei orom a ngokol tang ko yok enang tok.”

Endruk E Nut Ka Tavgo Ta Komor Mar (Mt 19.13-15; Lk 18.15-17)

¹³To ko tok, o mia ngat kurkeik kim e Jesus orom o ngnes kam lol ngok kim, en kmel kalo ktiekuon mang ngar kam ngamyammok mang ngar. Ngat kurkeik kim tok, to kalngunes ngata kner mar. ¹⁴E Jesus tvokom mar ko ngta re kmekon mar tok, to ka vrek ta kiin ngang ngar he kreng ngar te, “Mguak orim mar kmaol ngte kim dok na, ekam ko o mia ruk ngat kaenang o ngnes ruk enang endri, her mar ruk arhe E Nut ka tavgo ta komor mar. ¹⁵Ii, lmien ko kua havaeng nguk te, mguak toot he ka nho na, ko endo nam lua kolaspa kam tting kam vaik ku meorom E Nut ka tavgo enang o ngnes ruk endri, ko mar ngam gia kolaspa mang o tgoluk

enang tok, va en tlo kais hak kam vaik ku meorom e. Nop hak!” 16 To e Yesus thera kaorom o ngnes akuruk he kael kalo ktiek kuon mang ngar kam ngamyammok mang langto langto mniam mar tok.

**Ta Kellet Ngang A Mhel Kam Kaum Kael A Gol Ka Pun Ktar Ko Pum
Kalo Keik Va Ka Vaik Ku Meorom E Nut Ka Tavgo**
(Mt 19.16-30; Lk 18.18-30)

17 To E Yesus ta re kam parem a mhe to endo, to a mhel langto ta sap ko kim he ktubulkek ku penharom to ka mnganang te, “Pattermia, yin a mhel a yar, he havaeng dok na te, nguak kaeharom anito, he nang dok kmis mang E Nut kmen a ktalhok to kam plong vle ko kim En ngnik ngnik ngang dok?”

18 Va e Yesus tkoripang te, “Kman ko ya mon dok te, a mhel to a yar, ko gi atgiang En tuk a yar, gi E Nut tuk arhe, nang nong a mhel tang ko a yar kat e. 19 Yin mruo ya mnor mang o pos ruk endri te, ‘Or kam por mia, or kam kpoott mang a lei, or kmuruvik, or kam ppiak kam mon ilenar orom o kerkeknen ko kim endruk ngma vongnek kim o rhek, or kam kauyang o mia kmuruvik mkor mar, va ngiak totu pum iteit va inan.’”

20 Va a mhel to enda tkat koripang e Yesus te, “Pattermia, te o pos ruk endri ko elha kam sim kut kaikkiem mar tiok he ko dok a gi kalyie vop kam ngae kais tete.”

21 E Yesus tre ngan ko ta re tok, to kalo keik ngint kaem a mhel to endo to te sei kmelongtok mang to hera reng te, “Vanangko a tomhel langto yi lo eharom vop. Ngiak ngae he klol ilaro tgoluk tgas he kaenik ngang o mia, mar kmenkim mar mkor in. To ngiak lol o kreke he le kaenik ngang o mia ruk ngma tu kim o tgoluk. Ngiak kaeharom tok, he nang yin kam kol a ktalhok to kam plong vle ko kim E Nut ngnik ngnik ko a ktalhok to endo ta vle enang ila gol ka pun to kmelpas orom kuon ma volkha. Ii, ngiak kaeharom tok knop, to her kaol he kaikkiem dok.”

22 A mhel to endo tngan e Yesus karo rhek ruk endruk to ka spang tho mi kut ksir hak. To ther gia him kalo ktiek he ksei kam mrung en mruo ko karo vu tgoluk ka ho vurgem hak. Ii, thim kalo ktiek to hera ngae kparem e Yesus mar.

23 Ta ngae, to e Yesus thortgi ngok kim kalngunes he kpetela mang ngar to kreng ngar te, “Ner vua kellet hak ngang o mia ruk ngaro vu tgoluk, mar kam vaik ku meorom E Nut ka tavgo.”

24 Tre tok, to kalngunes ngta sor kim karo rhek. To e Yesus thera reng ngar te, “Kolenar, kua mien ha, ko tmia kellet hak ngang o mia kam vaik ku meorom E Nut ka tavgo. 25 Ii, tlo vua kellet tok ngang a ngaemslang to alautar hak to a kamel kam khanang kam vaik ku meorom ke gudor tang ko ke mi laut. Vanang a mhel to karo vu tgoluk, ta kle ho mi ktua kellet hak ngang en kam vaik ku meorom E Nut ka tavgo.”

²⁶Kalngunes ngta ngnek tok, to ngat ho mi kut kait ngaro ngaongtok kim karo rhek to kle kmo mnganang ngar te, “Enangthe karo rhek ngata mien, va nop a mhel tang hak tkais kam mrua sulgim en mruo he kvaik ku meorom E Nut ka tavgo hak kat e.”

²⁷To e Yesus kalo keik ngint kaem mar to thera reng ngar te, “O mia kam mrua sulgim mar mruo kam vaik ku meorom E Nut ka tavgo ngat ho lo mi ktuis hak kmeharom tok e. Vanangko E Nut tmi ktuis kmeharom o vrong mia tgus he kaeharom mar he ngat kais kam vaik ku meorom.”

²⁸To e Pita tkaelha kam havaeng e Yesus te, “Vokom na, endruk ya rere mang ngar ko ngat paparem ngakro vu tgoluk tgus, nang kle kaikkiem yin, her mor ri arhe.”

²⁹Tkaelha kam re tok, vanangko e Yesus ta kser e Pita karo rhek kam reng te, “Ko smia mien ngang nguk te, ani mhel to tparem ka rengmat, i o kaornopeik, kaorotmeik, kaortek, kaornek, i o kles ko ta kor mniam en mang dok he khavaeng o mia mang a knovvur, ³⁰va a mhel to endo E Nut ner ho mia klang mo tgoluk he nera vle kia vul ormar tete mniam a venloot to enda. Ii, E Nut nera klang orom o rektor akuruk, o kaornopeik akuruk, o kaorlok akuruk, o kaorotmeik, o kaoroyel, o kaornek, o nges, va o marhok akuruk kat. Nera lol mar tgus kar o vnek kat tete, ko o mia ngara kol a regesal mang vgum dok. Va koknaik kat mniam a venloot to nera pis yek, a mhel to endo nera kol a ktalhok to kam plong vle ko kim E Nut ngnik ngnik kat. ³¹Vanang o mia ruk ngaro mnok ngta laut tete, kavurgem mniam mar E Nut ner kle ka krus ormar koknaik. Va tok kat ngang endruk ngaro mnok ngta grung tete, ko her kavurgem mniam mar tok kat arhe E Nut ner kle khover mar koknaik.”

E Yesus Ta Re Kngam Ngkorlotge Mang Ka Yor (Mt 20.17-19; Mk 8.31; 9.30; Lk 18.31-34)

³²To e Yesus ta ktong kalngunes he kaikkiem a ngaelaut kam grap ngogouon mYerusalem. Va kalngunes ngat kaikkiem he ksor kim va endruk pekam mar ngta gor kat. To e Yesus ta kta nglum mar ruk loktieck hori orom alomin petgim o mia he kta havaeng ngar mang o vnek ruk nga re kam pis kim. ³³Thavaeng ngar te, “Vae, mu vokom na, ko ngruaka grap ngogouon mYerusalem he A Mhel To Nkong Man Ma Volkha o mia ngar kael ko maktiegom o pris ruk laol va o pattermia kmo pos, mar kam monik kim a yor ngang. To ngar kle kael ko maktiegom o vrong rhek ³⁴he ngara klel orom he kguguspa mang to kirmekon a khap mniam, to le kaim kngam a yoror. Ii, ngar kaeharom tok ngang, vanangko ko pekam o kolkhek ruk korlotge kat, ner kta hop petgim ka nnak.”

A Keknen To Kam Kol A Munik To A Laut
(Mt 20.20-28)

³⁵To e Sebedi klo hal ruk e Yems kre Yoanes ngint kaol kpis ko kim e Yesus he kreng te, “Pattermia mota svil mang yin kmeharom a ni vrong tomhel to mota mnganang yin mang.”

³⁶Va e Yesus ta mngan te, “Meta svil mang dok kmeharom anito ngang ngae?”

³⁷Va minta re te, “Ngiaka tting orom muo kun mniam a kolkha to o mia tgus ngak vokong ila lo ktiek vgum ila tavgo ko na re kvaas kim o mia tgus he komor mar, va moak kol alo ngaekam ruk E Nut nma nho orom min, tang ko vanam ila miktieks va langto ko vanam ila ksienga, muo kam kaum kar yin kam nho mang o mia kar yin orom ila tavgo ko tok mniam ilia yammok.”

³⁸Va e Yesus tkoripang ngin te, “O-o, met ho mi ktua ketoptop hak mang dok tok arhe, ko meta pat re te, met kais kat kam lol o nganngannes ruk dok mruo ngora lol gi? Va a vnek to ketasuo kam vuvvuem dok ko nera vle enang a ye ko nma vuvvuem a rengmat, va met kais kam vaging a vnek to endo kat?”

³⁹Va mint koripang te, “Ii, mot kais!”

Va e Yesus tkat koripang ngin te, “Nop, o vnek ruk ketasuo dok kam lol, va mae kat mera lol metakor. Va a vnek to ketasuo kam vuvvuem dok, va mae kat mer mia vaging metang gi enang dok tok kat.

⁴⁰Vanangko kam mon te, erie minduk minera korsang ko vanam kua miktieks va langto ko vanam kua ksienga, kam kaum kar dok kam nho mang o mia, a papat to endo nong kua ngaeha to dok kmeharom e. Gi E Nut tuk to ner mur kaen alo ngaekam ruk ennginduk ngang alo ni mhel ruk En mruo ta ktar el ka papat mang ngin tennik kmen alo ngaekam ruk ennginduk ngang ngin.”

⁴¹To nginlenar ruk loktieks ngat re ngnek mang a rere to endo va ngaro vurkul ngat kaelha kam kiin hak ngang ngin. ⁴²To e Yesus ta vaeng ngar tgus ngok kim to kreng ngar te, “Muk, muta mnor he mang o vrong rhek ngakro taven kar ngalmialao ngakro keknen ko ngam mrua kansgum mar mruo kam kol a ngaekam to kam nho mang ngakro mia mruo, ngola? Ii, ngma karkar mang ngar he o mia ngma kerkolkol vgum ngaro serppak. ⁴³⁻⁴⁴Vanang kun pgegom muk, na lua vle enang tok ngang nguk e, ko endo mniam muk naka svil ka munik kam laut mang klenar, mar kam nho orom, va her endo arhe na kle mrua krus orom en mruo, nang kle gi kaeha ngang nguk ha! Mare, na kle ho mi ktua krus orom en mruo, nang kle gi kaeha ngang nguk tok arhe! ⁴⁵Ii, en naka vle tok arhe kmikkiem gi enang A Mhel To Nkong Man Ma Volkha, ko si en mruo kat tpis nong mang o mia kmeha ngang e. Nove, ta kle kpis kam mrua slak

orom ka vok mruo kmel ekmar orom ka vok to endo, he nang kam kta lol mar tgus kam kta vle ngang E Nut kat.”

E Yesus Tkaeharom A Vivisker To E Bartimeas
(Mt 20.29-34; Lk 18.35-43)

46 E Yesus mar ngata ngae ekam a ngaelaut vop to kpis kun ma rengmat to e Yeriko. Kam ngae, to ngata parem a rengmat to endo kar kalngunes kam kta ngae kat. Va a momu alautar tkaikkiem mar kat. Ngta ngae, va vgum a mhel to tvipsik ko tkorsang ko vanam a ngaelaut he kngangarang o mia kmo krek. A mhel to endo, ka munik te, e Bartimeas, endo e Timeas khal. **47** Ta vle he kngangarang o mia tok, to ka ngnek te, e Yesus to nkong mNasaret ta ngae ekam a ngaelaut. Ta ngnek tok, to her kaelha kam vui orom te, “O-e Devit kaes to yin, Yesus-o, ngiaka mrung dok vanie!”

48 To o mia kavurgem ngta vokom tok, to ngat kaekon kim kam hagam kam rere. Vanangko ngat le ho gi kaoppom klik en kam ho gia vui klik kat ge te, “O-e Devit kaes to yin e Yesus-o, ngiaka mrung dok vanie!”

49 To e Yesus ther gia sir ko va ngaelaut to kreng o mia te, “Mu vaeng endo ngte kim dok na.”

To ngta vaeng he kreng te, “Serpak na, ko thera vaeng yin he. Hop sir!” **50** To e Bartimeas thera hop klik kngam ka yet to kuon mail petgim he kngae ngok kim e Yesus.

51 To e Yesus ta mnganang te, “Havaeng dok na, ya svil mang dok kmanker in?”

Va endo ta vipsik ta reng te, “Pattermia, kua svil yin kmeharom kua lo keik, he dok kam nho!”

52 Va e Yesus ther gia re te, “Yu, ngiak ngae he! Ko kaeharom ila lo keik he ngint ya he, ekam ko yi kor mniam yin mang dok kmeharom tok.” A gi hi to e Yesus tgia re tok, a mhel to endo ther gia nho ngatngae, to her kaelha kmikkiem e Yesus ekam a ngaelaut to ngogouon mYerusalem.

O Mia Ngat Kael Kavres Orom E Yesus Kmit Ngogun mYerusalem
(Mt 21.1-11; Lk 19.28-40; Yn 12.12-19)

11 **1** E Yesus mar ngta ngae he konner a rengmat to e Yerusalem ko ngat pis ko va ngaelaut to mang alo rengmat ruk e Betpagi va e Betani kuon kim ke vul to e Olip. To e Yesus thera meng klo kaloyie aloruk kam ktar mang ngar **2** ko thavaeng ngin te, “Meaka ktar kngae ngok ma rengmat tma kuon he mera vaik mniam a rengmat ka gu he mera pis mang a dongki to ke sie ko ngta kleng he tgia sir. A mhel tang tlo sap orom vop. Meak pis mang va meak halger a ngausie pum he it ngte kim dok. **3** Nang enangthe tang naka mnganang ngae mang te, ‘Ngola, meta halger a ngausie pum a dongki to kman?’ va meak koripang te, ‘Ngoldaip ta re mang he ner lo hus kam gi kat kaekon kmeknik ngok kim yin kat e.’”

⁴Ta reng ngin tok, to ngint hera ngae her gi pis mang a dongki to ke sie ko ngta kleng ko va rek ka gudor ko ma mmok ekam a ngaelaut. To ngint hera halger a ngausie pum. ⁵Ngint re khalger a ngausie pum to o mia akuruk ruk ngta sir ko tok ngta manganang ngin te, “Met kan ko meta halger a ngausie pum a dongki to ke sie to endo?” ⁶Va ngint her gi koripang ngar gi enang ko e Yesus ta kenang ngin tok. To ngta ngatkal mang ngin to ngint hera kol a dongki to ke sie kait kngorom. ⁷Ngint kait kngorom kpis ngok kim e Yesus to le kpasrengem orom nginaro it. To e Yesus ta grap korsang kuo mang to le ksap orom kmikkiem a ngaelaut. ⁸Ta ngae va o mia kavurgem kun mniam a mumu to tveet ekam, ngat kaelha kam pasrengem a ngaelaut kam vevher ngakro it ekam. Va akuruk ngta kuung o kneng ngo hor ko ma lootpgeik he kaenerik ekam a ngaelaut kat. ⁹Va endruk ngata ktong e Yesus kar endruk ngata knaeck mang ngat kaelha kam mariu orom va kael kavres orom kat te,

“Ngota kanprim yin ko her yindo kam sulgim mor arhe.^d ¹⁰E Nut ta ngamyammok mang ka taven to yin ko ya pis orom ka munik. Ii, yindo ngores to e Devit kaes to E Nut na ngamyammok mang ko ketasuo yin kam pis orom ila tavgo to na komor o mia tgus. He ekam tok, Ngruera kanprim E Nut to man ma volkha ko her En arhe Endo tel yin kam sulgim mor.”

¹¹Ngata hivuo kam kni kngorom tok, to e Yesus thera vaik ngogun mYerusalem he. To ta ngae kvaik kun mniam E Nut ka maksien he gia punpa kun mniam he kvokom o tgoluk tgus. Vanangko ekam ko a kolkha tre kam vaik, thera ngae kaeknik ngok mBetani kar kalngunes ruk loktieb hori orom alomin.

E Yesus Ten O Rhek Mnam A Ho To A Pik Kam Vui (Mt 21.18-19)

¹²To hop enang ngomo, e Yesus mar ngta parem a rengmat to e Betani he kat ngae ekam a ngaelaut to kam grap ngoguon mYerusalem va e Yesus ta vang. ¹³Ta ngae va vokom a ho to a pik ko ta sir vur hagenmok mang orom karo vu im ruk o gunsur. To thera ngae ko rkieng kam nho ko vgum. Tpis ko kim va tngae lo vur vokom kakro miel ngang hak. Kakro gi im tuk ko nong a ho ka main kmehi vop. ¹⁴To ther kaen o rhek mniam te, “Yin ke pik to enda ngia lo kat kaehi, o mia kam lo kat kaemik vgum yin kmelha tete kam ngae kais ngnik ngnik kat.” Va kalngunes ngta ngan kakro rhek ko thavae tok.

E Yesus Ta Kerer O Mia Kun Mnam E Nut Ka Maksien (Mt 21.12-17; Lk 19.45-48; Yn 2.13-22)

¹⁵To ngta ngae to kpis ko mYerusalem to e Yesus thera ngae kta vaik ogun mniam E Nut ka maksien. Ta vaik, to her kaelha kam kerer endruk ngma kanko kmelel o tgoluk, o mia kmenenkim mar mkor mar, nang

^d 11.9 A re to lHibru lsir ta vle te, “Hosana”.

kle ka nngiar ngang E Nut ormar. To thera kootmerom o psen ruk mkor endruk ngma mopatap orom o kreks. To tle kootmerom o ngorsang ruk mkor endruk ngam kael o giu, o mia kmenkim mar mkor mar kam le ka nngiar ormar kat.¹⁶ Va tle ka kser o mia kam lo kta lol o gi vrong tgoluk he kngae kpoottom a ngaelaut ko tok mniam E Nut ka maksien ormar kat.¹⁷ Tkaeharom tok, he keknen ngang ngar te, “Nok mut lua mmok mang E Nut karo rhek ruk ngat ittiegom mar ko ngat havae te,

‘Kua maksien ka ngaeha ka pun na gia vle tuk her gi mang a ngaeha to kam ngarkie mniam, he nang o vrong rhek tgus kam ngarkie ko tok.’

Vanangko muk ri, mut her hortgem ka ngaeha ka pun msim ko mut kle kael enangthe a mhe to kam vaik kun mniam kmurur o mia ngaro kreks. Ii, mut hortgem, he en ta kle kpis enangthe a kre ka nho to o ngauruvik ngma tvok mniam kam totokim mar he koon mang ngar.”

¹⁸ O pris ruk laol kar o pattermia kmo pos ngta ngan ko e Yesus teharom tok, to endo yek, ngat kaelha kam riring a ngaelaut tang Ivongnek, he nang o mia kmim kngam a yoror ko ngta gor te, o mia ngar mrua ksir petgim mar, nang kle kaikkiem en, ekam ko ngat itit ngaontok kim kakro rhek.

¹⁹ To a kolkha tre vaik, to e Yesus kar kalngunes ngat kat kottek kun mniam e Yerusalem to her kta ngae.

A Ho To A Pik Ka Keknen

(Mt 21.20-22)

²⁰ To hop enang ngmo marot, E Yesus mar ngat kta hop he kta ngae. Ngta ngae ekam a ngaelaut he kta pis mang a ho to a pik to kvokom kakro im va kakro kavgot tgus ko ngat her gi vui ngatngae. ²¹ To e Pita ta pat mang e Yesus ko ten o rhek mniam a ho to endo to kreng te, “Ngoldaip, vokom a ho to yen o rhek mniam, ko tngae her gi vui ngatngae he.”

²²⁻²³ Va e Yesus tkoripang te, “Ii, va kua havaeng nguk lmien te, mguak kor mniam muk mang E Nut te, En tkais kmeharom o tgoluk tgus, nang mu or kam lopumtang mang e. Ko endo na si kaen o rhek mniam a vul to enda kam reng te, ‘Hop ko tok, he kle kngae ksir oguo mou’, va a vul to enda ner mia ngan vgum. Ii, nera ngan vgum enangthe a mhel to endo na kor mniam en mruo mang E Nut te, E Nut ner mi kais kmeharom karo rhek, mar kmel mit kmikkiem enang ko tkor mniam en mang E Nut tok. ²⁴ He ekam tok, o gi vrong tgoluk ruk mum kaurur kim E Nut mang ngar, E Nut ner kaenik ngang nguk enangthe mup kor mniam muk mang En kmenik ngang nguk enang tok.

²⁵ Ii, mguer kais kmeharom tok, vanang enangthe ngiaka ktar ksir he kngarkie ngang E Nut malpgem a tutu to ila tel ngang in, va ngiak kol

ila to endo ka kerkeknen patgiang ngaiting he kikiangae mang enangthe ipa svil mang iTeit tkuon ma volkha kam lol ilaro kerkeknen patgiang ngaiting he kikiangae mang ngar tok kat.” [26 “Vanang enangthe mgua lua ktar klol o mia ngaro kerkeknen patgiang ngaiting he lua kikiangae mang ngar, va mu Teit tkuon ma volkha ner lua lol mutakor patgiang ngaiting he lua kikiangae mang ngar tok kat e.”]

Ngata Mngan Pum E Yesus Ka Serppak
(Mt 21.23-27; Lk 20.1-8)

²⁷To ngta ngae ekam a ngaelaut to kpis kta vaik kun mniam E Yerusalem kat. To e Yesus tngae he kpunpa kun mniam E Nut ka maksien to o pris ruk laol kar o patternia kmo pos va o Yuda ngalmialao ngat kaol kpis ko kim ²⁸he ka mngan pum te, “Erieto tmeng yin kam kerer mor tok mo mniam E Nut ka maksien ta?”

²⁹Va e Yesus tkoripang ngar te, “Vanang dok kat, ngor le ka ktar ka mnganang nguk kat na. He mgua re oripang dok, to dok kat, ngor le koripang nguk kam havaeng nguk mang Endo tmeng dok kmeharom tok.” ³⁰Thavaeng ngar tok, to le ka mnganang ngar te, “Erieto tmeng e Yoanes, en kam parrum o mia, E Nut tkuon ma volkha, i o a gi vrong mhel tang? Mu havaeng dok na!”

³¹To ngata mo hem mar mang a papat to endo, to mo reng ngar mruo te, “Ngola, enangthengrua re koripang he re khavaeng te, ‘E Nut to tmeng,’ va en ner kle kaekon ngang ngor te, ‘Va kman ko mut lo kor mniam muk mang?’ ³²Va ngot ho lo kais kat kam havae te, ‘A gi vrong mhel tang to tmeng.’” Ngata havae tok, ko ngata gorang o mia pum e Yoanes, ko mar tgus ngtel ngaro papat lserppak mang e Yoanes te, en a mi propet langto.

³³He ekam tok, ngat her gi koripang e Yesus te, “Ngot lua mnor mang e.”

Va e Yesus tkat tkoripang ngar tok kat te, “Te dok kat, klo kais kam havaeng nguk mang Endo tmeng dok kmeharom a ngaeha to endo kat e.”

E Yesus Ta Koka Mang O Yuda Ngalmialao Ko Ngat Keyang
(Mt 21.33-46; Lk 20.9-19)

12 ¹Ko pekam ka re to endo, e Yesus tkaelha kam koka ngang o pris ruk laol kar o patternia kmo pos va o Yuda ngalmialao kam havaeng ngar te, “A mmie kteit langto tkaeharom ka loot. Ta kurhennek krum to kngam a pal kam paneng a loot kam ttek, va kngam a rambel langto kam toot mang a loot kat. To tkael sarek mniam ngang o mia kam kavang ngaro ol, nang en thera ngae mniam a mhe langto ko yok. ²Kam ngae, to ka loot ta tettek he, to a mmie kteit thera meng kalkayie langto ngok kim endruk ngat tutuur mniam ka loot, mar kam lluol ngang

he ktatar en mang a mmie. ³Kalkayie tpis ko kmar, vanangko endruk ngata tutuur mnam a mmie kteit ka loot ngta vle her gi im to kaekon tgia ngongae kaeknik. ⁴To a mmie kteit ta kta meng kalkayie langto kat ge ngok kmar. Va enda, ngat him singni malpgem he kaeharom o kerkeknen ngang, endruk kam ho mi kut ngamleep mang hak. ⁵To ta kta meng kalkayie langto vat ngok kmar. Va enda, ngat por kngam a yoror. Ngat eharom tok ngang kalngunes akuruk kat ko mar kavurgem ko tmeng ngar ngok kmar enang tok kat. Va akuruk ngat kaim mar va akuruk ngta por mar kngam mar o yoror.

⁶To a her gi tgiang to tgia vle vop, endo khal msim vat. En khal to nam vu kaelongtok mang. Tpat re te, ‘Ngara totu pum ko hal msim ta.’ To ko pekam mar tgus, ta trong orom khal msim to endo kam meng ngok kmar.

⁷Vanangko endruk ngta tutuur mnam ka loot ngta mo havaeng ngar mruo te, ‘O, her khal msim to kam kol kteit ka mmie ta arhe. Ngor tarkanang he im, nang mor kam le kol a mmie ta.’ ⁸To ngat hera kapom he kpor kngam a yoror to ngat hera kokol ka mnes he kngam ngku mnok petgim a loot.’

⁹E Jesus ta rum ka koka to endo, to kle ka mnganang endruk laol te, “To muta pat te, a mmie kteit na kanker endruk ngat tutuur kun mnam ka loot? Te ner kle kngae kpis krum kim mar tgus hak, nang kle kael sarek mnam ngang o mia akor ko yok vat, ngola?” ¹⁰Thavae tok, to kle kaenserpagam ka re to te, “Te nok pathe mut lo him E Nut ka ngaittiek ta ge, ko thavae te,

‘Endruk ngma ngamrektor ngat keyang a ho langto he kait petgim a rek he ka vlengam. Vanangko a her gi ho to endo arhe ther kle ka vle te, a ho to mang a hokidek to arhe, endo kam sir orom a rek. ¹¹Va a ho to endo ta vle ngang ngar tok ekam ko Ngoldaip mruo ta mrua svil en kam mi ktua vle enang tok arhe. Va ngot vokom tok kat, he kngae kpat mang te, a papat to endo tngae gia yaya pum nguaro kerok he! ’ ”

¹²E Jesus thavae tok, to o Yuda ngalmialao ngata tar ko ta koka mang ngar lsir, to ngat sia khanang ngar kam kapom kmenpasiker kun ma hengor. Vanangko ngat lo is ekam ko ngata gorang a mumu pum, to ngat her gia parem kngae.

O Mia Nga Mur Kaen Mar Mruo Ngang E Nut (Mt 22.15-22; Lk 20.20-26)

¹³Kam ngae, to o Yuda ngalmialao ngta meng o Parisiau kar o mia akuruk kun mnam a valngan to mkor e Herot ngok kim e Jesus kmenen mkor, en kam mrua ru pum karo mur rhek mruo. ¹⁴Ngta pis ko kim e Jesus he pe gia kanprim te, “O, pattermia ngot sim ktua mnor miik, ko im vua mien orom ilaro rhek va ima patter o mia lsir kmikkiem E Nut

karo pos lsir. Va im lua ruokar kim o gi vrong mia kat e, ko ima rere he lo gia tar yin pum o mia akor kam pat mang ngar, nang ka mnang akuruk e. Nove. He ekam tok, ngiak havaeng ngor na te, ta sir ngang ngor ruk o Yuda kam ngam o takis ngang lRom ngalaip to ngma mon te, e Sisa, i o nop ge? ¹⁵Havaeng ngor na te, ngruak kaenkim a takis, i o nop?”

Ngat pe gia mnganang tok, vanangko e Yesus ta tar ko ngata kerruru enang tok, to kle ka mnganang ngar te, “Kman ko muta kendom ngang dok? Ma te, mu en a kre tang ngte ko vokom na.” ¹⁶To ngat her kait a kre langto he kaen mkor. To e Yesus thera mnganang ngar te, “Erieto ka nunu va ka munik ta vle kuo mang a kre to enda?”

Va ngat koripang te, “He e Sisa.”

¹⁷To e Yesus tkat koripang ngar kat te, “He ekam tok, mguak kaekon o tgoluk ruk ngta khenam e Sisa ka nunu ngak kat kaeknik ngang kat, vanang kle kaekon muk mruo ngang E Nut ko muta khenam E Nut ka nunu ormuk mruo enang tok kat.”

Ngta ngan karo rhek ko ta re tok, to ngat ho mi ktua sor kim karo papat.

Endruk Ngma Mokpom Kar E Nut Her Endruk Ngar Mia Hop Petgim

Ngakro Nnak Kam Kol A Ktalhok

(Mt 22.23-33; Lk 20.27-40)

¹⁸To vrua vle, to o Sadyusi akuruk ngat kle kaol ngok kim e Yesus vat. Vanang mar ngam ktua pat te, o mia ngama yor va ngar lua hop petgim ngakro nnak e. Endri ngat kaol kpis ko kim e Yesus he pe gia mnganang kat te, ¹⁹“Pattermia, tennik e Moses tittiegom a pos langto ngang ngor te, enangthe a mhel tang knopia nak yor parem ktavlom, nang nong kles ngang, va en nak kle kliepak ekam knopia to tyor, nang a vлом kam llues, en kam hover knopia ktavlom ka ngausie. ²⁰Yu! A pos to endo ta vle tok arhe, vanang enangthe napa vle tok ko o moornopeik aktiek hori orom alomin ngata vle tete mo kmor, to endo a molpou tlei to le kyor parem ktavlom, nang tlo llues e. ²¹To gi enang tok kat mang endo ko pekam ko ta liepak ekam knopia kat to ther gi kat yor kat, nang nong kles ngang kat e. To endo ko pekam min kat, ta le kta liepak ekam endo kat to kta yor. ²²Va si o moornopeik tgis ruk aktiek hori orom alomin ngta vle tgis tok, ko ngat yor kparem a vлом, nang tlo llues e. Kam ngae, to a vлом to endo kat ta le ktua yor vat. ²³To kmikkiem ke ngothoi to endo tok, koknaik mnam a kolkha to E Nut na kta hover o yoror petgim ngakro nnak, a vлом to enda naka vle te, edim mnam o moornopeik ri ktavlom msim to, ko mar tgis ruk aktiek hori orom alomin ngat lei orom?”

²⁴E Yesus ta ngnek tok, to kle koripang ngar te, “Nok pathe mularo papat ruk mang o yoror ngat lo vua sir hak, ekam ko mut ho lo kta mmok hak mang

E Nut karo rittiek va mang E Nut ka serppak kat e. ²⁵Ko E Nut ka papat to a minar mang o yoror ta vle ti te, mniam a kolkha to E Nut na hover o yoror, mar kam kol a ktalhok to kam plong vle ko kim En ngnik ngnik, ngar lo kat kael lraip, he lurokol kam kta lei orom mar kat e. Ko o mia ngar kle va kaenang o engyel ruk kuon ma volkha. ²⁶Vanang kun mniam E Nut karo rhek ruk mang o yoror, e Ebrehem va e Isak va e Yakop ngata khenam a papat to mang o yoror ma mmok te, ngar mi ktua hop petgim ngaro nnak. Vanangko nok pathe, mut lo him E Moses ka hor to endo vop? Ko kun mniam a ngothoi to mang ke turvek to a paei ta vurvur pum he lo kaem, E Nut thavaeng e Moses te, ‘Her dok ta arhe, dok to e Ebrehem va e Isak va e Yakop ngma vle ko kim dok he ktotu pum dok tennik kngae kais mang tete.’ ²⁷Ii, thavae tok, he ka khenam a papat to mang o yoror ma mmok te, endruk ngat kol a ktalhok to kam plong vle ko kim E Nut ngnik ngnik kam totu pum, her mar ruk ngata kta hop petgim ngaro nnak, nang nong endruk ngat yor he lo kta hop kat e.”

A Pos To A Ngaenpaeir (Mt 22.34-40; Lk 10.25-28)

²⁸Vanang langto mniam o pattermia kmo pos tkaol pis ko kim o Sadyusi he kngan mar ko ngata mo maen o rhek kar e Yesus. Ta ngan e Yesus ko tsim koripang ngar, to ta le kaenen mkor e Yesus kam pe gia mnganang kat te, “Ngola, kun mniam o pos tgus, edim mniam mar msim ta vle te, a pos to a ngaenpaeir he kir kim klenar tgus?”

²⁹Va e Yesus tkoripang te, “A pos to a ngaenpaeir he kir kim klenar tgus, enda ti te: ‘Muk IIsrael mguaka ngnek na, Ngoldaip to E Nut, En arhe mguia gia totu pum En tuk. ³⁰Ngiak kmelongtok mang Ngoldaip orom ila ngaung tgus, ila svil tgus, ilaro papat tgus va ilaro serppak tgus.’ ³¹Va a pos to ta knaek mang endo thavae ti te: ‘Ngiak kaelongtok mang ilenar kmikkiem enang ko im mur kaelongtok mang yin mruo kat.’ Nang nong a pos tang ta laut kir kim alo pos ruk enngindi e.”

³²E Yesus thavae tok, to a pattermia to endo ta kle khavaeng te, ‘Pattermia, yi sim oripang dok. Ko ya mien te, ‘Ngoldaip to E Nut her En arhe ngua gia totu pum En tuk, nang nong a tomhel tang kat e.’ ³³Va ya mien kat te, a keknen to kam ‘kmelongtok mang E Nut, he ka khenam tok orom nguaro svil, nguaro papat va nguaro serppak kat’, va a keknen to kam ‘kmelongtok mang ngolenar kmikkiem enang ko ngom mur kaelongtok mang ngor mruo’ ngint laut kir kim o keknen tgus ruk kam nngiar ngang E Nut orom o relot ruk ngoma momrot va o gi wrong nngiar tgus kat.”

³⁴E Yesus tngan a mhel to enda ko tsim koripang orom karo rhek tok, to thavaeng te, “Ketasuo yin kam vaik ku meorom E Nut ka tavgo he!”

To ko pekam e Yesus kakro rhek ruk endruk, nop a mhel tang hak ta kta re kmegom kta serppak mruo kam mnganang e Yesus mang a papat tang kat e.

A Hipun To E Devit Kalaip, Her Kaes To E Nut Thim Orom Ka Msasaen
(Mt 22.41-46; Lk 20.41-44)

³⁵ E Yesus ta patter o mia kun mniam E Nut ka maksien ka mhe to ko ma gi vle vop, to ka mnganang ngar te, “Nngia ko o patternia kmo pos ngma grung orom Endo E Nut Thim Orom Ka Msasaen ka munik kam gia havae mang te, en a hipun to e Devit kaes?

³⁶ Enangthe npa mien te, a hipun to e Devit ka munik ta laut mang Endo E Nut Thim Orom Ka Msasaen ka munik, va kman ko e Devit mruo ta kvam Endo E Nut Thim Orom Ka Msasaen te, Kaldaip to en? Ko E Nunu A Totur ten o rhek mniam e Devit he e Devit ta rere vgum E Nunu A Totur kam havae mang Endo E Nut Thim Orom Ka Msasaen orom karo mur rhek mruo ruk endri te,

‘E Nut thavaeng Koldaip te, ngiak tuur mniam kua tavo he korsang na, ko pa ngorsang to a miktieki, endo koma nho orom ko vanam dok kam ngae kais ko nguak kir kim ilaro imuo, yin kam karkar mang ngar hak.’

³⁷ Vanang mu vokom na. Ma te, enangthe tennik, e Devit mruo tmur hover kaes to E Nut Thim Orom Ka Msasaen kam mrua mon te, ‘Kaldaip to en’ tok, va nngia ko o patternia kmo pos ngam kaekon kim a hipun to e Devit karo rhek mruo kam le kmon Endo E Nut Thim Orom Ka Msasaen te, en gi kaes to mkor a hipun to e Devit?’

E Yesus ta keknen ngang ngar tok va o momu ho laol ruk ngta vle ko tok ngat ho mi kut svil hak kam ngan e Yesus karo rhek ko ngat mia mgae ngang ngar hak.”

Mguak Ngangreal Ngang Nguk Mang O Patternia Kmo Pos
(Mt 23.1-36; Lk 20.45-47)

³⁸ To e Yesus ta patter mar kngae orom o rhek ruk endri kat te, “Mguak ngangreal ngang nguk mang o patternia kmo pos ko mar ngam mrua hover mar mrua kam sreng orom o it ruk ngat ngae gia rarip ku he kpunpa ormar ko pum o mia ngaro kerok. Ii, va mar ngam mrua khenam mar mruo ma mmok ngang o mia ko po pnes, he nang o mia kam hover singni ngang ngar ko pum nglenor ngo kerok. ³⁹ Va mar ngma sovet kam mrua kakansgum mar mruo kam lol o ngorsang ruk o mia ngma nho orom mar ko mo pnes va endruk kun mniam o Yuda ngaro rektor ruk kam rere mniam mar kat. ⁴⁰ Va ngma kauyang o tahek he klikim mar kun mniam ngaro rektor mruo, nang kle klol o rektor ruk endruk ngang ngar mruo vat. Va ngam ngorom a hoger ngaro ngarkie khogerik ko pum o mia ngaro kerok, he nang klenar kam gia vokom mar tok to le kanprim mar. Ii, o mia ruk ngat kaenang o patternia kmo pos tok, her endruk E Nut ner ho mi ktua monik kim o ho kapnes ruk lho vankue hak ngang ngar arhe kir kim o kapnes tgus hak.”

A Tahek Tngam A Nngiar To E Nut Ta Sirei Mang
(Lk 21.1-4)

⁴¹ E Yesus ta vle kun mnam E Nut ka maksien vop to le korsang he ka
 nho rkieng ka ngaelpas, endo o mia ngma ngam ngaro nngiar ngang
 E Nut kun mnam. Ta vle ko tok he kvokom a mumu ko ngta mopatap
 kam ngam o kreke kun mnam. Ii, tvokom endruk ngakro vu gol ko ngata
 sovet kam ngam ngakro kreke laol kun ma ngaelpas to endo. ⁴² Vanangko
 tvokom kat ko kela a tahek langto ko en ho mi kut nop o kreke ngang hak
 ko ta kol kelo kre ruk lo svel he kpis to vrua ngam min kun ma ngaelpas
 kat.

⁴³ Tvokong tok, to kvaeng kalngunes ko kim he khavaeng ngar te,
 “Kua mien ngang nguk te, a vлом to enda tngam ka nngiar kun mnam a
 ngaelpas tho mi kut kir kim o mia tgus ruk endri hak ⁴⁴ ko mar tgus ruk
 ngta nngiar ngang E Nut, ngat gia vethas orom ngakro vu gol ngarkero gi
 mhetor mnam mar ruk ka ho vuvurgem hak. Vanang a vлом to enda, ta
 kle ho mi ktua nngiar ngang E Nut orom kelo kre ruk ennginduk ko tmia
 rum kim ennginduk tre kpas kmin kmenkim o ol ngang ormin.”

E Yesus Ta Ktar Kpavap Mang E Nut Ka Maksien Te,
IRom Ngara Memget
(Mt 24.3-14; Lk 21.7-19)

13 ¹ E Yesus ther ottek kun mnam E Nut ka maksien to kalkayie
 langto ta kalpak kim o rektor ruk ngat eharom mar orom o kreke
 he kngam a maksien to endo ormar. Ta re te, “Pattermia, vokom o kreke
 ruk endri ngat sim kut tetgem mar kmeharom o rektor ri lvu yar hak.”

² Va e Yesus tkoripang te, “O rektor ruk lvu yar ruk endri ko muta
 vokom mar tete, koknaik nong ke vur kre tang hak mnam mar ner kais
 kam kta kru kuon mang kaela ngang kat e, ko o mia ngara pis kmemgetik
 tgus krum kim mar hak.”

A Kolkha To A Kser Kim Karo Ngaelmir

³ Kam ngae, to e Yesus tkorsang kuo kim ke vul to e Olip to ngkun kut
 he ka nho rkieng E Nut ka maksien ko ta vle ku. To kalngunes ruk e Pita,
 e Yems kre Yoanes va e Andru ngata mnganang ko mar tuk te, ⁴ “Ngola,
 havaeng ngor na te, mnam ani kolkha to msim ilaro rhek ngar kael mit
 mnam? Va a kolkha to endo karo ni ngaelmir ruk ngaka ktar kpis, he E
 Nut kmaottam ilaro rhek kat?”

⁵ Va e Yesus ta kle khavaeng ngar mang a kolkha to a kser kim te,
 “Mguak ngangreal ngang nguk tete matok o mia ngara vraik ormuk
 petgim dok. ⁶ Ko ktar mang a kolkha to a kser kim kam pis, o mia
 kavurgem ngara pis he mur kaelel mar mruo orom kua munik. Ngara pis

tok, he langto langto ner mrua havae mang en mruo te, her en arhe Endo E Nut Thim Orom Ka Msasaen. He enang tok, o mia ri la ppiagar ngara vraik orom o mia kavurgem. ⁷Ii, va ktar mang a kolkha to a kser kim kam pis kat, mguera ngan o ngaus ngaro muktim va mguera lol o rhek pa nghek mang o ngaus kat. Pu tok, vanangko mguak ngangreal ngang nguk kam lua gor, ko o tgoluk ruk endruk ngaka ktar kpapagis mang a kolkha to a kser kim. Vanangko a mi kolkha to endo ngnok vop. ⁸Ko o mhetor kavurgem va o serppak kavurgem ngaka ktar khop na, he kmo sir malngaeng ngar mruo na, he kmo kir mo kmar. Va a vang nera vle kun mniam o mhetor kavurgem va a koot naka khikher o marhok kavurgem klik kat. Ii, o ngaelmir ruk endri ngta vle te, a kolkha to a kser kim karo gi ngaelmir gi enang ko a vлом kalyie nam kaimim kmel a ngaelmir ngang te, ka kolkha to kam llues ta pis he.

⁹Ii, mniam o kolkhek ruk o ngaelmir ruk endri ngak pagis, mguak ngangreal ngang nguk mruo ko o mia ngar kael muk ko maktiegom endruk ngma vongnek kim o rhek, va akuruk ngar kaimim muk orom a khap kun mniam o Yuda ngartaro rektor ruk kam rere mniam mar. He enang tok, mguia hera polger o rhek mang dok ngang ngar her ko tok arhe. Ii, va ngar kait muk ka srim muk ko kim o taven va ko kim a gavman ngalmialao kat gi ekam ko mut kor mniam muk mang dok. He her mula venloot to arhe, muk kam polger o rhek mang dok ngang ngar. ¹⁰Enang tok, o wrong rhek tgus ngaka ktar kngan a knovvur na, to endo yek a kolkha to a kser kim nak pis.

¹¹Ii, o mia ngara srim muk ko pum mar enang tok, vanangko ktar mang tok, mguak or kam vua papat mang oni rhek ruk mguak polgerik mang dok ngang ngar. Ko oni rhek ruk mguak polgerik mang dok, E Nunu A Totur ner kle yek kaen o rhek ruk endruk mniam muk. Ko mniam ke venloot to endo msim her E Nunu A Totur to arhe ner mur kaelre ko vgum muk enang tok orom o rhek ruk endruk.

¹²Ii, o mia ngar kaeharom tok ngang nguk, ko si o moornopeik mruo, va o motter mruo ge, ngar mur kael mar mruo ge maktiegom o mia kmim mar kngam mar o yoror. Va o nges kat ngar kle klaut mang ngaortek ngaornek kat kmel mar ko maktiegom o mia kmim mar kngam mar o yoror. ¹³He enang tok, o mia kavurgem ngar kaelat muk ekam ko mut kor mniam muk mang dok. Vanang endo nak matnge vgum o vnek he kle kor mniam en mang dok ge, kngae kais mniam a kolkha to a kser kim msim, E Nut nera sulgim en he kaen a ktalhok to kam plong vle ko kim En ngnik ngnik ngang.”

A Kolkha To O Mia Ngara Rum Kim A Rengmat To E Yerusalem (Mt 24.15-28; Lk 21.20-24)

¹⁴“To mguera vokom E Nut ka imu, endo nera likim o mia kun mniam E Nut ka maksien, ko nak pis ksir kun mniam E Nut ka maksien ko tok ko

E Nut tlua ttung mang en kam sir ko. (Vanang muk ruk muta him a hora, mguia sim ktua ngangam kmuk ekam o rhek ri na!)

Ii, mniam a kolkha to muk ruk ko mYudea mguia re kvokom endo ko nak sir ko tok, va mguak ngoropok kgegerap ngogouon kio vlik. ¹⁵ Va endruk ngtia vle ku mnok ko ma ngoumi, ngak or hak kam kta vaik ngogun ma rek kam momlom kat. ¹⁶ Ta vle enang tok kat ngang endruk ngtia vle ko gunkas ko ngak or kam kat kaeknik ngok mrek kam lol ngaro it kat. ¹⁷ Ii, va suvrum kekhengol ruk ngakro namtor va endruk ngat gia mmeng ngles vop mniam o kolkhek ruk endruk kat. ¹⁸ He ekam tok, mguak kaurur kim E Nut te, o kolkhek ruk endruk nga lua pis ko mniam a ven, he nang muk kam lua kar va ngaelaut ka gu kun ma kernonhommok to endo. ¹⁹ Ko mniam o kolkhek ruk endruk a kervavle alaut hak nera vle. Va a kervavle tang ko tennik ko E Nut ta kueng a mmie kngae kais mang tete, va si tang koknaik koknaik ner lo kaiser endo enda hak. ²⁰ Vanangko E Nut ner kait kokonor o kolkhek ruk endruk. Ko enangthe na re lo kait kokonor mang ngar, va nong a mhel tang hak to ner kais kam vle. Vanangko E Nut ner kait kokonor mang ngar, ekam ko ta pat mang kalngunes ruk tmur re pum mar kam vle ngang En mruo, kam hong ngar pum a kernonhommok to endo. ²¹ To enang tok, enangthe tang nak pis mniam o kolkhek ruk endruk he khavaeng nguk te, ‘Mu nho na, Endo E Nut Thim Orom Ka Msasaen enda he,’ i o ‘en tko gut ho,’ va mguak or kmor mniam muk mang o rhek ruk endruk. ²² Ko o propet ruk la ppiagar ngara pagis kar endruk ngara ppiak kmel mar mruo te, E Nut Thim Mar Orom Ka Msasaen. Ngar mia papagis orom o ngaelmir ruk kam reim sor mniam o mia kam mi ktua krong o mia ngaro vrontok kam vraik orom kavurgem mniam mar. Va si endruk E Nut tmur re pum mar kam vle ngang En mruo kat, va o kermia ri ngar kaegom kam krong ngaro vrontok he ka vraik orom mar kat, gi enangthe nga mi kais. ²³ Yu! Ko hera havaeng nguk he mang a kolkha to endo karo ngaelmir ktar mang ngar kam pagis. He ekam tok, mguak ngangreal ngang nguk mang ngar.”

**A Kolkha To Msim A Mhel To Nkong Man Ma Volkha Nera
Kser Kim Kpis Mniam
(Mt 24.29-31; Lk 21.25-28)**

²⁴⁻²⁵ “Vanangko gi ko pekam a kernonhommok ko nera vle enang tok, E Nut nera rpem a volkha kakro serppak orom o ketor he ngara harapeet kun kuon kia gan va a kolkha nera tep. Va a kenho ner lo kta mmok kat e.

²⁶ To endo yek, o mia ngar mia vokom A Mhel To Nkong Man Ma Volkha ko nera pis mniam o varhek orom kla saen va kla serppak. ²⁷ To ner kle kmeng kakro engyel kam ngae mniam a mmie karo ngaitngol tgus kam kakaum endruk E Nut mruo tmur re pum mar kam vle ngang En mruo ngok matgiang kam ngae krurum a mmie karo ngaitngol tgus hak.”

**A Koka To Mang A Ho To A Pik Ta Keknen Mang A Kolkha To A Mhel To
Nkong Man Ma Volkha Nera Kser Kim Kpis Mnam
(Mt 24.32-35; Lk 21.29-33)**

28 “Mu vokom a ho to a pik he kol a papat mang na. Ekam ko nam re kuur va mum hera mnor te, o, ka venloot to kmel rehi mnam ketasuo kam pis he. 29 Mare! Her gi enang tok kat arhe, ko mgua re kvokom o ngaelmir ruk endruk ko ngaka ktar kpapagis enang tok, va mgua hera mnor kat te, he ketasuo he A mhel To Nkong Man Ma Volkha en kam pis kat ko ngnok va ngaelaut ka gu he. 30 Ii, kua mien ngang nguk te, o mia nga main to enda tete, ngat lo kais kam yor vop kais ko E Nut naka ktar kaottam o ngaelmir ruk endri, mar kam pis pis lmien na. 31 Ii, a volkha kar a mmie nginera loloong, vanang kuaro rhek ngat lo kais kam loloong hak.”

**Nong A Mhel Tang To Ta Mnor Mang Ani Kolkha To Msim A Mhel To
Nkong Man Ma Volkha Nera Kser Kim Kpis Mnam
(Mt 24.36-44)**

32 “Vanangko a kolkha to a kser kim, nong a mhel tang hak to ta mnor mang ani marot to, i o ani vlemas to, i o ani kolkha to lsir A Mhel To Nkong Man Ma Volkha nera kser kim kpis mnam. O engyel ruk man ma volkha kat va si A Mhel To Nkong Man Ma Volkha to dok mruo kat ngot lua mnor mang ani kolkha to lsir kat e. Gi E Titou tuk to ta mnor. 33 He ekam ko a kolkha to enda nera pis pangnaom muk tok, va mgua ngangreal ngang nguk he sim kut kaelel kuo mang nguk mang kam paneng ko mut lua mnor mang a ni kolkha to msim nera pis mnam e. 34 Ii, a kolkha to A Mhel To Nkong Man Ma Volkha nera kser kim kpis mnam nera vle enang ko a mhel langto ta re kam ngae kpunpa ko ma mhe langto ko yok. Ko ta re kam ngae vanang ta ktar el karo reha ko maktiegom langto langto mnam kalngunes, nang kael tang ko va gudor kam nho mang ka rek. To mar ngata nho mang o reha ruk mkor ngalaip, nang en thera ngae kpunpa kun mnam a mhe langto ko yok.

35 Gi kmikkiem enang tok kat, mgua sim kut kaelel kuo mang nguk he koot enang tok kat arhe ko muk kat mut lo smia mnor mang ani kolkha to a rek kteit nera kser kim kmeknik mnam. Mgua smia toot enang tok, matok nap sia kaeknik pangnaom muk ma segain, i o ma ho segain ka ngaenvurgem, i o ko a ngaining tkaeti, i o mo kao. 36 Vanang suvrum muk ruk tkaeknik pangnaom muk ko mut hivuo kmonit he. 37 A re ta ko hera havaeng nguk orom, ko kle khavaeng o mia tgus kat her enang tok kat te, mgua smia toot he kpaneng.”

**O Yuda Ngalmialao Ngata Lgem O Rhek Kmim E Yesus Kngam A Yoror
(Mt 26.1-5; Lk 22.1-2; Yn 11.45-53)**

14 ¹Tie ma ngaelatong ko o Yuda ngma kunngir kim A Pnes To A Engyel Tvarpaam O Yuda Ngaro Molpou, endo ngma mon kat te,

A Pnes To Kmem A Gi Bret, o pris ruk laol kar o pattermia kmo pos ngta vle he ka khanang ngar kam riring a papat tang te, nngia he o mia ngar kais kam vur kaol ma mmek he kol a hagie mang e Jesus kmim kngam a yoror. ² Vanangko ngat mo havaeng ngar te, “O-o ngruak or kmeharom ma pnes ta e, matok o mia ngara kaum kaen ekmor mang.”

**A Vlom Langto Ta Glot A Ku Kuon Malpgem E Yesus
(Mt 26.6-13; Yn 12.1-8)**

³ Kam ngae, to e Yesus ta vle mBetani kun mniam a rek to mkor mhel to tkol a yor to a lepra tesgun. A mhel to enda ka munik e Saimon. E Yesus tkorsang ku mmie he khivuo kmemik, to a vlom langto tpis orom a ku to ngma mon te, a nat. Vanang a ku to endo ka keik to kmenkim te sei kam grap hak ko ngat eharom orom a ho to a nat ka kavgot ka ye va tlua movavaik kar a tomhel tang kat e. Va a ku to, ta vle kun mniam a kolhi to a kre to a alabasta ko o mia ngat hong mniam. To a vlom to enda tpis ko kim e Yesus, pet a kolhi to endo ka keik to ka glot malpgem.

⁴ To o mia akuruk ko tok ngat hera vokom a vlom to endo, to ngaro vrukul ngat ngae sei kam kiin hak to ngata mo reng ngar mruo te, “Kman ko a vlom ta tgia koham a ku ta ti e? ⁵ Ko en tis kmel ngang o mia, ngar kmenkim mkor ko ka keik te sei kam grap he npa lol o krek kavurgem hak to le kaenik ngang endruk ngta tu kmo tgoluk.” Ngt a havaeng ngar tok, to kle ka psom a vlom orom o rhek akuruk kat.

⁶ Vanangko e Yesus ther le kaekon ngang ngar te, “Mu orim! Mut lo kais kam rere pum a vlom to endo tok e! Ko en teharom a keknен to tho mi kut ya hak ngang dok. ⁷ Mguak orim ko tok, ko endruk ngma tu kmo tgoluk ngara vle mo kmuk lhok ge he muk kam turang ngar kmikkiem mularo svil. Vanang dok, ngor lo kta vle mo kmuk lhok kat e. ⁸ A vlom ta teharom kta ngaeha to kmiser en mruo ge, ko ta glot a ku to endo kuo malpgem dok tok. He enang tok, tkael a lte ormok kam pungnim kua vok enang tok arhe, mar kmeguyang dok he. ⁹ Kua havaeng nguk lmien te, mniam oni mhetor tgus ruk mo mmie ko o mia ngak polger o rhek ruk mang a knovvur va o mia ngar kta havae mang a keknен to a vlom ta teharom ngang dok tete, o mia kam kuvi mang kat kam vokong en orom.”

**E Yudas Ta Tting Mang O Krek Kam Hortgi Mang E Yesus
(Mt 26.14-16; Lk 22.3-6)**

¹⁰ To gi mniam a kolkha to endo gi, ngaela langto mniam o aposel ruk loktieh hori orom alomin ka munik e Yudas, endo nkong mIskariot thera ngae ngok kim o pris ruk laol kmel ka papat to kam hortgi mang e Yesus he kael maktiegom mar. ¹¹ Ngata ngan e Yudas kar rhek to ngata sei kam sirei alaut mang. To ngat kaenserpgam ka papat to kmenkim orom o krek. To e Yudas ther kaelha kam vur kael onit ngang e Yesus en kam mas orom he kael ko maktiegom mar.

**E Yesus Kar Kalngunes Ngta Kunngir Kim A Pnes To Ngma Mon Te, A
Engyel Tvarpaam O Yuda Ngaro Molpou
(Mt 26.17-25; Lk 22.7-14, 21-23; Yn 13.21-30)**

¹² Kam ngae, to tie ma palngaem, o Yuda ngam kaem a pnes to ngma mon te, A Gi Bret. Vanang mniam a pnes to endo ngam kaim o sipsip ruk o sital kam mur kael pat kim mar mruo mang ko a engyel tvarpaam o Yuda ngaro molpou ruk tennik. To e Yesus kalngunes ngat kaol ngok kim to ka mnganang te, “Ngola, ya svil mang ngor kmelel mo kim o olngaemik mniam ani mhe to, yin kam kunngir kim a kolkha to A Engyel Tvarpaam O Yuda Ngaro Molpou?”

¹³ To e Yesus thera meng klo kaloyie aloruk he khavaeng ngin te, “Meak ngae mYerusalem he mera horong a ngokol langto ekam a ngaelaut ko tiniram ka ye he ktolpum ngok mrek. Mea her kaikkiem her endo arhe ¹⁴ ngok mniam ani rek to nak vaik mniam. Meak pis khavaeng a rek kteit te, ‘E Pattermia ta svil kam kunngir kim a kolkha to A Engyel Tvarpaam O Yuda Ngaro Molpou kar kalngunes. Va ta svil kam mnganang yin te, ila taban to mkor o gunmia nam, mor kmelel mo kim o ol kun mniam?’ ¹⁵ Meaka mnganang tok, yek en ner mrua khenam ka rek ka taban to kuon mail ko ngat pasrengem he sim elel o ngorsang va a psen kun. To mea her kaelel o ol ko mniam a taban to arhe.”

¹⁶ Te smia papsim min tok knop, to ngint hera ngae to kpis mang a mhel to endo her sim kut enang ko e Yesus tpapsim min tok arhe. To ngint her kaelel mo kim o ol ko tok, mar kam kunngir kim a kolkha to endo.

¹⁷ Ngint kaelel mo kim o ol knop, to a kolkha ta vaik he, to e Yesus kar kalngunes ruk loktieh hori orom alomin ngata ngae kpis kun ma rek to endo, to her korosang kam her kaemik he.

**E Yesus Ta Ktar Kpavap Mang E Yudas Ko Nak Hortgi Mang
(Mt 26.17-25; Lk 22.7-14, 21-23; Yn 13.21-30)**

¹⁸ Ngat korosang he khivuo kmemik, to e Yesus thera havaeng ngar te, “Kua mien ngang nguk te, langto mniam muk ruk mut kaemik kar dok tete nera hortgi mang dok.”

¹⁹ Tre tok, to kalngunes ngate sei kam mrua mrung ngar mruo hak. To langto langto mniam mar tkaelha kam mnganang te, “Ngoldaip, nok ya re mang dok vor?” ²⁰ Va e Yesus tkoripang ngar te, “A mhel to ta vasgem ka bret ka mhe kun ma plo kar dok, her endo mniam muk ruk loktieh hori orom alomin arhe nera hortgi mang dok. ²¹ Ii, nera hortgi mang dok, gi enang ko A Mhel To Nkong Man Ma Volkha nak yor kmikkiem gi enang ko E Nut karo rittiek ngata ktar khavae mang tok. Va si enang tok, suvrum kela to nera hortgi mang dok, ko tmi ya hak enangthe knan nap

lo kol. Vanangko tho mi kut kerononho hak ko knan tkol he, ko nera kol a kapnes vgum E Nut pum ka kerkeknen to endo.”

**E Yesus Ta Pakvom A Ngaemik To Kam Mur Kael Pat Kim Mor Mang Ka
Yor Ko Ta Tootkinre Mang Ka Yor Orom
(Mt 26.26-30; Lk 22.15-20; 1Kor 11.23-25)**

²² Phevgom e Yesus kar kalngunes ko ngata hivuo kmemik, e Yesus thera kol a bret langto to kanprim E Nut mang to kommen he kaisis kim kalngunes to kreng ngar te, “Mgua kol a bret ta. Kua vok ta arhe.”

²³ To ther kle kol a kolhi orom a ye to a vaen vat he kanprim E Nut mang to kaen ngang kalngunes to mar tgus ngat ivie mnam.

²⁴ To treng ngar te, “Kua gidiel ta arhe to nera ksuk mang o mia tgus, endo E Nut ta sir malpgem kmel ka mokpom kar o mia orom. ²⁵ Ii, kua mien ngang nguk kat gi te, kmelha tete, ngor lo kat kaiviem a ye to a vaen ta kar muk kat e, kam ngae kais ko ngurer kta kaum kat kmiviem endo a gunnar vat kam tuur mniam E Nut ka pnes to orom endo nera kpom mniam a kolkha to ka tavgo nak komor o mia tgus.”

²⁶ Ngat kaemik knop, to kael a kni langto to her kottek to ka grap ngogouon kim ke vul to e Olip.

E Yesus Ta Ktar Kpavap Mang E Pita Te, Nera Klai Mang

²⁷ To ko tok kia vul to e Olip, e Yesus thera reng kalngunes te, “Muk tgus mguera kpom klaem petgim dok kmikkiem enang ko E Nut karo propet ngtaktar kaittiek mang nguk tok gi te,

‘E Nut nera tgem o sipsip ngar teit he ka valngan to orom o sipsip ngara ngorpok petgim.’

²⁸ Vanangko ko pekam ko E Nut nak hover dok petgim kua nnak, ngora ktar mang nguk kam ngae ngok mGalili.”

²⁹ To e Pita thera hop ku he koripang te, “Dok ko ngae ho lo kais hak kam ngorpok parem yin e. Si enangthe kolenar tgus ngak ngorpok parem yin vanie, vanang dok nove!”

³⁰ Va e Yesus ta kokheng e Pita kam reng te, “O-o, Pita kua mien ngang in te, gi ngka masegain ta, ktar mang a ngaining kmeti ngira klai mang dok kngam ngkorlotge te, yi lua mnor mang dok.”

³¹ Va e Pita tkut kaesik he kaur gi kmoripang te, “Si enangthe ngua ngae sia yor kar yin va kho lo is hak kam klai mang in e.” To e Yesus kalngunes tgus ngata kol vgum e Pita kam reng en tok kat.

**E Yesus Ta Ngarkie Mnam A Loot To Ngma Mon Te, E Getsemeni
(Mt 26.36-46; Lk 2.39-46)**

³² To e Yesus kar kalngunes ngata ngae kvaik kun mniam a loot to ngma mon te, e Getsemeni. To e Yesus thera reng ngar te, “Mguak korsang mo

na, nang dok ngora ngae he kngarkie.”³³ To ther gia nglum e Pita va e Yems kre Yoanes, to endo he, a vnek alautar hak tkaelha kam kerngorom ko karo papat ngat ho mi ktua kervavle hak.³⁴ To thera reng ngar te, “O-o, a mamrung a ho lautar hak tho mi ktua kokol dok he. He tre kmim dok, kngam dok hak. He ekam tok, mguia gia vle mo he kaenue he ktoot.”

³⁵ Tre tok, to her vur kael a long mang ngar to ka kru ka vham oguon mmie to kngarkie ngang E Nut te, enangthe ka papat ngang ngnok vop, va nak pet ke longmok to tre kam kol, endo orom la vut to orom ka yor. ³⁶ Tngarkie ti te, “Yoko dok gi, Titou-o, ilaro papat ngat kais mang o reha tgus yin kmeharom mar. He ekam tok, ngia pet la vut to enda orom kua yor to tre kam kol dok vanie. Vanangko ngior kam kokol ekmok e, ngiak kle va kaikkiem ila svil mruo ge.”

³⁷ Tngarkie tok knop, to her kaeknik ngok kim kalngunes ruk korlotge he kvotgem mar ko ngat her onnit he. To treng e Pita te, “Ngola, nngia orom muk korlotge, he mut lo vur kais kam vur kaenue he ktoot gi?

³⁸ Vanang mguak mrua toot mang nguk mruo he kngarkie, muk kam lo mrua ngam muk ekam o kerkeknen ruk ngam kaegom muk. Ko muma serppak mang kmikkiem mularo svil ruk kmeharom o keknen ruk lyar, vanangko mularo pkor ngaro svil ruk ngam kaenen muk kmeharom o kerkeknen ngam kle khos kim mularo svil ruk kmeharom o keknen ruk lyar.”

³⁹ E Yesus treng ngar tok, to ther kta parem mar kat kngam nglomin kam kta votam karo ngarkie ruk kat ge.⁴⁰ Ta kta ngarkie tok knop, to her kat kaeknik ngok kim kalngunes va pis gi kta votgem mar kat ko a kenap alautar te ho kvarvrum mar hak he ngat ho ngae onnit ngae hak. Va ngat hop, nang gia vongnek kim ko nop o rhek ngang ngar kmoripang e.

⁴¹ To ta vle tok kat kam ngam ngkorlotge mang kalngunes ko ther kaeknik kpis mang ngar to her kta votgem mar kat he kreng ngar te, “Ngola, mut le kaol kam pis sim konit vat? Tis he, ko her ke longmok ta arhe ngang endo kam hortgi mang A Mhel To Nkong Man Ma Volkha kmel dok maktiegom o mia ruk ngam kaeharom o kerkeknen.⁴² Mu hohop he, he mu sor kim na. A mhel to kam hortgi mang dok, enda he. So mor he ngor khorong.”

O Yuda Ngalmialao! Ngta Kapom E Yesus (Mt 26.47-56; Lk 22.47-53; Yn 18.3-12)

⁴³ E Yesus ta rere vop, nang endruk loktieck hori orom alomin ngaela langto mruo to e Yudas, tkaol orom a rkan langto ko ngata pis ko kim e Yesus he. Ngta pis orom ngakro komtok va ngakro kier ko o pris ruk laol va o pattermia kmo pos va o Yuda ngalmialao ngat her meng ngar enang tok arhe.

⁴⁴ Vanang endo thortgi mang e Yesus ta ktar keknen ngang ngar mang a ngaelmir to mar kam mnor mang ko ner pis kaeharom ngang ko thavaeng ngar te, “Mguak vokom dok ko endo ngua pis ko kim he vrua pum ka volha kam mrung tok, va her endo arhe. Mguak marer kpis to kpuung mang he kapom koot mang kam ktong kngorom.” ⁴⁵ To endo he, e Yudas ther gia ngae lsir rkieng e Yesus to hera kvam te, “O, Kolaip.” va vrua pum ka volha kam mrung enang tok. ⁴⁶ To a rkan to endo ta murmur mang e Yesus koleng singni mnam he kapom. ⁴⁷ Ngata kapom, va vgum e Yesus kalkayie langto ta sir ko vanam e Yesus ko ther gi kait ka kom ku her gia ngam mang o pris ruk laol ngalaip kalkayie langto va her gi kser ka ngaela ka pun kpet hak.

⁴⁸ Vanang e Yesus ta le kreng a rkan te, “Ngola, nok pathe mut vua kokho orom o komtok va o kier kngae mang dok kam kapom dok enangthe dok a mhel to koma kaenpgam o mia kam kaum kaen ekam lRom he kaus kar mar vor? ⁴⁹ Vanang mo kolkhek tgus kom her gia patter o mia ma mmok ko mnam E Nut ka maksien, va mum lua re kam hera kapom dok ko tok? Vanangko mguaka kapom dok vanie, ko E Nut nak kaottam karo rittiek, mar kam pis lmien kmikkiem gi enang ti arhe.” ⁵⁰ E Yesus ta rere tok knop, to kalngunes tgus ngat hera ngorpok kparem.

⁵¹ Vanangko kalkayie langto tgia kokomor orom a gi yet tuk to ka keik ta grap, ta pepem mar orom e Yesus. He a rkan ngat re ka kpom en kat, ⁵² vanangko ngat gi kpom ka yet khalger kuo mang to tgia ngorpok a gi mit, vanang ngat gi kpom mar ko a gi yet.

**E Yesus Ta Sir Ko Kim O Yuda Ngar Ke Murgun To Nma
Vongnek Kim O Rhek**
(Mt 26.57-68; Lk 22.54-55, 63-71; Yn 18.13-14, 19-24)

⁵³ E Yesus kalngunes ngta ngorpok kparem to a rkan to ta koleng singni mnam e Yesus ngta ktong kngorom he kael ngok kim o pris ruk laol ngalaip kun kuo mnam ka ngoulu to klalaut ka taban to ku mnok ko ma gi vle ko tok mnam E Nut ka maksien. Nang o gi wrong mia ngat gia vle ku klangtar orom. Ngat el ko tok kun kuo mnam a ngoulu to klalaut to endo, to o pris ruk laol tgus va o pattermia kmo pos kar o Yuda ngalmialao ngat kaum kam ngan o rhek mang. ⁵⁴ Vanang e Pita tgi vrua pepem mar kngae orom e Yesus gi kam ngae kais ko ngata vaik kun mnam o pris ruk laol ngalaip ka rek ka mhe to ku mnok ko ma gi vle. To ther pis kvaik korsang kar endruk ngma toot mang a rek kam kuk pa paei.

⁵⁵ To o pris ruk laol va si o Yuda Ngar Ke Murgun tgus, endo nma vongnek kim o rhek ngat kaim o papat kam pis mang o mia akor kam ngam o rhek ko lserpgue kam rere kim e Yesus ormar, nang lRom kmim kngam a yoror. Vanangko ngat lo vur pis mang tang ko karo rhek ngata

serppak is e. ⁵⁶Ii, ko o mia kavurgem ngat sia ngam o rhek kam ppiak mang, vanang ngaro rhek ngat lo maenang e.

⁵⁷Kam ngae, to endo he, o mia akuruk ngata hop he kngam o rhek ri kam ppiak mang te, ⁵⁸“Ngota ngan a mhel to enda ko thavae te, ‘E Nut ka maksien ta o mia ngat hover orom ngaro singni mruo, ngora lget he lo hus kam kta hover langto yok vat kun mniam o kolkhek ruk korlotge, a mten to o mia ngat lo kais kam hover orom ngaro singni e.’” ⁵⁹Ngata havae tok, vanang si o mia ruk endri va ngaro rhek ngat lo maenang kmis kmenserpagam a re tang kmim kngam a yoror e.

⁶⁰To o pris ruk laol ngalaip thera sir kun pgegom mar tgas to ka mnganang e Jesus te, “Ngola, ya ngan o rhek ruk ngat kaelik kuo mang yin va nop o rhek ngang in gi kmoripang ngar?” ⁶¹Vanangko e Jesus tlua svil kmekon ngang e, ther gi sir kvongnek kim.

To o pris ruk laol ngalaip ta tger e Jesus kam kta mngan kat te, “Lmien mang in te, Endo E Nut Thim Orom Ka Msasaen her yindo arhe, i o nop gi? Va E Nut To Nma Ngamyammok Mang O Mia, Khal to yin, i o nop?”

⁶²Va e Jesus tkoripang te, “Mare, her dok ta arhe. Va kua havaeng in te, kmelha tete kngae ngnik ngnik,

mguera vokom A Mhel To Nkong Man Ma Volkha ko ner korsang ko mniam E Nut To La Vu Ngaurar Hak ka miktie. Va mguera vokom kat ko nera kaol kpis kun kuon ma volkha orom o varhek.”

⁶³O pris ruk laol ngalaip ta ngan ko e Jesus ta re tok, to thera hop ekam karo it to kommenik kam polger ka ngaesik, to kre te, “Ngrua lo kat kais kam kta vae mang o mia akor kam pis kam ngam o rhek mang kat e, ⁶⁴ko muk mruo mut mur ngan ko ther mur kerrereng E Nut orom karo mur rhek mruo enang tok arhe. Va muta pat nngia? Mguer kael ani vnek to kuo mang e?”

Va ngat monik kim a yor ngang ko ngat koripang te, tho mi kut is mang en, mar kmim kngam a yoror hak. ⁶⁵To akuruk mniam mar ngat kaelha kam guguspa mang to ka kleng kalo keik kam tokim min, en kam lua nho, to khim singni malpgem he kreng te, “Yindo a propet ngola, ngiak mon edim mniam mor ko tim yin!” Ngat eharom tok, to o toot kmo mia ngata kta him singni malpgem kat.

E Pita Ta Klai Mang E Jesus

(Mt 26.69-75; Lk 22.56-62; Yn 18.15-18, 25-27)

⁶⁶E Pita ta vle ha ku mnok vop kun mniam o pris ruk laol ngalaip ka ngoulu to klalaut ka taban to ku mnok ko ma gi vle, va a vлом langton nam kaeha ko tok tgi kaol ngok kim he ⁶⁷kpis vokong ko ta kuk pa paei. Te smia kelli mang ka mnor to kreng te,

“Yinda kat arhe im kaikkiem e Jesus to nkong mNasaret kat.”

⁶⁸Vanangko e Pita ta klai mang te, “O-o, klua mnor mang a papat to ya rere mang. Klua mmok mang ilaro rhek e.” To e Pita te vrua kle ngogu va gudor ngku mnok [va vgum a ngaining ko tkaeti.]

⁶⁹To a vlom to nam kaeha ko tok, ta kta vokom e Pita kat, to kle ho gi kaur ge he kreng endruk ngta sisir ko rkieng kat te, “Mare, a mhel ta, her kalkayie langto arhe!” ⁷⁰Vanangko e Pita ta kta klai mang kat.

Ngat vrua vle, to o mia akuruk ngta sisir ko rkieng ngata kta reng e Pita kat gi te, “O, lmien hak he, kalkayie langto yin arhe, ko yindo nkong in mGalili kat.”

⁷¹Va e Pita thera koripang ngar he mur kael a lte mang en mruo te, “Yu! Enangthe nguaka ppiak va E Nut nak kaim dok kngam dok a yoror. Kua havaeng nguk te, klua mnor mang a mhel to muta rere mang e.”

⁷²Ta rere vop va vgum a ngaining ko tkaeti kngam nglomin. Tkaeti, yek e Pita ther gia pat mang e Yesus karo rhek ruk ta ktar kpavap mang en ormar te, “Ktar mang a ngaining kmeti kngam nglomin, ngira klai mang dok kngam ngkorlotge te, yi lua mnor mang dok.” E Pita ta pat mang o rhek ruk endruk to her gia polger karo reti laut he.

Ngta Srim E Yesus Ko Pum E Pailet Kalo Keik
(Mt 7.1-2; Lk 23.1-5; Yn 18.28-38)

15 ¹Kam ngae, to hop tie marot msim o Yuda Ngar Ke Murgun to nma vongnek kim o rhek, endruk tgus o Yuda ngalmialao, va o pris ruk laol va o pattermia kmo pos ngat kaum he ka lgem o rhek, lRom kmim e Yesus kngam a yoror. Ngat eharom tok knop, to ngat kaussiem e Yesus kalo ktieck to her kottek orom kun mniam E Nut ka maksien he ka ktong kngorom kmel ko maktiegom e Pailet, endo lRom ngat el kam nho mang lYudea.

²To e Pailet thera mnganang e Yesus te, “Ngola, O Yuda Nga Taven msim to yin arhe?”

Va e Yesus tkoripang te, “Yin mruo yi her ngae rkieng dok orom a re to endo!”

³Thavae tok, to o pris ruk laol ngat kael o rhek kavurgem kuo mang.
⁴He ekam tok, e Pailet ta kle ka mnganang te, “Ngola, ya ngan o rhek kavurgem ri ngat kaelik kuo mang yin va nop o rhek ngang in gi kmoripang ngar?”

⁵Va e Yesus tlo kta svil kmoripang en kat hak. He ekam tok, e Pailet te sei kam mrua sor mang he.

Ngta Monik Kim A Yor Ngang E Yesus
(Mt 27.15-26; Lk 23.13-25; Yn 18.39–19.16)

⁶Vanang mniam a pnes to endo ko o Yuda ngma kunngir kim mo pnes tgus, o Yuda ngalaip ko en a Rom, nam kaikkiem a keknen to kam hong a mhel tang kun mniam a hengor, en kmeknik ngok kim o Yuda, ko o Yuda mruo ngam mrua mon ngang lRom, mar kam hong petgim a hengor.
⁷Va mniam o kolkhek ruk endruk lRom ngat el a mhel langto ka munik e

Barabas kun mniam a hengor kar klenar ruk ngat kaenpgam o mia kam kaum kaen ekam lRom he kaus kar mar. He en tim a mhel langto kngam a yoror kun mniam a kolkha to o mia ngat kaus kar mar. ⁸To o Yuda ngat pis kaum ko kim o Yuda ngalaip to e Pailet, va e Pailet thera mnganang ngar kam mon a mhel tang ka munik kmikkiem a keknen to endo kam hong a mhel langto ngok kmar mo pnes tgus.

⁹E Pailet ta pe gia mnganang ngar te, “Yu! Muta svil dok kam hong muk ruk O Yuda Mula Taven ngok kmuk?” ¹⁰Ta pe gia mnganang ngar tok, ekam ko ta mnor mang lYuda ngalmialao ko ngam kaesik ngang e Yesus, he ekam tok, ngat kael ko maktiegom mruo. ¹¹Vanangko o pris ruk laol ngat kaenpgam a mumu kam kle va ka mnganang e Pailet kam hong e Barabas ngok kmar.

¹²To e Pailet ta kta mnganang ngar te, “Vanang ngua kanker e Yesus, endo o mia ngma mon te, O Yuda Nga Taven?”

¹³Va ngat koripang te, “Krong orom o ot kvat engnang a ho!”

¹⁴To e Pailet ther kta mnganang ngar te, “Kman? Muk mruo mguaka ktar khavae mang ani kerkeknен to msim teharom!”

Vanangko a mumu ta kle va ho gia vui klik hak te, “Krong orom o ot kvat engnang a ho!”

¹⁵He ekam ko e Pailet ta svil kmel longeik ngang a mumu, ta le khong e Barabas ngok kmar, nang kreng a rkan kam kirmekon a khap mniam e Yesus. Ngat pis kirmekon a khap mniam knop, to e Pailet ther kle kael ko maktiegom endruk ngma kar va tomtent, mar kam le ka krong orom o ot kvat engnang a ho.

Ngta Klel Orom E Yesus

(Mt 22.27-31; Yn 19.2-3)

¹⁶To endruk ngma kar va tomtent ngta ktong e Yesus he kpis kvaik orom kun mniam a ngoulu to klalaut to mkor lRom nga ngaomevek ngalaip. To ngat hera vaeng nglenar tgus ruk kun mniam nga rkan to endo kam kaum ko kim kat. ¹⁷To ko tok, ngata kaum to hera kuit pum, nang kle kaegenkar vat orom a yet to a svel, enang endo o taven ngam kaegenkar. To ngat hera lum a vlak he ka llim kuon malpgem. ¹⁸⁻¹⁹Ngat eharom tok, to langto langto mniam mar ngat kaelha kam tubulkek ku penharom to kpetyl o rhek ngang kam klel orom kam reng te, “O Yuda Nga Taven to yinda arhe!” Va ngata him a khap palpgem va kguspa mang kat. ²⁰Ngat klel orom tok knop, to ngat le khong a yet to endo, nang kle kat kaegenkar orom kta yet mruo. To ngat hera ktong kngorom kngae ka krong orom o ot kvat engnang a ho.

lRom Nga Rkan Ngta Krong E Yesus Orom O Ot Kvav Engnang A Ho

(Mt 27.32-44; Lk 23.26-43; Yn 19.17-27)

²¹Ngata ktong kngorom e Yesus ekam a ngaelaut, to ngta ting kim a mhel langto ko tottek ko ma lootpgeik he kaeknik ngok mrek. A mhel ta

ka munik e Saimon to nkong mSairini. En e Aleksanda va e Rupus ngin teit. Tottek ko ma lootpgeik he re kmotter mar, vanang endruk ngma kar va tomenten ngat hera kol a hagie mang kam sopong en kam tolpum e Jesus ka ho to kmoreker kuon. ²²To ngta ktong kngorom e Jesus to kpis ko mniam a mhe to ngma mon te, e Golgota. (Vanang a munik to e Golgota, ka pun ta vle te, “A mhe to ta nho enang a mhel ka lpek ka kolhi.”) ²³To ko tok ngat kol a ku langto ngma mon te, a miir, endo ngat eharom orom a ye to a vaen ka mten to ngat mo vavaikar kar a lkiet ka ye langto to le kaegom kmen ngang. Vanangko tlo iviem e.

²⁴⁻²⁵Tie marot vop, va endruk ngma kar va tomenten ngata krong e Jesus orom o ot kvat engnang a ho ko tok. “To ngat le ka khanier kam kir mo kmar kam mnor te, edim mniam mar kam kol langto langto mniam karo it. To ngat kaisis kim karo it enang tok.”

²⁶Va kuo malpgem ko engnang a ho ngat el o rhek ruk ngta mon en ormar te,

“O YUDA NGA TAVEN TA ARHE.”

²⁷Vanang, ko vanam e Jesus ngta krong alo ngauruvik aloruk orom o ot kvat min ko engnang ngintalo ho kat. Langto ko vanam ka miktieks va langto ko vanam ka ksienga. [²⁸Gi enang tok, E Nut karo rittiek ngat pis lmien orom e Jesus ko ngat havae te, “En nera kol a kapnes to o ngauruvik ngma kol enang tok kat.”] ²⁹Nang o mia ruk ngam kaol ekam a ngaelaut ngam kaol va ngma kirhek ngang e Jesus he kaerer ngaro lpetuk kim he ka klel orom te, “Oho! Yindo ima havae te, ngira lget E Nut ka maksien he gi kta hover mniam o kolkhek ruk korlotge, her yinda arhe? ³⁰Te yin he, mur sulgim yin mruo ko tok he grung ngku kuon petgim a ho to ngata vat yin ko engnang.”

³¹Va o pris ruk laol kar o pattermia kmo pos ngta kol a klel orom gi enang tok kat kam mo reng ngar mruo te, “Te en nma sulgim o mia akuruk, vanang kman ko tlo kaeharom ngang en mruo tok? ³²He nong IIsrael Nga Taven to en gi? Va enangthe lmien te, en Endo E Nut Thim Orom Ka Msasaen msim, va npa grung ngku kuon petgim a ho to endo ko pum nguaro kerok, yek ngrera kor mniam mor mang en vgum tok.”

Va si alo ngauruvik ruk ngta krong ngin orom o ot kvat min engnang nginalo ho ko vanam e Jesus kat, va min tgus nginta kirhek ngang gi enang tok kat.

E Jesus Ka Ngaung Ta Mtiet (Mt 27.45-56; Lk 23.44-49; Yn 19.28-30)

³³Pkolkha vop, va vgum a slommok ko ther gi pis pgeik komor a volkha va a mmie tgus kngae kais ma vlemas. ³⁴To rkieng ko a slommok

tre kam nop ma vlemas, E Yesus ther kael ka ktui orom ka re mruo te, “Eloi, Eloi, lama sabaktani.” To kam hortgem ka re to endo ka pun ta vle te, “Nut-o, Nut-o, yindo kom kor mniam dok mang in, kman ko ya ksir petgim dok?”

³⁵ Vanang o mia akuruk ngta sisir ko tok, ngta ngan ko thavae tok, to ngata havae te, “Mu vokom na, ta munik kim e Elaisia vor.”

³⁶ To langto mniam mar ther gia hop ku he ksap kvagsem a paspas kun mniam a ho ka ye to tngae gia gruk, to ta kleng ko vgum a kerker he kngae ktuom ngok vgum e Yesus te, en kmiviem. To thera reng klenar te, “Ngruak or na, he ngor kam vokom te, e Elaisia ner mi kaol kpis kam sulgim he khong kuon petgim a ho to endo, i o nop.”

³⁷ To e Yesus tkat kael ka ktui klik kat gi to ka ngaung thera mtiet he.

³⁸ Tyor tok, va vgum a yet to nam kaeloot mang E Nut ka maksien ke rek Ka Taban To A Ho Totur Hak ko ther gi kommenik kam ngam ko vgum kalo gu tgus he kael kalo kae alomin. ³⁹ To lRom nga ngaomevek ka rkan langto kalaip tvokong ko E Yesus tyor enang tok, to thera re te “Ai, ho mi kut lmiem hak he, a mhel to enda her E Nut Khal Msim ta arhe.”

⁴⁰⁻⁴¹ Vanang lraip akuruk kat, endruk ngata mokpom kar e Yesus ko mGalili he kaikkiem kmelha kaeha vgum ko tok, mar ngta vrua sisir ko vur hagenmok mang he ka vle kvokom mar orom. Lraip ruk, ngta sisir ko tok, mar e Maria to nkong mMagdala kar kyok e Maria to e Yoses to a molpou va knopia to ta knaek mang e Yems ngin nan. Va e Salome ta vle ko tok kat kar lraip kavurgem ruk ngat kaikkiem e Yesus oguo mYerusalem.

Ngat Kael E Yesus Ka Mnes Kun Mniam A Kre Ka Nho

(Mt 27.57-61; Lk 23.50-56; Yn 19.38-42)

⁴² Nangko ma kolkha to endo ko ngata krong e Yesus orom o ot kvat engnang a ho ta vle te, a kolkha to o Yuda kmelel mo kim o tgoluk kam paneng a Sabat ko ketasuo en kam vuut. To a kolkha tre kam vaik, ⁴³ va a mhel langto nkong mAramatea ta vle. Ka munik e Yosep. En nma paneng Endo E Nut Thim Orom Ka Msasaen kam pis kat he ka tavgo kam komor o mia tgus. Va nam kaeha kar o Yuda Ngar Ke Murgun to nma vongnek kim o rhek kat va o mia ngma totu pum. E Yosep tpat mang a Sabat kat he karo krovek ngta ngae kun mniam en mruo kam ngae ngok kim e Pailet kam mnganang mang e Yesus ka mnes en kam kol he kael. ⁴⁴ To e Pailet ta senkrip kim e Yosep ka mngan ko tlua mnor mang e Yesus te, tmi yor, i o nop vop. To e Pailet tle kvaeng lRom nga ngaomevek ka rkan langto ngalaip. Tpis to e Herot ta mnganang mang e Yesus te, “Tmi yor he, i nop vop?” ⁴⁵ Tkol a re vgum endo te, ther mi yor he, to ther le ka tting mang e Yosep ka mngan. ⁴⁶ To e Yosep ta ngae kaenkim a yet to ka keik tvua grap he kngae kharpeet e Yesus ka mnes kuo va ho, to le kokomor orom. To thera

kokol kngorom to kael kun mniam ka nnak to ngat gi gnuua hong mniam a kre he lo el a mhel ka mnes tang kun mniam vop. Tkael knop, to hera vulham a kre to klalaut ko va kre ka nho ka gu kmelegot orom. ⁴⁷Vanang e Maria to nkong mMagdala kar kyok e Maria to e Yoses knan nginta vle he kvokom e Yesus ka nnak ko ngat vokom e Yosep ko tel e Yesus ka mnes kun mniam!

E Nut Thover E Yesus Petgim Ka Nnak
(Mt 28.1-8; Lk 24.1-12; Yn 20.1-10)

16 ¹To a Sabat ther nop ko a kolkha ther vaik he, to e Maria to nkong mMagdala kar kyok e Maria to e Yems knan va e Salome mar tgus ngta kaum kngae he kaenkim o ku, mar kam ngae he kpungnim e Yesus ka mnes orom mar. ²To hop enang ngmo ma Sande, lraip ruk endruk ngata hop halkie tie mo kao, to kngae ngok pe Yesus ka nnak. Ngta pis ko pa nnak va a kolkha tgi gnuua plek. ³Ngat kaikkiem a ngaelaut to hera mo mnganang ngar mruo te, “Erieto nera vulham a kre kam koregot kim mor?”

⁴Ngta mo mnganang ngar tok, to re kvokom a kre ka nho, va vgum a kre to tvu laut hak, endo ngat elegot kim e Yesus ka nnak ka gu orom, ko tollok he kvulhi he ka vle petgim a nho he. ⁵To ngat pis re gia vavaik ogun ma nho va le gi vokom a ngokol langto ko tvaik pum ka yet to ta les he korsang kun ma nho ka ngaiting to a miktie. Ngat vokom tok, to ngaro ngaongtok ngta ksir.

⁶Vanang a ngokol to endo ta reng ngar te, “Mu or kam ngaungput e. E Yesus to nkong mNasaret, endo ngat krong orom o ot kvat engnang a ho, mut sia riring moti, nangko en nong mo e, ko ther hop petgim ka nnak ta he. Mu aol ngte he vokom ka ngaekam to ngat el mniam na. ⁷Ii, mu or kam gia sir ko tok he kgor, vanangko mguak kle va kngae smia papsim kalngunes, va si e Pita kat, va mguak smia papsim te, ‘En nera ktar mang nguk kam ngae ngok mGalili. He her ko tok arhe mguer kta vokom kat, kmikkiem gi enang ko ta ktar mur havaeng nguk gi enang tok arhe.’ ”

⁸Ngata ngnek tok, to ngaro nunu ngat ngae ho mi kut parem ngaro mit hak va ngaro pkor ngat kaelha kam khi. To ngat hera marer kngorpok petgim a nnak to endo, nang ngae lua havaeng a mhel tang mang, ko ngata gor.

**O hor akuruk tennik ngat el o rhek kavurgem ri kam trong
 orom a knovvur to enda ormar. Ngat kaelha orom a mhe to e 9
 moti to le kngae kais ma 20, to a knovvur thera tu ko tok.**

E Yesus Ta Mrua Khenam Ngang E Maria To Nkong mMagdala
(Mt 28.9-10; Yn 20.11-18)

[⁹Va mniam a kolkha to a Sande, ko e Yesus thop petgim ka nnak, ta ktar mrua khenam ngang e Maria to nkong mMagdala, endo tesgun ta

kerer o kool ruk aktiek hori orom alomin kun mnam. ¹⁰To e Maria thera ngae he kle khavaeng endruk ngam kaikkiem ko ngata vur pa ngaor he ktolpum o ngoven kam vua mrung va kaee mang. ¹¹Ngta ngan karo rhek ko thavaeng ngar mang e Jesus te, thop he, he en mruo tmur vokom, vanang ngat lo kor mnam mar mang karo rhek e.

E Yesus Ta Mrua Khenam Ngang Klo Kaloyie
(Lk 24.13-35)

¹²Tie mavlemas to endo, e Jesus tmur kta khenam ngang klo kaloyie ko nginta ngae ko ekam a ngaelaut ko ma gi lootpgeik. ¹³To enngindi kat, ngint her kaeknik he kle khavaeng endruk ngam kaikkiem mang tok kat. Vanang, ngat lo gi kor mnam mar mang ngoro rhek kat e.

E Yesus Ta Mrua Khenam Ngang Endruk Loktieck
Hori Orom Atgiang Tgus
(Mt 28.16-20; Lk 24.36-49; Yn 20.19-23; O Reha 1.6-8)

¹⁴Kopekam tok, endruk loktieck hori orom atgiang ngat korsang ku mmie he kaemik, to e Jesus ta le mur kta khenam ngang ngar kat. Ta mrua pis ko kmar he le ka psom mar pum ngaro papat ruk ngama vle gi kaendel pum E Nut kngam ge, ko ngat lo kor mnam mar mang o rhek ruk mkor endruk ngat mi vokom, kopekam ko thera hop petgim ka nnak he.

¹⁵E Jesus ta psom mar knop, to le khavaeng ngar te, “Mguak ngae mnam o marhok tgus he kpolger o rhek ruk mang a knovvur ngang o mia tgus ko E Nut tkueng ngar. ¹⁶Va endruk ngat lo kor mnam mar mang dok, E Nut ner kle kmonik kim a yor ngang ngar, mar kam yor pum ngaro kerkeknen. Vanang endruk ngat kor mnam mar mang dok he kparrur orom E Nut ka munik, her mar ruk arhe E Nut nera sulgim mar he kaen a ktalhok to kam plong vle ko kim En ngnik ngnik ngang ngar. ¹⁷He enang tok, ngor kaeharom o ngaelmir ruk lsergue ruk endri ko maktiegom mar kam mi kaenserpagam kuaro rhek ma mmok. Ii, ko ngara kerer o kool orom kua munik va ngara rere orom o wrong rhek akuruk yok. ¹⁸Va enangthe ngpa kapom o vimol, i o enangthe o mia ngapa sumger mar va ngat lo is kam yor e. Ii, va ngara kaehang endruk ngta yayor va ngar kta yaya kat.”

E Yesus Ta Grap Ngogouon Ma Volkha
(Lk 24.50-53; O Reha 1.9-11)

¹⁹Ngoldaip to E Jesus ta rere kar mar knop, to E Nut thera kol ka grap orom ngogouon ma volkha he kael a ngorsang ngang ko mnam ka miktieck, endo nma nho orom. ²⁰Ta vle tok, to kalngunes ngat hera ngae kun mnam o marhok tgus he kaelha kam polger o rhek mang e Jesus ngang o mia. Ii, he enang tok, e Jesus nam kaeha maktiegom mar kmenserpagam karo rhek ruk endruk, her gi orom o ngaelmir ruk ngma pis vgum karo rhek ruk tok.]